

Rocapa Jesocristo tahimari dsodo inajaro Lucas

Rocapa doctoro, madija comagquiri najari to-tonanomide. Pohnuapa Jesocca dodosse jararaha Jeso dsoqquehi natti pohua tahimari dsodode dissera tajari. Jeso tahimari mittahissa tahijine Jesocca dodosse tabaqquidenidsa huati, pohua huatimade ohuahadenidsa huati, Jeso imeni Mariadsa huati huati naridsadsana pohua tahimari dsodo inajaro. Rocapa pohua tesse Teofiro Jeso tahimari nahato tahijine pohuadsa dsodo inajaro.

Rocacca dsodoniji onihi oninipi: Jesocca dodosse tabaqqui tahimarideni, inajaro. Najaro onini cariacca: Hechos, quinajari. Rocapa Pablodsa ccaridsajari, Jesocristo tahimari icas-siejeranijinecca maride.

Rocapa Jeso tahimaritohui dissera tajari

¹ ¿Nija Teofiro? Tiadsa Jeso tahimari dsodo onajaro. Tahide Jeso pohuadsa toquejenajarideni mota huapi taha pohua tahimari dsodo naridsamanapojaride. Pohua tossonapohui tahimaria aja nahatonidsa Imehidsa toccama-cossanihi bacco tajaropaji. Pohua tahimari huapima pajiranissa tanijine quinadsa dsodode disseraqquri najaride. ² Aja pohua huatimade pohuadsa jajahiridsa najarideni pocca nahaton-aja onihi, onihi nehe qqui najonamanajari naqui

dsodo quinajari. Aja Jeso pohuadeni mari mari ihicanabaqqui najari naco dsodo quinajari. Pohuadenipa Jesocca marinaja ehecomerarisamana najaro naqui icahatterajaro. ³ Nadsapi ohua naqui Jeso tahimari dsodo ocadsanaponijine tohuini onadsa aji Jeso pohua tahimaritohui, pocca marinajatohui dissera onajarode. Aji poccadeni dsodoniji huapima naqui hua onaridsajarde. Aja madija Jeso qqui toquinajardeni, pocca marinaja mittamanajarideni, najaridenicca ima naqui omittanissa tanijine onadsa occaridsajarde. Jeso pohua tahimari huapima dsodo quinajarocca onatassaqquidsa ojine tahideccadsama pajissehera dsodo onajonajaroa ajijaropaji. Jehe Teofiro, Jeso tahimari huapima ticajinjine onadsa tiadsa dsodo onajaro. ⁴ Aji Jeso tahimari tia maridedeni tia mari icanamanajaro huapimapi pajissa nahato tinanjine tiadsa dsodo onajaro.

*Dio Atti ccaccaronadepa Huano Baotista
tossonehijine tahimari huati tapojari*

⁵ Nadsama Herodepa Isaraeri potemahi jodiodenicca dsama onini Jodea cacahuade tojadsa Sacaria naco madicajari. Pohuapa Diodsa dada toqquimade tojajari. Nahihuaji dsepedeni ihijimana najarideni mota onidenipa Abia potemahideni. Sacaria naco Abia potemahideni. Pohuadenipa Diodsa dada toqquimahuaji cacahuade toquejenadsapa madijacca da naqquinaja Diodsa dada ihiquimamana najaro. Pocca amoneje Sabeopi Arao potemani. ⁶ Sacaria pocca

amoneje tadsajanipa poccadeni ima Diodsa bica tajaro. Ia Medsede Diocca dosseniji naqui ecahuamananissa tajaro. ⁷ Naraha Sabeopi ccaranije najaro. Maqqui tedseje ejedeni jiraha jadahi tocajamanajari.

⁸⁻⁹ Diodsa dada toqquimadedeni huapi taraha ojari ojari quinaha bodihuaji totoqquedsimamana, najari nahatohui majo bicabote tohues-side. Tohuessidsapa essene majo bica taha jami-mi canadsapa Diodsa huati huati totoquina najari. Sacariacca madija Abiadeni Diodsa dada toqquima ecahuamanadsapi madija ojaria bodihuaji toqquedsimahijine qqui quinahijineccadsa Sacaria oni bacco quinajari. Nadsapa Sacariana majo bicabote iessihijine bodihuaji dosse idsimanajari. ¹⁰ Toqquedsimadsapa majo bicabote iessidsa jami-mi cananaja amossinihuaji madija huapima Diodsa huatide toquejenaja najari.

¹¹ Sacariapa nahi bodihuaji madiccadsa Diocca dodosse Pohua Atti ccaccaronade pohuadsa ahuatomajari. Majo bicabote tohuessidsa majo toccabaqquihijinecca huahuanari inorini nahatonihuaji huajari. ¹² Nadsapa Sacaria Diocca dodosse qqui inadsapa cappinajari: —¿Nejecora ohuadsa tojapadseje? —najari. ¹³ Naraha manaco Dio Atti ccaccaronade attipa: — Sacaria ticappina-jeraji, Diopa ticca huatinaja mittahi. Ticca amoneje Sabeopi ejedeni cajinitohui. Tossonadsapa onipa: Huano, tana —najari.

¹⁴ —Ticca ejedeni tossonadsapa tetidsenitohui. Madija ohuahadeni naco huatidsemanahitohui.

¹⁵ Nadsama najari ticca ejedenipa Diodsa bica taha tojahitohui. Pahuapa uva ppejene dse

Sacariadsa.

²¹ Naraha Diodsa dada toqquima huapihua-jiccadsa Sacariatohui madimanajarideni attidenipa: —¿Nejecotohui Sacariapa bodihuaji najajari? —quinajari. ²² Nanaja Sacaria qquenadsapa huati tahitohuiraha atti cappiraha qquenajari. Naraha madija pohnadenidsa ima ahuato teje najaro: —A, Diodsa dada toqquima bodihuaji Diojine pohnadsa ima ahuato tajaro nitide —quinajari. Nadsapa Sacaria madija nahatoqqiri nahijinepa pohua dsepedsara dsopi dsopi najari, atti cappiradsapa.

²³ Sacariapa nahi Diodsa dada toqquimahuaji madicajari. Aja pocca madija Abiadeni dsepedeni jicahicca huada bacco tadsapa Sacaria toccanijari pocca odsahuaji. ²⁴ Nahidsa tomadinimanadsana Sacaria bedimeni Sabeopi jiajaro. Pina ponicca madijacca marinajassa najaro ejedeni idsonidsa huittidsadsapa abadsico 5 canaha ponicca odsahuaji qquena-jeraccani. ²⁵ Nani ponicca odsadsa madidsapi poni bodinidsa: —Jidapapi madija ohuadsa: “Ccarani” huahua quina-jarahitohui —najaro. —Jidapapi Diojine ejedeni ocajini. Ohuadsa ima bica tanicca tojani —najaro Sabeo.

Dio Atti ccaccaronade Cabirie Jeso tahimari ecomerapojaro

²⁶ Nadsapi Sabeo jianicca abadsico 6 canadsa odsa onihihuaji Dio pocca dodosse Pohua Atti ccaccaronade Cabirie dosse inaronapomajari. Najaro odsa oninipi Nasareti, dsama arobeni

Carireahuaicca. ²⁷ Nani Nasaretidsa dsohuato madijaro, poni oninipi Maria. Ponipi maqquideje caji-jeraccani, maqquideje ssamo taccani. Najaro dsohuatodsa Dio Cabirie dosse inaronajari, ponidsa huati tahijine. Nadsama najaro dsohuatopi Dsodse icajinijine tahide imehidenipa jehe canirepojari. Dsodsepa maittaccadsamacca tamine Dabi jinodi potemahi. ²⁸ Nadsapa Dio Atti ccaccaronade Cabirie ccaronadsapa Mariadsa ahuatodsa huati tajari: —Nija Maria, Dio tia catidsehi. Ia Medsede Diopa tiadsa madihi -najari.

²⁹ Maria pohua atti mittadsapi huajo najaro. Poni bodinidsa: —¿Nejecotohui pohua atti nama najari? ¿Nejeco imara ohuadsa tojapadseje? -najaro. ³⁰ Nanaja Cabirie ponidsa huati tapomajari: —Maria ticappina-jeraji. Diodsa bica tinani. ³¹ Jidapapa ejedeni tidsonedsa huittidsahitohui. Nadsama ejedeni tossonadsa onipa: Jeso, tana -najari. ³² —Pohuapa denima madija bicahi tojahitohui. Pohuadsa: “Dio memehuaaji madijaricca Ejedeni” quiquinanahitohui. Ticca ejedenipa ia Medsede Djojine tamine deni tojahicca tojahitohui, pina pocca idi maittaccadsamacca tamine Dabissa nahitohui. ³³ Pohuapa pocca madija Isaraeri potemahi ecahuabaqqui-dsanapohuitohui. Pocca cacahuehe naqui jiquejeranitohui -najari Cabirie atti Mariadsa.

³⁴ Naraha manaco Maria Cabiriedsa huati tajaro: —Ajijaro imapi ¿nejecoma najaro? Ohuapi maqquideje ocappiraccaha, maqquideje ssamo onaccani -najaro.

³⁵ Naraha manaco Cabirie huati tajari: — Dio Corimepa tiadsa bacco naronahitohui. Dio memehuaaji madijaripa tiadsa pocca dacorehe inananitohui. Pina meme essen nahuini tiadsa huedsana najarossa nadsapi Diocca dacorehe tiadsa tojanijine. Najarotine ejedeni nahatojaripa imasiri cappira, bodi ssiaja tahitohui. Pohnadsa: “Dio Bedi” quiquinanahitohui. ³⁶ Nadsama aji ticca madija Sabeo naqui jadaniraha ejedeni cajini. Abadsico 6 canaha poni idsonidsa huittidsaccahi. Madija huapima ponidsa: “Ccarani” quiquinanaraha jiajaro. ³⁷ Diopa ssamo tajarahi –najari Cabirie.

³⁸ Nadsama Maria poni attinipi: —Jehe, Diocca medse oiani. Pohna Attidsa ibora onani. Aji huati tinajaropi Dio ohuadsa inanana –najaro. Nadsapa Dio Atti ccaccaronade Cabirie toccamaccossanijari.

Mariapi Sabeo qquide toccajaro

³⁹ Nadsapi Maria ponicca madija Sabeo qquide dsama arobeni Jodeahuaji huassinaja toccajaro. Ssonohuajicca odsa panani bacco tajaro.

⁴⁰ Nanihuaji Maria bacco tadsapi Sacariacca odsadsa toqquedsimajaro. Sabeodsa: —¿Nija, bica tinaqui? –najaro. ⁴¹ Maria nija nani Sabeo mittadsa poni idsonicca ejedeni ttai ttai nadsapa Dio Corime Sabeo bodinidsa tojahissa tajari. Nadsapi Dio Corimejine bodini nahato tajaro. ⁴² Nadsapi Sabeo poni attini ahuato tadsa Mariadsa huati huati tajaro: —Diojine tiadsa ima bicani tojani. Amoneje huapi taraha tiadsana Dio ima bicani denima inanajaro. Tidsonicca

ejudenidsa naco Dio ima bicani inananitohui –najaro Sabeo. ⁴³ —Nadsama ohuapi ajimani ojaraha ohua Medsedecca ami ohuadsa ticcajonajaro. ⁴⁴ Ohuadsa nija tadsapi ohuidsonecca ejedeni huatidsejari, ttai ttai nahi. ⁴⁵ Jehe, ia Medsede Dio tiadsa huati tapohuicca ima pajissa tojanijine pajissa tadsapi Dio tiadsa ima bicani inanjaro –najaro Sabeo Mariadsa.

⁴⁶ Nadsapi Maria Diodsa huatidsedsa attinipi: —Obodi ohuattima: Ohua Medsede deni tojajari, bica tahi, onajaro.

⁴⁷ Ohua ocorimema Dio ohua Tonassiajededsa ohuatidseri najaro.

⁴⁸ Ohuapi Diocca medse ajimanicca ojaraha aji jidapanadsama madija attidenipa: “Diocca biquehe tiadsa tojani” dsadsanapomana nahitohui.

⁴⁹ Dio Dacorabote ohuadsa ima denima bica tanicca inanjaro.

Pohua oni imittadsapi Pohuapa imasiri cappira, Pohua bodi ssiaja tahi nahato inajaro.

⁵⁰ Nadsama Diopa Pohuadsa madija cappinamanadsa, Pohuadsa huahuatidsemana nadsa naco pohuadenidsa huati cahanari canahitohui. Pohuadeni potmahidsa naco nama dsanapohuitohui.

⁵¹ Dio pocca dacorehema dsepe ihiji najari.

Aja madija pohuadeni bodi attideni: “Nahato onani, Dio jirehe bica onani” quiquinanajaridenipa Dio pohuadeni inajaribaqquihitohui.

⁵² Nadsama tamine dacorabotedeni naco Diopa poccadeni dossehepi inajicaridsanitoahui.

Ajamani toquejenajaridenina Diopa deni inan-abaqquihitohui.

⁵³ Pemi madimanajaridenidsana huemahi da inahitohui.

Naraha dsepedeni sseqquiri najaridenipa dsepedeni jiraha Dio poadeni dosse inani-abaqquihitohui.

⁵⁴ Nadsama ia Isaraeri potemahideni Dio Attidsa iboraqqiri inajaropi Dio Pohua ia acco tocamabaqquihitohui.

Isaraeri potemahideni iadsa Diopa huati ajamajarahitohui. Pocca tohuati huanehema iadsa huati cahanari cadsanapohuitohui.

⁵⁵ Jehe, najaro imapi Dio icca ididenidsa huati taja najonapohui najari.

Icca idi Abarahaodsa, pohua potemahideni huapimadsa huati cahanari canajonajaria aja iadsa naco nama nahipaja dsanapojari –najaro Maria Diodsa huatidsedsa.

⁵⁶ Mariapi abadsico 3 canaha nani Sabeodsa madicajaro. Nadsapi ponicca odsahuaji toccanijaro.

Huano Baotista tossonahicca ima

⁵⁷ Sabeocca ejedeni tossonahijinecca abadsico bacco tocanadsapa maqquideje bedi tossonajari.

⁵⁸ Tossonadsapa poni inorinidsa madimanajari-deni, ponicca madija quinadsa ponicca odsadsa queriqquijari. —Diopa ponidsa huati huana

tadsa ejedeni cajijsaro –quinahi ima mittamanad-sapa ponidsa jahijonajari, poni tadsajani huatid-semanahijine. ⁵⁹ Ejedeni huadari 8 nadsapa jodi-odenicca huissinaja cajihiijine poccadeni madija huapima naco jahijonajari. Pohua oni naco imehi onidsa icanacanimanahijine: —Sacaria –quinahijineraha. ⁶⁰ Imeni attinipi: —Apajana, pohua onipa Huano –najaro. ⁶¹ Nadsapa attidenia: —Naraha ticca madija oni nama nahi nohuerahi –quinajari.

⁶² Nadsapa ejedeni imehidsa: —Ticca ejedeni oni ¿nejecoma nahi jipa tinani? –quinadsa pohuadeni dsepedsa dsopi dsopi quinajari. ⁶³ Naraha imehipa pohua bedi oni dsodo inahijine ahua ssapa tajarotohui pohua dsepedsa huahua najari. Nadsa dsodo inadsapi: —Pohua onipa: Huano –najari. Nadsapa huapima huajo canirejari. ⁶⁴ Nanaja Sacariapa atti cajimanipomajari. Atti cajimanipomadsapa: —¡Diopa bica tahi! ¡Pohuadsa ohuatidsejaro! –najari.

⁶⁵ Nanaja Sacaria inoridsa madimanajari-deni jabojo quinajari. Nadsapi najaro dsama arobeni Jodeacca ssono bedeni namidsa tanidsa madiridsamanajaridenidsa naqui ima tojaridsajaro. ⁶⁶ Nadsapa huapima ima mittaridsamanajaridenipa pohuadeni bodia: —¿Nejecoma napsadsaja ajajari ejedenipa? –quinajari. Dio pocca dacorehema Huano ecahuahissa dsanapojari huapimadsa ahuato tajaro.

Sacaria bodi huatidsejari

67 Nadsama ejedenicca abi Sacariapa Dio Corime pohua bodidsa tojahissa tadsa Dio Atti ecomerajaro:

68 —¡Diopa bica tahi! ¡Ia Isaraeri potemahideni Medsede deni tojahi!

Iapi Dio pocca tocattabaqquinaja iquejenajaro. Dio iadsa ccajonahitohui, ia todinibaqquihijine. Najarojine Pohuadsa ehetidse najaro.

69 Ia Tonassiajade dacorabote iadsa dosse inaronajari.

Pohuapa maittaccadsamacca tamine Dabi Diodsa iborabote potemahi.

70 Diopa maittaccadsama Pohua Atti cacomeracquiri najaridenidsa ia Tonassiajade ccajonahijine tahimari huati tapodsapa ehecomeramana najonajaro.

71 Ia Tonassiajadepa ia jaradedenicca jarehedsa ia tonassiajabacquihitohui.

Iadsa jiperaquiri najarideni naco huadidi taraha pohuajinena icassiejeranitohui.

72 Diopa icca ididenidsa huati huana tajari. Pohuadeni tedseje jehe canirejaricca ima huati ajama-jarajari. Inapajiranissa tanitohui.

73 Najaropi maittaccadsama icca idi Abarahaodsa Dio huati tapojaripa: “Pajissa Ohuattissa onananitohui” napojari.

74 Icca ididenidsa huadiquiri najarideni jara jara ihinabaqquimana naraha Diona inasjabacquiari.

Jidapana naqui ia huadide noppine icappinajeradsa Diodsara iboraquiri idsanapinitohui.

⁷⁵ Ima jirehe Pohuadsara imadinissa dsanaponitohui.

Icca madie naqui Diocca dossenijidsa pajiranissa dsanaponitohui –najari Sacaria atti.

⁷⁶ Nadsapa pohua bedidsa huati tajari:

—Jehe Huano, tiapi occa ejedeni, nidsa tinapid-sapi ia Medsede tedsejema madija bodideni tinanajorabaqqipojaripa pohua cca-jonahitohui madimanahijine.

Nema tadsapi tiadsa: “Dio memehuaji madijari Atti cacomerabote” quiquinanahitohui.

⁷⁷ Huano, tiapi icassiejeranijinecca ima ia Dio pocca madija iquejenajaro iadsa huati tinaridsanitohui.

Dio icca imasiri epeje inanadsapi nidsa pocca najidsohue tojadsa dsori icanirenitohui.

⁷⁸⁻⁷⁹ Dio iadsa huati cahanari canadsa ia Tonassiajade iadsa dosse inaronabote nahi. Najaripa madija inassiajabaqquihitohui.

Dio tedseje icajoneranijinecca ima naqui ia tonahatabaqquihitohui.

Ia Tonassiajadepa pina dsidsidsamassa maji cca-jonadsa ssire najonajarissa najari. Ssiajani dsati iadsa bacco najaro.

Madija dsidsinidsa madiridsamanajaridenipa dsoqqehe noppineni cappinamanaraha ssiajani dsati pohuadenidsa tossiajaridsadsapi memehuajicca jahui ahuato inanajaro –najari Sacaria atti.

⁸⁰ Nadsama Sacariacca ejedeni Huanopa Diocca dacorehema napidsanapojari. Diotohui dissera taja najari. Dsotode denima napidsapa dsama huamoni ssono caji, siba caji tanihuaji

madidsanapojari. Nadsapa Dio Pohua jipa tahicca huada bacco tadsa Isaraeri potemahideni mari icanabaqquihijine Huano dosse inajari.

2

Jeso tossonahicca ima

Mateo 1.18-25

¹ Jeso tossona-jaraccadsapa dsama huapimacca imapi ajima najaro: Tahidepa romanodenicca tamine deni tojahicca onipa Acosto pohua bodipa: —¿Nejecoma naha madija madimanahi occa cacahuehedsa? —nadsa madija onideni huapima dsodo naridsamanahijine pocca dosseniji ccaridsajaro. ² Nadsapa Acostojine dsama huapimacca madija onideni dsodode tahidecca dsodo quinajari. Najari huanodsa pohua biji accode onipa Quirinio dsama Siriahuaji cacahuade tojajari. ³ Nadsama madija huapima dsama onihi onihidsa mamadimanageri naridsamanaraha birididenicca dsamadsa jai tojaniridsajari. Isaraeri potemahideni naco birididenicca dsamadsana pohuadeni oni dsodo quinahijine jai tojaniridsajari. ⁴ Nadsapa Dsodse. Pohua naco dsama arobeni Carireahuajicca odsa panani onini Nasaretidsa madiraha biridi tamine Dabi madipohuicca odsa panani Berenehuajina toccanijari, pohua oni dsodo nahijine. Berenepi dsama arobeni Jodeacca. ⁵ Nadsama Dsodsepa Maria tadsajani Berenehuaji tohuedajari. Mariapi Dsodse pohuadsa da quinara ponidsa huada huada najaracchi. Poni idsonidsa ejedeni huittidsaja najari. ⁶⁻⁷ Nadsapa Berenehuaji bacco toquinaraha odsa ijiridsajaro.

Madija huapima tahide bacco toquinapoja najari. Odsa ijiridsadsapi Dsodse pocca amoneje tadsajanipa bohuicca huahuadadsa madimanageri. Nahidsa madimanadsana Mariacca ejedeni comajari. Poni bedi tahidecca tossonajari. Nadsapa etero dsojoranidsa teppe inadsa dsero huanarini tetepidsa ibari najari.

Dio Atti ccaccaronadepa edede cacahuadenidsa huati tajari

⁸ Nadsama odsa panani Berene huajira tanidsapa edede cacahuadedeni madimanajari. Pohuadenipa huamonidsa jassi jassi tajari. Dsomepa edede cacahuade noccodeni bibissa najari. ⁹ Nanaja pohuadenidsa Diocca dodosse Pohua Atti ccaccaronade ahuatogari. Dio Pohua ssiejene tossiajabaquidsa cappinamanajari. ¹⁰ Naraha Dio Atti ccaccaronade pohuadenidsa: —Ticappinamana tejeraji. Tiadenidsa ima bicani huati onana -najari. —Huatidsehe imeni madija huapimadsa tojaridsanijine -najari. ¹¹ —Jidapapa tiadeni Tonassiajade tossonahi, tamine Dabicca dsamabote Berenedsa. Pohuapaa Idinide Cristo-Mesia najari. ¹² Nadsama aji occa huatinaja nahatoqquri tiquinanijinepi ajima nani qquri tiquinanitohui. Ejedeni tossonedsatipa etero dsojoranidsa teppe naha dsero huanarinidsa pori canahitohui -najari Dio Atti ccaccaronade. ¹³ Nadsapa ima huati taha jicadsapa Diocca dodosse tabaqqi memehuajicca huapi taha amadsati ahuatomanadsa Diodsa huatidsemanadsa jiri jiri quinaajari:

14 —¡Dio memehuaaji madijaripa bica tahi, deni tojahi!

Namihuaaji Pohuajine huatidsehe cajiridsani. Dio pocca cacatidse tabaqquidsa pocca jonehe tojaridsani –quinajari.

15 Nadsapa Diocca dodosse tabaqqui memehuaaji jai tojamacossanidsapa aja edede cacahuade attidenipa: —¡Jina, Berenehuaaji jaijanina! Ia Medsede iadsa huati tahi qquide jaijanina –quinajari.

16 Nadsapa huassinaja jai tojanidsapa Maria Dsodse tedseje madimanahidsa bacco toquinajari. Nanaja ejedeni pori canajari dsero huanarinidsa. 17 Nadsapa edede cacahuadedeni ejedeni qqui toquinadsapa aja Diocca dodosse attissa nehe qqui toquinajari. Nadsapa Diocca dodosse ejedeni tahimari pohuadenidsa huati tajaricca ima ecomeramanajaro nahicca madijadsa. 18 Nadsapa madija mittamanadsa: —A, nema najaroraha... –quinajari. 19 Naraha Mariapi ponicca ejedenicca ima Dio ponidsa huati tapojari poni bodinidsa huatini ajima nejerajaro. Edede cacahuadedeni ponicca ejedeni tahimari huati toquinadsa naco najaro ima poni bodinidsa huatini ajima nejerajaro. 20 Nadsapa edede cacahuadedeni huamonihuaaji jai tojanidsapa Diodsa tohuatidsenimanajari: —¡Abi Dio bica tinani! Tijine ia Idinide tahimari imittadsapi iadsa bica tani. Ia Idinide tossonahi qqui inadsa naco etidseni –tanimanajari. Imapi pina Diocca dodosse huati tapojarissa nehe tojadsapi tohuatidsenimanajari.

Imehi, imeni tadsajani Diodsa dada toqquimahuaji Jeso dsojo idsimamanajari

²¹ Ejedeni huadari 8 nadsapa jodiodenicca huissinaja cajijari. Nadsapa pohua oni naco icanacanimanajari: Jeso, quinajari. Najari onipa Maria jia-jeraccadsa Diocca dodosse ponidsa huati tapojari.

²²⁻²⁴ Nadsapa Jeso tossonahi natti huada 40 jicani nattinipi Dsodse Maria tadsajani aji Moisesicca marinajassa inanamananijine Jerosarehuaji tohuedajari. Amoneje ejedeni tocassonadsa ama toccajarojine Diodsa bica tejerani, Moisesicca marinajadsa naqui oppina tani, quiquinanajari jodiodeni. Nadsapi ponicca ima Diodsa tobicanijinepi ajima nanina bica tajaro: — Ejedeni tossonahi natti huada 40 jicadsapi imenipi Diodsa dada toqquimahuaji toqquedsimadsa ponicca daniji Diodsa da inahijine -nani nade Dio Atti dsodo nanidsa. Nadsama ponicca daniji Diodsa da inahijinepa ajima nana: — Midsori pamehe amoneje maqqui tedseje dada titiquina nana. Midsori nohueradsapi ococo napidsati pamehe naqui dada titiquina nana -nani nade Dio Atti dsodo nanidsa.

Nadsapa poccadeni ejedeni naco iaccamanajari: —Diodsa da inahijine -quinadsa. Najaro ima naqui Moisesicca marinajadsa dsodo najaro: —Ejedeni maqquideje bedi tossonapajaripa Diocca tojana -nani nade Dio Atti dsodo nanidsa. Nadsapa Dsodse, Maria poccadeni ejedeni Jerosarehuaji dsojo quinajari, Diodsa dada toqquimadedeni qqui toquinadsa Diodsa huati toquinahijine.

²⁵ Nadsama madija oni Simeopa Jerosarehuaji madijari. Puhuapa bica tajari. Diocca dossenijissa inananiijine dissera tajari. Isaraeri potemahideni Idinide ccajonahitohui madijari. Dio Corimepa Simeodsa madijari. ²⁶ Nadsapa pohua bodidsa ima ahuato inanajaro. Najararo imapi: —Tidsoqque-jeraccadsama ia Idinide Cristo-Mesia qqui tinahitohui. Diopa Mesia dosse inaronabote nahi -napojari Simeodsa. ²⁷ Nadsapa Dio Corime pohua icadossedsapa Diodsa dada toqquimahuaji toqquedsimajari. Nahidsa madidsapa Jeso imeni imehi tedseje bacco dsimamanajari. Puhuadenipa pina Diocca dosseniji dsodo naniccassa nehe inanamananiijine Jeso iaqquedsimamanajari. ²⁸ Nadsapa Simeo Jeso qqui tadsapa ididsa, dsojo ijidsadsa Diodsa huatidsejari. Pohua attipa:

²⁹ —Jehe ohua Medsede Dio, jidapanana ohuadsa huati tapojarocca ima bicani tijine pajiranissa tani -najari.

—Jidapapa ajajari ejedeni qqui onahi, najaritohui obodi huahuatoma naccade. Jidapapa Isaraeri potemahideni icca ima tobicanitohui, onajaro.

Nadsama ohuapi jidapanana odsoqquenijine onajorani. Odsosqquedsapi bica tani, onajaro -najari Simeo atti.

³⁰ —Jehe jidapapa ohua onoccodsa qqui onahi ia Idinide.

³¹ Puhuapa tossiejehe jinede, madija huapimacca tojahitohui.

32 Pohnuapa pina ssiajanissa najari. Pohnu ssiejene tossiajabacquidsapi Isaraeri potemahi jodio quejena-jarajaridenidsa Diojine madija tocassiejerahijine tahimarini ahuato inananitohui.

Jehe Abi Dio, ticca madija ia Isaraeri potemahidenipi iadsa madija huapima attidenipa: “Ticcadeni dsamadsa ia Idinide tossonadsapa Diojine tiadenidsa ima bicani tojani” quiquinanahitohui –najari Simeo.

33 Nadsapa Dsodse bedimeni tadsajani Simeo atti mittamanadsapa jabojo quinajari. Nadsapa pohnuadeni attipa: —A, icca ejedeni tahimari nahato taha –quinajari bedimeni tadsajani.

34 Naraha Simeopa pohnuadenidsa denima huati huati tajari: —Diocca biquehe tiadenidsa tojadsanapona, onajaro –najari. Nadsama Maria ponidsa naco huati huati tajari Simeo: —Diopa ajajari ejedeni dosse inaronajari, Isaraeri potemahideni icanaroberidsa-bacquihijine. Mota huapi taha pohnuadsa jiperaquuri nadsa Dio pohnuadeni ettajobacquidsapa ocasserani ahuamanahitohui. Naraha pohnuadsa jipaquuri najaridenipa nidsa dsotodepa ima bicani cajimanahitohui, Diodsa madimandasanapohuijine. Jehe, ajajari ejedenipa Isaraerideni inassiajabacquihijine Dio dosse inaronaraha madija motapa pohnuadsa jara jara quiquinanahitohui. Pocca marinajadsa naco huattajojo tahitohui. 35 Nama quinadsapa madija bodideni huatohue ahuato tajaro. Madija mota attidenipa: “Diodsapi jipaquuri inajaro” quiquinanaraha pohnuadenipa Jesodsa

jiperaqquri nadsapa pohuadeni atti pina maidsehessa nani. Diodsa jipaqquiri najaripa pajissa jerani.

—Nadsama Maria, ticca ejedenicca imapi tiadsa ocassera tehe tojanitohui. Pina huahua-jinadsa tibonoccori pora tocaniqqumajarossa nanitohui –najari Simeo atti.

³⁶ Naraha nani Diodsa dada toqqumahuaji naqui amoneje jadani madijaro. Poni oninipi Ana. Ponipi Dio Atti ehecomera najaro. Imehi onipa Panohue. Najaripa idi Asera potemahi. Ponipi jadani tocajani. Dsohuatoponipi maqquideje cajiraha huajano 7 nadsapa maqqui dsoqquejari. ³⁷ Nahi maqqui dsoqqued-sama tabira madijonajaroa huajanorini 84 bacco tajaripaja. Ponipi Diodsa dada toqqumahuaji madijaro. Amossinihuaji totoqquena nejerani. Ponipi ssiajabote dsome naqui Diotohui nadsapi dissera tajaro. Jipehe naqui huajijiradsa nenebocossa najaro. Diodsa naqui huajijiradsa huati huati teteje najaro. ³⁸ Nadsama Maria Dsodsedenihuaji Ana ccajonadsa ejedeni qqui tadsapi huatidsejaro: —Jehe Abi Dio, jidapanana ticca dosseniji bica tahi qqui onajari, ia Idinide tojahijine –najaro Ana. Nadsapi madija huapimadsa pocca ima huati huati tajaro: —Jidapanana Jerosarecca madija aji ia Isaraeri potemahi iquejenajaro huapimadsa ia Idinide Cristo-Mesia bacco najonahi. Nidsa ia todini-baqquihitohui –najaro Ana attini.

Nasaretihuaji Jeso iaccanimanajari

³⁹ Nadsapa Dsodse Maria tadsajani ejedeni tossonedSATICCA ima aji Diocca dosseniji dsodo najarossa inanamanehe jicadsapi Carireahuaji jai tojanijari, nahi poccadeni odsa Nasaretidsa tomadinimanahijine. ⁴⁰ Nahidsa madimanadsapa Jeso napidsanapojari. Pohua bodi naco tohuatta-dsanapojari. Dio naco Jeso icatidseri najari.

Jesopa Diodsa dada toqqimahuaji mamaridenicca ima ecomerajaro

⁴¹ Nadsama jodiidenicca ejete imenibote bacco tajaro, oninipi Pascoa (Ettidsapi: Dio tossoniqqumajari, inajaro.) Jeso imehi imeni tadsajanipa ejete tohuajiradsa totohueda najari Jerosarehuaji. Nama dsanapomanajari huajano huajijiradsa. ⁴² Nadsama Jeso huajanori 12 cajidsapa pahuadenidsa Jerosarehuaji toccajari. Pina huajano huajijiradsa nama dsanapomanajarissa inanamanajaro. ⁴³ Odsa panani Jerosaredsa bacco toquinadsapa ejete qquide madimanaccajari. Ejete jicadsa Jeso imehideni huedaniraha Jesopa Jerosaredsa ibojari. Naraha Maria maqqui Dsodse tedsejepa bedidenitohui huatideni huatojarajari. ⁴⁴ Pahuadeni attipa: —Madija siba tajaria, pohua tessedsa ccanihitide -quinajari. Naraha cahadijacossahidsa poccadeni ejedenitohui qquiqquihihi naridsajari. Madija pahuadsa noccodeni jidsera tajaridsa, pohua imecotedenidsa naco huati naridsamanajari. ⁴⁵ Naraha bacco quina-jaradsapa Jerosarehuaji tohuedanipomajari. ⁴⁶ Nadsapa pahuatohui qqui

naridsamana-pomajari. Huada huatinimade tojari nadsana Diodsa dada toqquimahujina Jeso bacco quinajari. Mamaridedenidsama pohua naco huittari canajari. Jeso pohua naco mamaridedeni imahaha canahidsa taharibo canajari. Pohua naco pohuadenidsa huati huati tajari, poccadeni huatinaja ecomerajaro. ⁴⁷ Nadsapa huapima Jeso atti mittamanadsapa: —A, nahato tahi —quinajari. —Huati huati tahi imari bica taha —quinajari. ⁴⁸ Nadsa imehi imeni tadsajani qqui toquinadsapa jabojo manadsa: —A, ajadsana quejemajariraha —quinajari. Naneje imeni attinipi: —Ato ¿nejecotohui iadsa huatirani tibojarotte? Iapi amossi tajaro nitidija inadsa icappinadsa titohui qquiqquihhi inaridsajaro —najaro. ⁴⁹ Naraha pohua attipa: —¿Nejecotohui otohuira ticadaridsajaro? Ohuadsa ssamomo tinaccajaro nitide. Ohuapi occa Abicca odsadsa odsepe ijijaro —najari Jeso. ⁵⁰ Naraha huati tahi mittamanaraha Jeso pocca ima mittamana-jaraccajari.

⁵¹ Nadsapa pohuadenidsa toccanijari, poccadeni odsa Nasareti bacco tanimanajari. Imehideni attidsa ibora tajari. Mariapi pocca dacorehe qqui qqui tadsapi poni bodini nahato tajaro. Pohua tahimari huatini ajima nejerajaro. ⁵² Jesopa tohuattaja dsanapohui najari. Denima napi dsanapojari. Dio naco icatidseri dsanapojari. Madija naco icatidsemaneri dsanapojari.

3

Huano Baotistapa dsama huamonihuaji

*madija mari icanabaquijari**Mateo 3.1-12; Maraco 1.1-8; Huano 1.19-28*

¹ Sacariacca ejedeni Huanopa Dio pohua cadossejaridsa dsepe ijibote nadsa dsama cacahuadedeni ajama quinajari: Odsa panani Romahuaji madimanajaridenicca tamine deni tojahicca onipa Tiberio. Pohuapa dsama huapima ecahuaridsajaro. Pocca cacahuehepi huajano 15 bacco tajari. Pocca dossenijidsapa madija ohuaha, madija ohuaha tamine toquejenaridsajari. Nadsama najaridenipa pocca dossenijidsa dsama cacahuade madiridsamanajari. Isaraeri potemahi jodiodeni madimanahicca dsama oninipi Jodea. Nahicca taminepa Ponsio-Pirato. Isaraeri potemahi mota madimanahicca dsama oninipi Carirea. Nahicca taminepa Herode. Herode pohua ohuaha Feripepa dsama onini Itorea ecahuajaro. Itorea inorinicca naqui ecahuajaro. Najaro dsama oninipi Taraconite. Itorea inorini onihihuaajicca dsama oninipi Abirinia. Nahicca taminepa Risania.

² Nadsama odsa panani Jerosarehuaji dada toqquimadedenicca tamine deni toquejenahi pamaha madimanajari. Onidenipa: Anasa, Caipa, quinajari.

Jehe, najarideni taminedeni toquejenaridsadsa najari huajanodsa Sacariacca ejedeni Huanopa dsama todidi tanidsa madijari. Nanihuaajipi dsama huamoni ponira, ssono caji, siba caji tani. Nahihuaaji madidsapa Dio pocca dosseniji Huanodsa huati tajari. ³ Nadsapa hueni Jor-dao inidicca dsama huapima ccaridsadsa madija

maride tojajari. Pohua attipa: —¡Ticcadeni imasiri tineboridsamanaji! —nanaridsa najari. —Tibodideni ajima tiquinaji: “Occa imasiri onebona. Jidapapi Diotohuira odsanapona” tiquinaji. Nadsana totopa ticajiridsamanaji. Nema tiquinadsapi Dio ticcadeni imasiridsa: “Epeje, ohuati ajimani” nahijine —najari Huano. (Pohuadsa: Baotista, quiquinanajari. Ettidsapi: Totopade, inajaro.) ⁴ Nadsama Huanocca imapi maittaccadsama Dio Atti cacomerabote Isahia dsodo inapojaro. Pohua atti ajama napojari:

—Nidsa dsama huamoni ssono caji, siba caji tanihuaji madijaripa atti mohui tadsa madija huahua huahua ihinajonabaqqui nahitohui.

Pohua attipa: “¡Ia Medsede ccajonabote nahi! ¡Tinajoramanaji! ¡Pohua tedsejema jahui tijinedeni tobicapoji!

Najaroa aji tibodideni pohuatohui tinajoramanaji” nanaja nahitohui —napohui nade Dio.

⁵ —Pohua atti naco: “Nami totodohuedseri najaro tijinedeni ijiridsaji, onajaro. Ssono quequehemeri najaro ponanissa tanijine hui tiquinapoji.

Jahui johuidso tajaro naqui tijinedeni borocco tapoji. Jahui ccababa tajaro naqui tijinedeni huire tapoji.

Aji tibodideni naqui pina najarossa tinamanapoji. Ia Medsedetohui tinajoramanaponijine ticcadeni ima tinanabicanapoji, tibodideni tinahireridsamanaji.

⁶ Jehe, ia Medsedetohui tinajoramanadsa pohua ccajonadsapa pohuajine madija huapi-madsa Diocca daniji tossiejehecca ahuato tanijine”

nanaja nahitohui dsama huamonihuaji madi-jaripa –napohui nade Dio Atti Isahiajine dsodo nanidsa.

⁷ Nadsapa madija huapi taha totopa tohui quinadsa Huano madihihuaji jahijonana canajari. Naraha Huanopa pohuadenidsa huati tajari: —¡Tiadenipi pina maccassa tiquinani, ticcadeni imapi tabaccora tajaro! Tiadenipi tibodideni cacajiqquimera-jeraraha: “Huano ia topa todsanabaqquidsapa Diocca najidsohuedsa dsori icanirenitohui” ¿tiquinajaroqui? Naraha tibodideni cacajiqquimera-jeradsapi dsori ticanire-jeranitohui. ⁸ Naraha tettideni ajima tiquinadsana bica tani: “Imasiri onebona. Diotohuira obodi huahuatoma nanijine” tiquinadsapi tibodideni cacajiqquimeranicca ima ahuato tanijine ima bicanira tinanamanaji, onajaro –najari Huano. —Naraha tibodidenidsa ajima tiquinanitime: “Icca idipa Abarahaoja najari, Diopa ia tohuattajobaqqui-jarahitohui” titiquina naraha tiadeni ticamaidsanimanajaro. Diopa madijassa najarahi. Pohua jipa tadsapa aji siba huihutteri naridsajarodsa naco Diopa Abarahao potemahissa naha inahatoridsahijine pajirajari. Paji tiadenipi: “Abarahao potemahi iquejenani” tiquinaraha Diodsa iboraqquri tiquinejeradsapi tiadeni tohuattajo-baqquihitohui. ⁹ Nadsapi Diodsa iboraqquri tiquinejeradsa, ima bicani tinanamana-jeradsa naqui ticcadeni imapi pina

ahua tabaccora tajaricca imassa najaro. Paji, najari ahua cacajine dsamipa najorahi. Ahua bono bica tajaradsapa ca tacaridsa tahi. Ca tacaridsadsapa bobottahuaji hua hua totodsima najari, diji tahijine -najari Huano.

¹⁰ Nadsapa madija attidenia: —Nadsapi iaha ¿nejecoma inanijine, ibodi cacajiqquimeranicca ima ahuato tanijine? -quinajari Huanodsa. ¹¹ Naraha Huanopa: —Jehe, tiadenipi etero tetepicca pamehe ticajimanadsapi aja madija etero tetepicca cappirajaridsa ojarie da tiquinaji. Nadsama dsamatapa ticajimanadsa naqui madija dsamatapa cappirajaridsa da tiquinajo -najari Huano atti.

¹² Naraha nahidsa naco madija jahijonajari, aja romanodenicca taminecca dosseniji dsiniro nanaccadedeni. Pohuadenipa: —Huano ia topa todsanabaqquina -quinadsa jahijonajari. Huanocca marinaja mittamanadsapa Huanodsa huati toquinajari: —Mamaride, ia naqui ¿nejecoma inanijine, ibodi cacajiqquimeranicca ima ahuato tanijine? -quinajari. ¹³ Naraha Huanopa: —Jehe, tiadeni naqui aji dsiniro tinacamanadsapi pina taminecca imassa nehera titinaccamana naji, onajaro. Denimapi poni -najari Huano.

¹⁴ Naraha nahidsa soldadodeni naco totopatohui jahijonajari. Huanocca marinaja mittamanadsapa Huanodsa huati toquinajari: —Iaha ¿nejecoma inanijine, ibodi cacajiqquimeranicca ima ahuato tanijine? -quinajari. Naraha Huanopa: —Tiadeni naqui madija pohuadeni dsepedenitajitohui, poccadeni

dsinirotohui naqui jabojo tinanabaqquimana-
 jarajo, onajaro -najari Huano soldadodenidsa.
 —Nadsama madija ima cappiraraha pocca
 dsinirotohui pahuadsa ima tinanamanajaro.
 Naraha tiadenipi nema tiquinejeraji. Ticcadeni
 cacahuehe manaconi tamine tiadenidsa
 dsiniro da inajarora epejena. “Najarodsara
 imadina” tiquinaji, onajaro -najari Huano
 soldadodenidsa.

¹⁵ Isaraeri potemahidenipa ia Idinide
 Cristo-Mesiatohui madimana-dsanaponaja
 Huanocca marinaja mittamanadsapa pahuadeni
 bodidsa: —¿Huanopa Cristo-Mesiaco?
 -quinajari. ¹⁶ Naraha Huanopa pohua
 cacomerajari: —Ohuapi passodsas tiadeni
 topa odsanabaqquijaro. Naraha madija
 dacorajari ccajonabote nahi. Ohuapi
 tahide mari mari onaporaha aja dsotodecca
 mamaride ccajonajarina deni tojajari.
 Najarina Dio Corime tibodidenidsa madihijine
 tiadenidsa inanaridsahitohui. Puhuapa
 pahuadsa toquejena-jarajaridenipa jororoni
 jiquejeranihuaji hua idsimabaqquihijine
 pajirajari. Ohuapi ajimani ojani. Pina pocca
 medsessa onanijinepi opajira-jerani. Puhua
 amoricca sadaria diccade naqui opajira-jerani
 -najari Huano. ¹⁷ —Jehe, ccajonabote najaripa
 madija icattejidsa-baqquihijine. Pina madija
 aroso jidsadsa trigo huire tahijine qquero quissa,
 qquero quissa, qquero quissa inamacossajarissa
 nahitohui. Trigo etero, eppe, ede najaripa
 jojodedsa toccadsapa noccona ecahuajari
 pocca odsahuaji. Naraha trigo etero, eppe,

ede najaripa diji tahijine bobottahuaji hua idsimahitohui. Najaria aja Diodsa iboraqquiri najarajaridenipa jororoni jiquejeranihuaji hua idsimabaqquihitohui. Najaro jororonipi ohuihuira tani -najari Huano.

¹⁸ Jehe, Huanopa madija Diotohui bodideni huatoma-manahissa tahijine mari icanabaqquija najonapohui najari. Poccadeni imasiri nebo-manahijine mari mari ihicanabaqqui najari. Pokuadeni bodi acco acco ihicamabaqqui najari. Pocca marinaja ajima najonajaro: —Ia Idinide ccajonabote nahi. Diocca cacahuehecca ima bicani tojabote nani -nanaridsa najari.

¹⁹ Huanopa tamine Herode naco pocca imasiri nebohujine mari mari ihicana najari. Herodecca imapi tabaccora tajaro. Pohua imecote Feripecca amoneje onini Herodia idijidsadsa pocca amoneje tojajaro. Nadsapa Herodecca ima bica tejeradsa Huanopa Herode mittahijine pohuadsa huati huati tataja naraha Herode pocca imadsa dissera tajari. ²⁰ Pohuapa imasiri sse tapoja naraha ima denima tabaccora tanicca inanajaro. Najaria Huano toponi cocoro todsimadsa coro idsimajaripaja.

Jeso totopa cajjaricca ima

Mateo 3.13-17; Maraco 1.9-11

²¹ Ajijaro imapi Huano coro todsimajaraccadsa madija topa idsanaridsabaqquipodsapa Jeso naco topa idsanajari. Nahidsa Jeso Diodsa huatide tojadsapa meme naqui tohuaba najaro. ²² Nahidsapa Dio Corime ccaronajari. Ahuato taha pina midsorissa naha

Jesohuaji ccaronajari. Bacco naronadsapa memehuaji atti mittaronajari: —Tiapi occa ejedeni. Tiadsa ohuati huana tajaro. Ticca ima bica tajarojine ohuatidsejaro –najari Dio.

Jeso biridi onideni

Mateo 1.1-17

²³ Jesocca huajano 30 nadsana madija maride tojaridsapojari. Nahihuajicca madija pohua tossonahi tahimari ssamoqquiri nadsapa pohuadsa: Dsodsecca ejedeni, quiquinanajari.

Nadsama Dsodsecca abipa Eri,

²⁴ Ericca abipa Matata,

Matatacca abipa Rebi,

Rebicca abipa Meriqui,

Meriquicca abipa Janai,

Janaicca abipa Jose,

²⁵ Josecca abipa Matatia,

Matatiacca abipa Amosi,

Amosicca abipa Nahomo,

Nahomocca abipa Esri,

Esricca abipa Nacai,

²⁶ Nacaicca abipa Mahata,

Mahatacca abipa Matatia,

Matatiacca abipa Semehi,

Semehicca abipa Joseca,

Josecacca abipa Joida,

²⁷ Joidacca abipa Joana,

Joanacca abipa Resa,

Resacca abipa Sorobabeo,

Sorobabeocca abipa Saratieo,

Saratieocca abipa Neri,

²⁸ Nericca abipa Meriqui,

Meriquicca abipa Adi,
Adicca abipa Cosama,
Cosamacca abipa Eromodama,
Eromodamacca abipa Eri,
²⁹ Ericca abipa Josohue,
Josohuecca abipa Eriesa,
Eriesacca abipa Jorimi,
Jorimicca abipa Matata,
³⁰ Matatacca abipa Rebi,
Rebicca abipa Simeo,
Simeocca abipa Joda,
Jodacca abipa Jose,
Josecca abipa Jonao,
Jonaocca abipa Eriaquio,
³¹ Eriaquiocca abipa Merea,
Mereacca abipa Mena,
Menacca abipa Matata,
Matatacca abipa Natana,
³² Natanacca abipa Dabi,
Dabicca abipa Dsesse-Isahi,
Dsessecca abipa Obede,
Obedecca abipa Bohodsi,
Bohodsicca abipa Sera,
Seracca abipa Nahasao,
³³ Nahasaocca abipa Aminadabe,
Aminadabecca abipa Adami,
Adamicca abipa Arani,
Aranicca abipa Esero,
Eserocca abipa Pare,
Parecca abipa Joda,
³⁴ Jodacca abipa Jacobo,
Jacobocca abipa Isahaca,
Isahacacca abipa Abarahao,

Abarahaocca abipa Tera,
 Teracca abipa Nacoro,
³⁵ Nacorocca abipa Seroco,
 Serococca abipa Racao,
 Racaocca abipa Pereque,
 Perequecca abipa Ebere,
 Eberecca abipa Sera,
³⁶ Seracca abipa Cainana,
 Cainanacca abipa Arapacade,
 Arapacadecca abipa Seme,
 Semecca abipa Nohue,
 Nohuecca abipa Rameque,
³⁷ Ramequecca abipa Matosare,
 Matosarecca abipa Enoco,
 Enococca abipa Jarede,
 Jaredecca abipa Maharareo,
 Maharareocca abipa Caino,
³⁸ Cainocca abipa Enoso,
 Enosocca abipa Sete,
 Setecca abipa Adana,
 Adanacca abipa Dio.

4

Jeso imasiri inananijine Satana nattome inaraha jehe najarajari

Mateo 4.1-11; Maraco 1.12-13

¹ Huano Jeso topa idsanaha jicadsapa Jeso bodidsa Dio Corime tojahissa tajari. Hueni Jordaohuaji qquemoranidsapa Dio Corime Jeso iaccajari, dsama huamoni ssono caji, siba caji tanihuaji madihijine. ² Nahihuaji bacco tadsapa huada 40 naha madijari. Nahidsa naco imasiri

totonanade Satanapa Jeso nattome inajari. Po-
huapa Jeso imasiri inananiijine dissera tajari.
Nadsapa Jeso jiperahi huadari 40 naha madid-
sapa pemihissa tajari.

³ Nadsapa Satana Jesodsa huati tajari: —
Dio Bedi tijadsapi, jari, tijipanijine ajijaro
siba dsamatapa tojanijine huati tinaji –najari.

⁴ Naraha manaco Jeso Satanadsa huati tajari: —
Dio Atti dsodo nanidsapi ajima najaro: “Dsamat-
apadsara imadini ojari-jerani” –najari Jeso.

⁵ Nahi dsotode imasiri totonanade Satanapa
ssonon imeni huaji tani tetepihuaji Jeso iaqqe-
moradsapa dsama huapima pohuadsa ahuato
inanaridsajaro. Satanapa amadsati Jeso dsama
huapima dsopi icanaridsajari. ⁶ Nadsapa Satana
Jesodsa huati tajari: —¡Qqui taneje! Ajijaro
dsama huapimapi tiadsa da onanijine. Tiana
najaro dsama huapimacca dosse dosse tani-
jine. Najaro huapimacca biquehe naqui tiadsa
onananiijine. Ajijaro dsama huapimapi occa
tojajarode. Nema nadsapi ohua jipa onajarodsa
da onanijine bica tani. ⁷ Jehe, tipitodsa tittadsa
ohuadsa tetidsedsa: “Occa tamine” taji. Ohuadsa
nema tadsapi ajijaro huapimapi ticca tojanijine,
onajaro –najari Satana atti. ⁸ Naraha manaco
Jeso Satanadsa huati tajari: —Dio Atti dsodo
nanidsapi ajima najaro: “Ia Medsede Dio Po-
huadsara tetidsemanani ojari dsanapoji. Pohua
Attidsara iboraqquri tiquinaji” nani Dio Attipi
–najari Jeso.

⁹ Nahi dsotodepa Satana Jeso odsa panani
Jerosarehuaji iaccajari. Nanicca Diodsa dada

toqquima tetepihuaji inanajari. Nahidsa Satana Jesodsa huati tapomajari: —Jari, tiapi Dio Bedi tijadsapi joppa tinaronaneje, nami-huaji tissona-jeranitohui -najari. ¹⁰ —Dio Atti dsodo nanidsapi ajima najaro: “Diopa pocca dodosse tabaqquidsa huati tahitohui, tia ecahuananijine. ¹¹ Pohuadeni bijidsa tia dama iid-samanadsapi temori naqui sibadsa cabiquera-jeranitohui” nani Dio Atti dsodo nanipi -najari Satana Jesodsa. ¹² Naraha manaco Jeso huati tapomajari: —Jehe, Dio Atti dsodo nani nema naraha Pohua Atti dsodo nani onihipi ajima najaro: “Ia Medsede ticca Dio nattome tajarajo. Tettidsa: ‘Dio ohuacatamana’ tejeraji” nani Dio Attipi -najari Jeso.

¹³ Ima onihidsa ima onihidsa Satana Jeso icamaidsaridsaraha Jesopa Diodsa ibora tahissa tadsapa imasiri inaneje cama-jerajaro. Nadsapa Satana maidsehe onihi bodi huatoma-jaradsapa toccanijari. Toccaniraha dsotode Jeso icamaidsapomahijine madijari.

Jeso Carireahuaji maride tojapojari
Mateo 4.12-17; Maraco 1.14-15

¹⁴ Jesopa dsama arobeni onini Carireahuaji Dio Corimecca dacorehema ccanijari. Nadsapa nahi-huajicca madija huapima Jeso tahimari huati naridsamanajari. ¹⁵ Odsa onihi onihi narid-sanihuaji ccaridsadsapa poccadeni Dio Atti mamarihuaji mari mari ihicanaridsabaqqi najari. Madija huapima attidenipa: —Jehe, Jesopa bica tahi -nanaridsamana najari.

*Jesopa Nasaretihuaji toccanidsa mari ican-
abaqqujari*

Mateo 13.53-58; Maraco 6.1-6

¹⁶ Jesopa pohua napihi odsa panani Nasareti-
huaji ccanijari. Nahidsa madinidsapa jassina-
jacca huada bacco tadsa jodiodenicca Dio Atti
mamarihuaji toqquedsimajari. Pohuapa odsa
huapimadsa nama nanaridsa najari. Nadsapa
nahidsa queriqquimanadsapa pohuana totehe-
majari, Dio Atti hua inanijine. ¹⁷ Nahicca Dio
Atti mamari cacahuadena pohuadsa Dio Atti
dsodo nani da inajaro. Jeso najaro papeo pico
naquuni tappa-ppa inadsa Dio Atti cacomer-
abote Isahiacca dsodoniji bacco inajaro. Na-
jaroa Cristo-Mesia madija Idinide ccajonahitohui
quiquinanajari tahimaripa ajiaropaji:

¹⁸ —Ia Medsede Dio, Pohua Corime ohuadsa
tojadsapa pocca dacorehe ocacijaro.

Diopa ohua tocattejidsajari, madija tohuati na-
hanaqquri najaridenidsa

ima bicani icassiejeranijinecca huati huati onar-
idsadsapi ima mimittamana nahijine.

Nadsapa pohuadeni bodidenipa: “Occa imasiri
ohuadsa ocassera tani” quinadsapa onabi-
cabaqquihijine, onajaro.

Dio ohua cadossedsapa aja madija cahacos-
samanajaridenipa oneqquenabaqquihitohui.

Aja imasiri jinede Satanajine madijapa pina
cahacossamanajarissa quinaraha

poccadeni imasiri epeje onanadsapi pina ojine
jahininejarissa nahitohui.

Aja madija noccodeni siri naco noccodeni ssire onanabaqquihijine.

Aja madija dsidsinidsa madiridsamanajarideni naco imasiri jinede Satanacca maidsanijidsa jehe quinaporaha

ossiejene pohnadenidsa bacco tadsapi pohnadeni bodideni ssire onanabaqquidsa ohuadsana jehe quinahijine, onajaro.

Madija nanajidso toquejenajarideni naco odinibaqquihitohui, onajaro.

¹⁹ Diopa ohua cadossedsa huati onaridsajaro.

Jidapapi madijadsa ia Medsede Diocca ima bicani najorajaro.

Madija tocassiejerahijinepa najorani

-nani Isahiacca dsodoniji Jeso hua inajaro.

²⁰ Nadsapa Jeso papeo pico naqquni pico inanidsapi Dio Atti mamari cacahuadedsa da inanijaro. Nadsapa Jeso pohnadeni bacchohuaji huittarijari. Nadsapa jassi dsajarideni huapima Jeso icattaqquimanadsapa pohnadeni mari icanabaqquijari. ²¹ Nadsapa Jeso huati tajari: —Dio Atti dsodo nani aji hua onajarocca ima Cristo-Mesia ccajonahitohui nanaja najaripa jidapana tiadenidsa madijaripaja -najari Jeso pohua tahimari huati huati tadsa.

²² Nadsapa madija huapima attidenipa: —A, pohua attipa bica taha -quinajari. —Naraha pohnuapa Dsodse bedia -quinajari.

²³ Naraha Jeso huati tapomajari: —Maittaccadsama icca ididenipa ajama quiquinanade: “Toponi totonanomide tijadsapi tia tinanomiji” quiquinanajari. Nadsama tiadeni naqui ocanahatori canani qqui tiquinanijine

tohuini tiquinadsapi ohuadsa tettideni nema tiquinanitidija -najari. —Aji odsa panani Capernaohuaji ocanahatori canani ima timittamanadsapi tettideni: “Aji ticca dsamadsa naqui najarossa tinanaji” tiquinajaro nitide -najari Jeso.

²⁴ Nadsapa denima huati dsanapojari: — Pajissara tiadenidsa huati onajaro: Maittaccadsamacca imapi ajima najonajaro: Dio Atti cacomerabote pocca dsamadsa bacco nanidsa naco pocca madijapa pohua attidsa jiperaqquri najari. Pina jidapana tiadeni naqui ohua aji occa dsamahuaji bacco onanijaroraha ohuadsa pajissa tiquinejerani. ²⁵ Nadsama pajissara tiadenidsa huati onajaro: Maittaccadsama naco icca idideni Isaraeri potemahidenipa Diodsa jehe quinahissa tajaradsa Diopa dsama onihicca madijadsana canahatori canajari. Aja Dio Atti cacomerabote Eria madiccadsapa huajano huatimade tojari abadsico 6 canaha passo qquejerajaro. Nadsapi madija huapimadsa pemi tojaridsajaro. Ia Isaraeri potemahi jodio-deni iquejenajaro icca dsamadsa naqui amoneje maqquirinideni jicamanaja najonapohui najarodeni huapi tajaro. ²⁶ Naraha najarodeni huapimapi Eria acco icamabaqquinijine Dio dosse inajarajari. Dsama onihihuajina Dio Eria dosse inajari. Odsa pamema najaro oninipi Sarepetahuajina toccajari. Sarepetapi odsa panani Sido huajira tanidsa odsa tojajaro. Nanicca amoneje jodio jerajaro maqqi dsoqquejarina acco icamajaro. ²⁷ Ajijaro ima naqui nahatoqquri tiquinani. Maittaccadsama Dio

Atti cacomerabote Eriseo madipodsa naco ia Isaraeri potemahi jodiodeni iquejenajaro icca dsamadsa dsamacoma onini leprajine huapideni jadsimarojarideni huapi tajari. Naraha ojaria jodio jarajari oni Nahamapa dsama Siriahuajicca madijaraha Eriseodsa ccajonadsapa pohuana tonomihi ojarijari –najari Jeso pohuadenidsa.

²⁸ Naraha jodiodenipa aja Dio Atti mamaridsa jassi tarijari huapima Jesodsa huadimanajari. Jesocca marinajapi: —Dsama onihicca madija jodio quejena-jararaha Diopa najarideni naco acco icamabaqquijari –nadsapa huadimanageri. ²⁹ Nadsapa najarideni huapima Jesodsa huadimanadsapa mohua ininemanadsa iaqque-namanajari. Poccadeni odsa panani Nasareti denihuaji iaqqueqquima-manajari. Nasaretipi ssonodsa odsa tojajaro. Nani ssono memed-saranihuaji iaqquemoramanajari, coro inaronamanahijine. ³⁰ Naraha Jesopa pohuadeni jai tojahi nocconidsa tohuanajari. Cojojohuaji bacco toquinadsapa: —Jeso coro inaronana –quinaraha madija huapi taraha dsodonijari Jeso. Dsodonidsapa toccanijari.

Satanacca dodosse tocorime madija bodidsa madidsajari

Maraco 1.21-28

³¹ Nadsapa Jeso Capernaohuaji toqquedsippajari. Capernaopi dsama Carireacca odsa panani. Nanidsapi Dio Atti mamari cajimanajari. Nanihuaji poccadeni jassinajacca huadadsa Jesopa madija mari icanabaqquijari. ³² Nadsapa pocca marinaja mittamanadsapa: —A, pocca marinaja

bica taha –quinajari. Puhuapa atti caji tajarijine nama quinajari.

³³ Nadsapa Dio Atti mamarihuaji Jeso mari icanabaqquiraha nahidsapa madija bodidsa Satanacca dodosse tocorime cajijari huittarijari.

³⁴ Nadsapa Jeso qqui tadsapa pohua bodicajine jadsirema atti atti najari: —¡Jaho, Nasaretihua-jicca Jeso! ¿Nejecotohuira ticcajonajaro? ¿Icca ima tinajicanijine ticcajonajaroqui? Ticca ima nahato onani. Tiapi Diocca Ejedeni Bicabote tijani –najari Jesodsa.

³⁵ Naraha joma nahijine Jeso atti dacoradsa huati tajari: —¡Epeje! ¡Didi taji! ¡Najari madijadsa tiqquenaji! –najari. Nanaja tocorimejine madija pina cco inacossajarissa najari. Aja jassi tariridsajarideni baccohuaji tohuedimajari. Nahidsa tohuedimadsapa pohua bodicca qquenajari. Naraha pohua inajidso-jaradsapa inabiquera-jarajari. ³⁶ Nadsapa qqui toquina-jaridenia huajo caniredsapa pohuadenira huati tocanirere canajari: —¿Nejecoma najaro marinaja cajijari? Ajajaripa dacorehe caji, atti caji najaria. Madija bodicca tocorime pohuajine qquenaha –quinajari.

³⁷ Nadsapa Jeso tahimari huati naridsamanadsapa nahi pohuadeni inoricca huajirema nahicca madiridsamanajarideni naco Jeso tahimari mit-taridsamanajari.

*Jesopa Ssino-Pedro massodini inanomijaro
Mateo 8.14-15; Maraco 1.29-31*

³⁸ Nadsapa Jeso aja jodiogenicca Dio Atti mamarihuaji qquenadsa toccajari, Ssinocca

odsahuaji toqquedsimajari. Nanidsapi Ssino massodini coma tajaro, huapini ppocorajaro. Nadsapa Jesodsa huati toquinajari: —Poni tinanomiji -quinajari. ³⁹ Nadsapa Jeso poni icattoma nadsa aji huapini ppocorajarodsa: —Epeje taji -najari. Naneje huapini tonahuihui najaro. Nadsapi amadsati tonomidsa totehemadsapi aja Jeso pocca mamari tabaqqui tedseje inajipabaqqujari.

Jesopa comaqquiri najarideni inanomiridsa-baqqujari

Mateo 8.16-17; Maraco 1.32-34

⁴⁰ Nadsapa maji tonahuidsapa aja comaqquiri najarideni cacahuadedeni Jesohuaji eccajonabaqqujari. Poccadeni dsamacoma comani onihni onihni naridsajaro cajimanadsa Jesohuaji eccajonabaqqujari. Nadsapa comaqquiri najarideni bara inaridsabaqqujari. Ohuaha bara inebo, ohuaha bara inebo naridsadsapa tocanomireridsajari. ⁴¹ Madija bodidenidsa Satanacca dodosse tocorime cajimanajarideni naco Jeso pohnadenidsa huati tadsapa bodidenicca jahininejari. Tocatorimedenia Jesopa madija Idinide Cristo-Mesia pohnadsa nahatoqquri nadsapa johua johua quinajari: —¡Tiapi Dio Bedi tijani! -quinaraha Jesopa pohna tahimari ecomeramananijine jipera tadsapa: —¡Epeje tiquinaji! -nadsa didi inanabaqqujari.

Jesopa Carireahuaji Dio Atti ecomeraridsajaro
Maraco 1.35-39

⁴² Ssiajajonadsa Jesopa nahi odsapa pananidsa toqquenadsapa madija madide nohuerahihuaji

tocajari. Nadsapa madija huapima pohuatohui qqui naridsamanajari. Jeso bacco quinadsapa: —Aji iadsa timadiccaji, odsa onihihuaji tiqquejeraji —quinajari. ⁴³ Naraha pohua attipa: —Ohuapi odsa onihihuaji naqui Diocca cacahuehecca ima bicani mari mari onaridsanijine, onajaro. Nema onanijine occa Abipa ohua cadossejari —najari Jeso.

⁴⁴ Aja pohuapa Isaraeridenicca dsama Jodeahuaji Dio Atti mamari onihi onihi naridsanihuaji mari mari nanaridsa najari.

5

Jeso canahatori canajarijine aba huemahi tojajari

Mateo 4.18-22; Maraco 1.16-20

¹ Jesopa Carireahuaji Dio Atti maride ccaridsadsapa Carireacca coridsa onini onihi Jenesare inidihuaji toqquedsippajari. Nahidsapa madija huapi taha jahijonajari, Dio Atti mittamanahijine. Nahidsana Jeso quebericossabote najari.

² Nadsapa Jeso qqui taneje canoa capamehe ijirani ssiquidsa cacoda najaro. Canoa jinededenipa coridsa inididsa tajapa ssahuade toqquejenajari. ³ Canoa cajariepi Ssinocca. Najarodsa Jeso toqquedsadsa jinededsa huati tajari: —Ssino, madija domo huahi huajiji canadsa mari ocanabaqquihijine ohua dso ticanacossaccaji —najari. Nadsapa Jeso canoadsa huittidsadsapa madija huapima mari icanabaqquijari.

⁴ Nadsapa mari icanabaqquia jicadsapa Ssinodsa huati tajari: —Ticca canoa ajicca coridsa

nocconi dsaja tanihuaji ori ticanamanadsa ticadeni tajapa coro ticadsanamanaji, aba tica-jimananijine -najari Jeso. ⁵ Nadsapa Ssino Jesodsa huati tajari: —Ia Maride, iapi dsome inassiajaraha aba icaji nejerani -najari. — Naraha ia ticadossebaqquidsapi icca tajapa coro icadsippana -najari Ssino.

⁶ Nadsapa coridsa nocconihuaji ori toquinadsa tajapa coro icadsanamanajaro. Joca icanimoramanadsapi aba ijijari. Ccanaja tajarijine tajapapi ojarie tajo tajo teri najaro. ⁷ Nadsapa pohuadeni tesse canoa onihiccatohui dsepedeni huadsa huadsa quinajari, —Ibiji acco tocamabaqquina -quinadsa. Bacco quinadsa joca icadsamanadsapa aba huemaja najari. Canoa capamaraha ijijari. Najari aba qquenejepa je tocanamanabote najari.

⁸ Nadsapa Ssino-Pedro najari aba huemahi qqui tadsapa huajo najari. Nadsapa Ssino Jeso baccohuaji pohua pitodsa huittidsa nadsa huati tajari: —¡Ia Medsede, aji ohuadsapi huaji tinaji! Ohuapi imasiri sse onani -najari. ⁹ Aja aba huemahi qqui toquinadsa Ssinopa cappinajari, pohua tessedeni naco cappinamanajari. ¹⁰ Aja Ssino pohua tesse Sebedeo bedideni Satiaco, Huano quinajarideni naco: —A ¿nejecotohui aba huemajari? -quinajari. Huapima cappinamanaraha Jesopa Ssinodsa huati tajari: —Ticappina tejeraji. Jidapapi madija maride tijana. Tahidepi aba tiadsa tojahijine tidsepe ihiji naccadija naraha jidapapi madija Diodsa toquejenahijine tidsepe ijidsanaponitohui -najari Jeso Ssinodsa.

¹¹ Nadsapa ori nanimanajari. Coridsa inidi bacco nanimanadsa canoapi ssoqueque icad-sanamanajaro. Nadsapa Jesodsa jai tojahijinepa poccadeni canoa, poccadeni tajapa, poccadeni aba, poccadeni madiejine huapima naqui inebo-manadsa Jesodsana jai tojajari.

Huapi jadsimarojari Jeso inanomijari

Mateo 8.1-4; Maraco 1.40-45

¹² Jesopa dsama arobeni Carirea odsa panani onihidsa onihidsa mari mari naridsadsapa madija dsamacoma onini leprajine huapi jadsimaro hi pohuadsa bacco najonajari. Jeso qqui tadsapa pohua bodia: —Jesona deni tojahi, ohuapi ajimani ojani —nadsa Jeso baccohuaji pohua pitodsa huitta nadsa panopi namidsana bacco tajaro. Nadsapa Jesodsa huati tajari: —Ohua Medsedede, ohuapi bica onejeraraha tia jipa tinadsapi ohua tinanabicaniijine nahato tinani —najari.

¹³ Nadsapa Jeso pohua dsepedsa bara inad-sapa: —Jehe, jipa onani. Tibicaji —najari. Nanaja amadsati pohua huapicca tomossissi nadsapa tobicajari. ¹⁴ Nadsapa Jeso pohuadsa huati tajari: —Aji tibicanicca ima madijadenidsa huati taridsa tejerana. Naraha Diodsa dada toqquimahuajina ticcaji, onajaro. Nanidsa tiqquedsimadsapi dada toqquimade ojariadsara tepi tobicani tia nohue tinaji. Nadsapi Diodsa ticca ima bica tejeranicca toppineradsapi ticca daniji Diodsa tojanijine ohuaha ohuaha naha pina edede, ppiriri, oqui najari da da tidsimana.

Pina Moisesicca marinajadsa iboraqquiri inajarossa tinanaji, onajaro. Nadsapi huapimadsa ticca ima toppinerani ahuato tadsapi: “Pajissa tibicajaro” quinahijine –najari Jeso pohuajine huapi tobicajaridsa.

¹⁵ Naraha Jeso pohua tahimaripi ssaja taridsajaro. Najarojine madija huapima Jeso pohua atti mittade jahijonana canajari, madija tocanomirehijine naco jahijonana canajari. ¹⁶ Naraha Jesopa pohua motta madija nohuerahihuaji totocca najari, Diodsa huati huati tahijine.

Jesopa madija ssomi tojahi inabiquemanijari
Mateo 9.1-8; Maraco 2.1-12

¹⁷ Dsotodepa Jeso madija maride tojadsapa jodiodeni mota marinaja pariseodsa jehe quinarideni, jodiodenicca marinaja maridedeni naco mittade jassi tariridsajari. Najaridenipa dsama arobeni Carireahuajicca odsa huapimacca jahijonaridsajari, dsama arobeni Jodeahuajicca odsa huapimacca naco jahijonaridsajari, odsa panani Jerosarecca naco jahijonaridsajari. Nadsama Jeso maride tojadsa, madija inanomibaqquihijine naqui Diocca dacorehepi Jesojine ahuato tajaro. ¹⁸ Nadsapa madija ide tone biqueradsa isso ssomi tojahipa pohua taborodsa poridsa pohua tessedeni dsojo icanajonamanajari. — Jeso baccohuaji porihijine odsa bodihuaji dsojo icadsimana –quinajari. ¹⁹ Naraha madija siba tadsapa dsojo icadsimamanahijine tojera tadsapi odsa tetepihuajina dsojo icanamaromanajari. Odsa tetepini arobenihuaji icatabojidsamanadsapa madija ssomi tojahi pohua taborodsa

poridsa tappa icanaronamanajari. Madija domo huahuajanihi nocconidsa da icanaronamanad-sapa Jeso pohua baccohuaji bacco tocanaronajari. ²⁰ Jeso pohuatohui dissessera tahi qqui tadsapa pohua bodidsa nahato tajari: —Pajissa, Jesopa madija inanomihijine nahato tahi -quinahi Jeso pohuadsa ahuate tadsapi coma tajaridsa huati tajari: —Otesse, aji imasiri tinanajaro huapimapi onanamossini. Jidapana ticca ima Diodsa tobicani -najari Jeso.

²¹ Jeso atti nama nadsapa jodiogenicca marinaja maridedeni, pariseodeni tedseje bodideni huatoma-manadsapa: —Apaja, Jesopa “Imasiri onanamossina” naha. Pohua attipa: “Ohuapi pina Dio ojani” nanaja najarissa naha. ¡Jesocca imapi bica tejerani pina Dio itamassarissa nahi! Naraha Dio Pohuana ojaritari imasiri inanamossinijine -quinajari. ²² Naraha Jesopa pohuadeni bodicca ima nahato tadsapa pohuadenidsa huati tajari: —¿Nejecotohui tibodidenidsa nema tiquinajaro? -najari. ²³ —Jari, tibodideni huatoma-manaji ¿nejecoma najaro imana tiadenidsa denima najora tani? Aja madija coma tajaricca imasiri onanamossini ¿najora taqui? Coma tajari onanabicahina ¿denima najora tajarorane? ²⁴ Naraha aji ohua Madija Bedi ojararopi madijacca imasiri onanamossinijine Diocca dacorehe ocajini nahatoqquiri tiquinanijinepi, aji namidsa naqui ohuatti ocajini nahatoqquiri tiquinanijine coma tajaridsa huati onana -najari Jeso. Nadsapa madija ssomi tojahidsa huati tajari: —Tiadsa huati onadsa: ¡Titehemaji! ¡Titaboro tididsa

ticca odsahuaji ticcaniji! –najari.

²⁵ Nadsapa amadsati totehemadsa... huapima cattomama canaraha pohua taboro idi nadsa pocca odsahuaji toccanijari. Nadsapa Diodsa tohuatidsenidsa jiri jiri tanijari: —¡Diopa bica tahi, bica tahi! –tanijari. ²⁶ Nadsapa madija huapima cappinamanaraha huatidsemanadsapa: —A, ¡Diojine bica tani! –quinajari. —Aji jidapana qqui inajaropi bica tani –quinajari.

Jesopa Rebidsa huahua najaricca ima
Mateo 9.9-13; Maraco 2.13-17

²⁷ Nahi dsotodepa Jeso jahui toccadsa romanodenicca taminecca dosseniji dsiniro nanaccade qqui tajari. Pohua onipa Rebi. (Pohua oni ohuahapa Mateo.) Nahi romanodenidsa dsiniro da tanijine ihinaccamana nanihuajicca odsa bedeni bodidsa huittidsadsapa Jeso pohuadsa huati tajari: —Jina, ohuadsa ticcaji –najari. ²⁸ Nadsapa Rebi pocca tarabajidsa inebo, Jesodsana toccajari.

²⁹ Dsotodepa Rebi Jesodsapa huatidsedsapa: —Ijipacquina –najari. Nadsapa pocca odsahuaji pohua tessedeni Jeso tedseje jipacquimanahijine dsamatapa huemahi najorajari. Queriquimanadsa pohua tesse romanodenicca taminecca dosseniji dsiniro nanaccadedeni, pohua tessedeni tedseje jipacquimanajari. Nahidsa madija ohuahadeni naco Jeso pocca mamari tabaqquma jipamanajari. ³⁰ Naraha nahidsa naco jodiodenicca marinaja pariseodsa jehe quinajarideni, jodiodenicca marinaja maridedeni tedsejepa madija imasiri

cajimanajarideni tedseje Jesodeni jipamanahi qqui toquinajari. Najaro imadsa jiperaqquri nadsapa Jesocca mamari tabaqqidsa atti atti quinajari: —A ¿nejecotohui tiadenipi romanodenicca taminecca dosseniji dsiniro nanaccadedeni tedseje, imasiri cajimanajarideni tedseje tijipamanajaro? —quinajari. (Aja madija nama najarideni tedsejepa jipade oppina tani quiquinanajari.)

³¹ Nadsapa Jeso pohuadenidsa huati tajari: — Ponima pohuadenidsa ojipa-jerajaro. Pohuama otohui huahua quina-jarahi. Nomiqquri najaridenipa toponi totonanomide tohuini quina-jararaha comaqquri najaridenina toponi totonanomide tohuini quiquinanajari —najari. — Ohuapi pina toponi totonanomidessa onajaro. Madijadenicca ima Diodsa tobicanijine pohuadeni accode occajonajarode. ³² Naraha madijapa: “Iapi bicaqquri inani” quiquinanajaridenicca ima onanabicanijine occajona-jerajaro. Imasiri cajimanajaridenicca ima onanabicanijinena occajonajaro. Pohuadeni bodideni acco ocamabaqqidsa: “Imasiri inebona” quinahijine, onajaro. Pohuadeni bodi cacajiqquimeradsapa Diocca ima dsatidsa toquejenahijine, onajaro —najari Jeso.

Jesodsa jipehe nebocossanicca ima huati toquinajari

Mateo 9.14-17; Maraco 2.18-22

³³ Naraha nahicca madijapa Jesodsa huati toquinajari: —Huanocca mamari tabaqqipa jipehe nebocossamanadsapa

Diodsara huati huati dsadsanapomana najari. Jodiodeni marinaja pariseodsa jehe quinajaridenicca mamari tabaqqui naco aja Huanocca mamari tabaqquissa quiquinanajari. Naraha ¿nejecotohui ticca mamari tabaqquia jijipaqquimana najari? –quinajari Jesodsa.

³⁴⁻³⁵ Naraha manaco Jeso pohua cacomerajari: —Aja dsabisso amoneje cajibote najari pocca ejete najoradsa pohua tessedenitohui huahua nadsapa huapima pohuadsa queriqquidsapa najaridenidsa: “Jipehepi tinebocossamanaccaji” ¿tiquinapadseje? Nema tiquinejeranitohui. Pohua tessedenipa pohuadsa huatidsemanadsa jipaqquimanahitohui. Naraha huada onihicadsa dsabisso cajibote najari iaccamanadsapa pohua tessedeni jipehe nebocossamanahitohui –najari Jeso. (Nadsama najaro imapi Jeso aja namihuaji madidsapa pohua tessedeni pohuadsa huatidsemanadsa pohua tedseje jijipaqquimana najaripaja. Naraha dsotode pohua inanadsoque-manadsapa pohua tessedenipa jipehe nebocossamanaccahitohui, najaripaja.)

³⁶ Nadsapa ajijaro namidsa imadinicca ima onihi Jeso pohuadenidsa huati tajari: —Icca etero dsatipi etero jadanidsa podsacossanijinepi beri beri inejerajaro. Icca etero nema inanadsapi icca etero dsati inatabaccorajaro. Najaro etero dsati bobini beri tojidsani mota naqui etero jadanidsa podsacossadsapi najarossa nejerajaro. Jidsa tani. Etero jadanipi tobiquemaninira tani –najari Jeso. (Nadsama aji Jesocca marinajapi pina jodiodenicca marinajassa nejerani. Jeso pocca marinajapi dsati.)

37 —Ima onihi naqui ajima najaro: Uva ppejene nahatodsatipa bani etero ssequi nahi jadahidsa sso sso ihidsamana najarajari. Uva ppejene nahatodsatipa bani etero jadahidsa sso todsadsa ssicatadsapa jocaquera tajarijine sseo tahi caji tahi. Sseo tadsapa uva ppejene sso taha jica tahi, dsamine naco totabaccoradsapa coro quina tahi. ³⁸ Nadsama uva ppejene dsatipa bani etero ssequi nahi dsatidsara sso sso totodsa najari —najari Jeso. (Aja pohua atti nama najaripa madija bodi dsati tojadsana Jesocca marinaja dsati ecahuanijine pajirahi, najari.)

39 —Ima onihi naqui tiadenidsa huati onana: Madija uva ppejene jadahi dse dse quiquinanadsapa pohuadenipa uva ppejene nahatodsati tohui quiquinana-jarajaripaja. “Uva ppejene jadahipa iadsa bica tajari, jidsera tahi” quiquinanajari —najari Jeso. (Nadsama najaro imapi madija poccadeni ima jadani naqui najarossa najaro. Poccadeni ima jadanidsa huatideni huanacquiri nadsapa Jesocca ima dsatidsa: —Najarona denima iadsa bica tani —quina-jarajaripaja. Poccadeni ima jadani nebomanahijinepa jiperaquiri najaripaja.)

6

Jassinajacca huadadsa Jesocca mamari tabaqqipa aroso jidsadsa trigo bono pore dsanapomanajari

Mateo 12.1-8; Maraco 2.23-28

¹ Naraha jassinajacca huadadsa Jesopa pocca mamari tabaqqi tedseje toccajari. Huidsaja

nocconi motta jahui toqqueqquimani jai tojeqquimajari. Nahihuaajipa aroso jidsadsa trigo bono jadahi caji tajari. Jesocca mamari tabaqqui nahi jai tojeqquimadsapa pore dsanapomanadsa pohuadeni dsepedsa siqui apa, siqui apa, siqui apa dsanapomanajari. ² Naraha jodiodeni marinaja pariseodsa jehe quinajarideni qqui toquinadsapa pohuadenidsa bica tejeradsa huati icanabaqquimanajari: —¿Nejecotohui jassinajacca huadaraha najaro huidsajacca bono pore tiquinajari? Jassinajacca huadadsapi idsepe ijie oppina taraha -quinajari. Naraha bonopa pamaha pore pore ijidsamaneri najariraha pariseodeni pohuama pohuadenidsa ima inahanamanajaro.

³ Naraha Jeso pohuadenidsa huati tajari: —¿Naraha tiadenipi aji Dio Atti maittaccadsama dsodo naniccadsa Dabicca ima hua hua titiquina naraha tetideni ajimamanajarorane? Najaro imapi Dabipa pohua tessedeni tedseje pemi-manadsapa pan Diodsa da tahicca oppina taraha jipamanajari. ⁴ Diodsa dada toqquimahuaji toqquedsimadsa cacahuadedsa pan tohui huati tajari. Pan ohuaha nohueradsa Diodsa da tahicaraha Dabi jipajari, pohua tessedenidsa naco da inabaqquidsa jipamanajari. Najari pan Diodsa da tahipa dada toqquima cacahuadedenira jijipamana najariraha Dabideni pemimanadsa jipamanajari oppinera tahi -najari Jeso.

⁵ Naraha Jesopa denima pohuadenidsa huati tajari: —Madija Bedi oजारoa jassinajacca huadapi ohuana jinede ojani. Jassinajacca ima cacahuadepi ohuana paji -najari Jeso.

*Madija dsepe siricca ima**Mateo 12.9-14; Maraco 3.1-6*

⁶ Jassinajacca huada onihidsa naqui Jesopa Dio Atti mamarihuaji toqquedsimadsapa mari icanabaqquipomajari. Naraha nahidsapa madija dsepe nahatonicca ccara tocajani huittarijari.

⁷ Naraha jodiode nicca marinaja maridedeni, marinaja pariseodsa jehe quinajarideni tedseje Jeso inoccodsamanajari. Jesopa jassinajacca huadadsa madija inanomibaqquidsapa pohuadenidsa pina jassinajacca huada jerajarodsa dsepe ijijarissa najari, quinajari. Pohuadeni bodipa: —Jidapana jassinajacca huadadsa dsepe siri inanomidsapa Jesodsa ima inahananijine

—quinajari. ⁸ Naraha Jeso pohuapa pohuadeni bodi nahato tadsapa madija dsepe siridsa huahua najari: —Titehemadsa ahuaaji ticcajonaji —najari. Nadsapa totehemadsa nahihuaji huajari. ⁹ Nadsapa Jeso huapimadsa huati tajari: —Tiadenidsa huati onana. Moisesicca marinaja, icca madijacca marinaja naqui nahatoqquri tiquinadsapi ohuatti tecomeramanaji.

Jassinajacca huadadsapi ¿nejecoma najaro ima inananina “Bica tani” tiquinajaro? Jassinajacca huadadsa madija inabicabaqquidsapa “Oppina tani” ¿tiquinajaroqui? Madija inajid-sobaqquidsana “Bica tajaro” ¿tiquinajarorane? —najari. —Jassinajacca huadadsa naco ijine

madija tossiajadsa ¿oppina taqui? “Paja dsoq-querina” ¿tiquinajarorane? —najari.

¹⁰ Nadsapa Jeso madija huapima jassi nahuanijari noccodeni icattabaqqui nadsa dsepe siridsa huati tajari: —Jari, tidsepe ohuahuaaji

da ticanajonaji -najari. Nadsapa pohua dsepe pohuahuari da icanadsapi dsepe tocabica-jaro. ¹¹ Naraha jassi nahuajanijarideni motapa pariseodeni. Pohuadenina Jesodsa huadimana-jari. Nadsapa pohuadenira imahaha canadsa: — ¿Nejecoma inanadsa Jeso inanadsoqquehijine? -quinajari.

Jeso pocca dodosse tabaqqi 12 quinajari icat-tejidsabaqqijari

Mateo 10.1-4; Maraco 3.13-19

¹² Nadsapa najari abadsicodsa Jesopa Diodsa huati tahijine ssonohuari toqqemorajari. Nahidsa dsome Diodsa huati huati taha cassiaja najari. ¹³ Cassiajadsapa pocca mamari tabaqqidsa huahua najari. Huapima queriqquimanadsa 12 quinahana icattejidsabaqqijari, pohua huatimade toquejenahijine. Nadsapa Jeso onideni icanacanibaqqijari: —Occa dodosse tabaqqi -najari. ¹⁴ Tahidepa Ssino. Pohua oni Jesojine icanacanidsatipa: Pedro, najari. Pedro ohuaha Adiri. Pohuadeni tesse Satiaco, Huano, Feripe, Batorome quinajari. ¹⁵ Pohuadeni tesse ohuaha naco Mateo, Tomas, Satiaco quinajari. Satiacopa Arapeo bedi. Pohuadeni tesse ohuaha naco Ssino, pohuadsa: romanodeni momohuade, quiquinanajari. ¹⁶ Pohuadeni tesse ohuahapa Joda. Najaripa Satiaco bedi. Jicahicapa Joda Iscariote. Najaripa Jeso ccaccorade. Najarideni Jeso icattejidsa-baqqijaripa 12 quinaha pohuadsa toquejenajari.

*Jesopa madija huapi taha mari icanabaquijari
Mateo 4.23-25; Maraco 3.7-12*

¹⁷ Nadsapa Jeso pocca dodosse tabaqqui 12 quinajarideni tedseje qquedsippaniraha nani deoni huamo tanihuajipa madija huapima Jeso pohuatohui madimanajari. Nahihuaji Jesocca dodosse tabaqqui huapima queriqquimanajari. Nahidsa naco dsama arobeni Jodeacca madija, odsa panani Jerosarecca madija, passo imeni inididsa madimanajarideni, aja odsa panani pamehe Tirocca, Sidohuajicca jahijonana canajari. ¹⁸ Huapimapa Jeso atti mittamanaja camahijine jahijonajari. Comaqquri najarideni Jeso inanomibaqquihijine naco jahijonajari. Aja madija bodidenidsa Satanacca dodosse tabaqqui tocorime madidsamanajarideni naco jahijonajari. Pohuadenipa nanajidso toquejenaraha najarideni naco Jesojine tocanomireridsajari. ¹⁹ Madija comaqquri najaridenipa: — Jesodsa idsepedsa bara inadsapi icanomirenijine —quinadsa pohuatohui disseraqquri najari. Aja Jeso pocca dacorehe pohuadenidsa tojadsapi huapima tocanomireridsajari.

*Diopa madijadsa ima bicani inanajarrocca ima
Mateo 5.1-12*

²⁰ Jeso pocca dodosse tabaqqui icattabaqqui nadsa huati tajari: —Tiadeni motapi ticapiramanaraha Diotohuira tiquinadsapi Diopa tiadenidsa ima bicani inanajaro. Diocca cacahuehe tiadenidsa tojanitohui.

²¹ —Tiadeni mota naqui jidapana tipemimannaraha Diotohuira tiquinadsapi Diopa tiadenidsa

ima bicani inanajaro. Nidsa dsotode Diohuaji tiqueriqquidsapi tipajiramananissa tanitohui.

—Tiadeni mota naqui jidapana oji tiquinaraha Diotohuira tiquinadsapi Diopa tiadenidsa ima bicani inanajaro. Nidsa dsotodepi tetidsemaneri nadsa jaja taqquimananitohui.

²² —Ohuapi Madija Bedi ojajaroa occa madija tiquejenajarojinepi madija ohuadsa jiperaqquri najaridenipa pahuama tiadenidsa naco jiperaqquri nahitohui. Najaro ima tiadenidsa tojadsapi Diopa tiadenidsa ima bicani inanajaro. Madija ohuadsa jiperaqquri najaridenipa aja tiadenidsa naco: “Iadsa tiquejemamana tejeraji” quinadsapa tiadeni dosse dosse tatani-baqquimana nahitohui. Najaro ima tiadenidsa tojadsapi Diopa tiadenidsa ima bicani inanajaro. Nadsama madija tiadeni totamasso-baqquimanadsa naco Diopa tiadenidsa ima bicani inanajaro. Nadsama tiadenipi ohua onidsa tecanimanajarojine aja ohuadsa jiperaqquri najaridenipa tiadeni onidsa naco: “Imittana in-ejerani, tabaccoraqquri nahi” quiquinanahitohui. Najaro nacasserehe tiadenidsa tojadsa naqui Diopa tiadenidsa ima bicani inanajaro.

²³ Ohuadsa jiperaqquri najarideni biridideni naco maittaccadsama Dio Atti cacomeraqquri najarideni inajidso-baqquimanaja najonapohui najari. Najarideni potemahi jidapana naco tiadeni tonajidso-baqquimanadsa ¡epeje! Tibodideni ccaracossa tejerana. Pina tetidsemaneri nana, onajaro. Nidsa memehuaji Dio madihuaji bacco tiquinadsapi Diocca daniji bicabote tiadenidsa tojanitohui –najari Jeso.

Diopa madija ettajobaqquihitohui

²⁴ Nadsapa madija domo huajaridsa Jeso den-
ima huati huati tajari: —Tiadeni motapi tid-
sepedenitaji sseqquiri tiquinajarojine Dio tohui
tiquinejerani. Jidapana ajijaro namidsa timadi-
manadsapi tiadeni tohuini tiquinanicca huapima
ticajimanaraha nidsa dsotodepi tiadenidsa no-
hueranitohui. A, tiadenipi tohuati nahanaqquri
tiquinani. Diopa oppina tanihuaji tiadeni tonan-
abaqquihitohui.

²⁵ —Aji tiadeni mota naqui jidapana jijipa,
dsamatapa sseqquiri tiquinajarojine Dio tohui
tiquinejerani. Naraha nidsa dsotodepi tipemi-
mananitohui. A, tiadeni naqui tohuati na-
hanaqquri tiquinani. Diopa oppina tanihuaji
tiadeni tonanabaqquihitohui.

—Tiadeni mota naqui ajijaro dsamadsa timadi-
manaccadsapi ponima jai tijaridsadsa tetidse-
maneri, jaja tiquineri naridsadsa: “Jehe, bica
tani” tataridsamana naraha nidsa dsotodepi
ocasserani teridsamanadsa oji tiquinanitohui. A,
tiadenipi tohuati nahanaqquri tiquinani. Diopa
oppina tanihuaji tiadeni tonanabaqquihitohui.

²⁶ —Nadsama tiadeni mota naqui aji occa
imassa tinanamana-jeraraha madija tiadenidsa:
“Jehe, ticcadeni ima bica tani. Tiadenidsa etidse-
jaro” quiquinanadsa tetidsemanaraha tiadenipi
tohuati nahanaqquri tiquinani. Diopa oppina
tanihuaji tiadeni tonanabaqquihitohui. Mait-
taccadsama Dio Atti cacomeracquiri najarideni
madimanapodsa naco Dio Atti mari icanabaqqui-
hissa taraha poccadeni marinajadsa: “Jehe, bica
tani” quina-jarajari. Naraha maittaccadsama

naco madija ohuahadeni attidenipa: “Ia naqui Dio Atti cacomeraqquri inani” quiquinanaraha pohuadeni nanamaidsamana najari. Najari-denidsana madija huapima attideni: “Jehe, ticcadeni ima iadsa bica tani” quiquinanajari, maidsehena pohuadenidsa bica tadsa. Jidapana naco tiadenidsa: “Jehe, bicaqquri tiquinani” quiquinanajari. Najaridenia ajaripaja jinodideni potemahi –najari Jeso.

Tiadeni huadidedenidsa tetideni huanaqquri nana

Mateo 5.38-48; 7.12

²⁷ —Nadsama aji ohuatti timittamanajaro-deni tiadenidsa ajima onajaro: Tiadeni huadidedenidsa pina tetideni huanaqquri nana. Aja tiadenidsa jiperaqquri najarideni naco pohuadenidsa pina ima bicanira titinanamana nana, nani tijinedeni ima bica tanijine, onajaro. ²⁸ Aja madija ohuahadeni naco tiadeni totamasso-baqquimanadsa: “Tabaccoraqquri tiquinani” quiquinanaraha pina tettideni bica tadsa pohuadenidsa huati huati tataridsamana nana, onajaro. Aja madija tiadenidsa tabaccorehe ihinanamana nadsa naco pina Diodsara huati huati titiquina nana, nahi Diona inabicabaqquihijine, onajaro. ²⁹ Madija huadidsa tipano idanidsa naco “Ohuaccone manaco odana” tejerana, onajaro. Tiadsa huadi tajaripa pajara tia cahadi, pajara tia cahadi naraha manacopi pohuadsa tedi tejeraji. Nadsama madija ohuahapa ticca etero pamacossajaro qqui tadsa huapicca tohuini inacomadsa: “Ohuadsa da taji” nadsa naco pohuadsa da tinaji. Titetepicca onihi

naqui teccocco-jeradsa pohuadsa da tinaji. Nema tiquinadsapi occa marinaja tecahuamanajaro. ³⁰ Madija tidsepetaji mitta nadsa naco pohuadsa da tinaji. Tidsepetaji huatirahi ididsa naco huati tidsima tejeraji. ³¹ Nadsama tiadenipi madija huapima tiadenidsa ima bicanira inanamanani-jine tohuini tiquinadsapi madija huapimadsa naqui ima bicanira titinanamana nana, onajaro –najari Jeso.

³² —Tiadenipi madija tiadenidsa huatideni huanacquiri najaridenidsara tetideni huanacquiri nani ojari nadsapi ¿Diopa tiadenidsa: “Jehe, bicaquiri tiquinani” napadsaja? Nohuerahi. Aja madija imasiridsa disseracquiri najarideni naco pohuadeni tessedsa huatideni huanacquiri nahi. Naraha pohuadeni tesse jarajaridenidsapa huatideni huaneraquiri nahi. ³³ Tiadenipi madija tiadeni acco camamanajari-denidsara pohuadeni acco ticamabaquimanahi ojari nadsapi ¿Diopa tiadenidsa: “Jehe, bicaquiri tiquinani” napadsaja? Nohuerahi. Aja madija imasiridsa disseracquiri najarideni naco pohuadeni tessedeni acco icamamana tahi. Naraha madija pohuadenidsa noccodeni jidsacquiri najaridenidsapa pohuadeni acco camade jiperaquiri nahi. ³⁴ Tiadenidsa madija attipa: “Pohuama ohuadsa da taccajo, nidsa tiadsa da onanihijine” nadsa tibodidenipi: “Jehe, ohuadsa da inanihitohui, nidsa dsotode ocajipomanijine” titiquina nadsapi najaridenidsara da da tiquinani ojari nadsapi ¿Diopa tiadenidsa: “Jehe, bicaquiri tiquinani”

napadsaja? Nohuerahi. Aja madija imasiridsa disseraqquri najarideni naco pohuadeni tessedsa pohuama da quina tahi, dsotode pohuadenidsa ccanipomahijine. Naraha madijapa da naniraqquri najaridenidsapa pohuama dade jiperaqquri nahi.

³⁵ —Naraha tiadenidsa ohuattipi: Tiadeni huadidenidsa naco tetideni huanacquiri nana. Tiadeni acco cama-jarajarideni naco acco ticamabaqquimanana. Madija naco tiadenidsa: “Pohuama ohuadsa da taccajo” quinadsapa pohuadenidsa da da tiquinana. Dsotode da inanihitohui tibodideni huatomana tejerana. Nema tiquinadsapi manaco Diopa tiadenidsa pocca daniji bicabote da inanitohui. Nadsapi ticcadeni ima naqui ahuato tanijine, aja Abi Dio memehuaji madijaricca ejedeni tiquejenajaro. Pohuapa madija huapimadsa pocca nahatoniji eccocco-jerajaro. Dio Pohuadsa: “Ticca daniji ohuadsa bica tani” quina-jarajaridenidsa aja madija tabaccoraqquri najaridenidsa naco Abi Diopa huapimadsa huati huana tajari. Ajijaro dsamadsa madimanajarideni huapimadsa Dio pocca nahatonaja inandaridsajaro. ³⁶ Nadsama tiadeni naqui pina ticcadeni Abi Diojinessa tinanamanana. Abi Diopa tohuati huanehe, acco camehema madijadsa huati huana tajari, tiadeni naqui madija huapimadsa tetideni huanacquiri nadsa pohuadeni acco acco titicamabaqquimana nana, onajaro –najari Jeso.

Madija ohuahacca imadsa: —Tabaccora tani

-tiquinejeraji
Mateo 7.1-5

³⁷ —Tiadenipi madija ticattejidsamana tararajo. Pina Diocca dossenijissa inana-gerani qqui tiquinadsa: “A, namajide rahi, pocca ima bica tejerani” tiquinejerana. Madijadenidsa tettideni nema tiquinejeradsana manaco Diopa tiadenidsa: “A, ticcadeni ima naqui bica tejerani” najarahitohui tiadenidsa. Aja madija ohuahacca ima tiadenidsa bica tejeradsa naqui tettidenipi: “Pohuapa tabaccora tahi, pohua nanajidso tojahi bica tahi” tiquinejeraji. Nema tiquinejeradsana manaco Diopa tiadenidsa: “Tia naqui tabaccora tinani, nanajidso tijanitohui” najarahitohui. Nadsama madija ohuahacca ima tiadenidsa bica tejeradsa naqui epejena narajo imatohui tibodideni huatomana dsanapogerana. Pohuadsa tedimanadsa naqui denima ticahadirejerana, pina ticajonerapomana, onajaro. Nema tiquinadsapi titessedsa ima bica tejerani tinanamanadsa naqui manaco tiadenidsa: “Epejena, huadi onejerani, ohuati ajimani” nahitohui. Diocca ejedeni tiquejenadsapi nidsa dsama jicadsa Dio naco ticcadeni ima huati nimanjarahitohui. ³⁸ Nadsama tiadenipi madijadsa da tiquinadsa naqui najaropi manaconitohui jerani ponima da tiquinaji. Nema tiquinadsapi Diopa tiadenidsa da inanitohui. Pohuapa tiadenidsa huemani da inanitohui. Pina ticcadeni saco Pohuajine ijijaro, epejeraha denima ajarini joca inadsa topa icamerijaro, denima quissa icamerid-sapi ijinissa tarajo. Nadsapi tiadenina huemani ticajimananitohui. Tijinedeni madija ohuahadsa

tinanamanajarrocca imapi manaco tiadenidsa najarossa najaro inanamananitohui, onajaro. Pina huemahi madijadsa da tiquinadsapi manaco Diopa tiadenidsa huemahi da inahitohui. Madijadsa badsira taha da tiquinadsa naco manaco Diopa tiadenidsa badsira taha da inahitohui, onajaro –najari Jeso.

³⁹ Nadsama Jesopa ajijaro namidsa imadinicca imadsa mari icanabaqquijari: —Nocco siri pamahapa ¿ojaria pohua tesse eccaridsahijine nahato taco? Nahato tajarahi. Pohua tesse eccaridsadsapa odi tohuajarodsa pamaha tocatojedsimera tahi. Paji, pina nocco sirissa tiquinejerana. Ssamogquiri tiquinejerana. ⁴⁰ Ajijaro ima tetideni ajimamana tejerana: Madija pocca mamari tabaqquipa pohuadeni maridedsa deni toquejena-jarahi. Pohuadeni maridena denima nahato tajari. Naraha disseraqquri nadsa tochattehahissa tadsana pina pohuadeni maridessa quinahitohui, onajaro. Jehe, nema tiquinana. Ohuadsa ticahatteranissa tana, onajaro –najari Jeso.

⁴¹ Madija ohuahacca imadsa: —Bica tejerani –inejeranijine Jesopa ajijaro namidsa imadinicca ima tadsajani mari icanabaqquipomajari. Pohua attipa: —Tiadenipi timecotecca madie pina Diocca dossenijissa nejerani qqui tiquinadsapi tettideni: “A, pohuajine ima bica tejerani” titiquina naraha tiadeni naqui masiri ticajimanani. Nadsama najaro ticcadeni imapi pina timecote noccodsa ahua majiconi huedsani qqui tinajarrocca imassa najaro. Timecotedsa: “A, tinoccodsa ahua majiconi huedsaha,

tire oninena” taraha tinocodsas naqui ahua majiconi imeni huedsani. Tinocco ahuatora tadsapi qqui tinanissa tejerani. ⁴² Nadsama tiadenipi imasiri ticajimanaraha ¿nejecotohui timecotedsara: “A, tijine ima bica tejerani. Tia acco ocamana, ticca ima tobicanijine” titiquina naraha tiadenipi tahide ticcadeni imaha tijinedeni tobicapo-jejerani? ¡Jaho, nema tiquinadsapi pina mamaisadedenissa tiquinajaro! Ticcadeni ima bica tejeradsapi aji ticcadeni imaha tinanabicamanapoji. Nadsana timecote acco ticamamanahijine tipajiramananitohui, onajaro –najari Jeso.

Ahua bono tahimari
Mateo 7.17-20; 12.34-35

⁴³ Jesopa ahuaacca imadsa mari icanabaqquihijine huati huati tajari: —Ahua bicahidsapa bono tabaccora tajari cahua-jarajari. Ahua tabaccora tajaridsapa bono bicahi quejemaha cahua-jarajari. ⁴⁴ Madijapa iquiera bono tohui quinadsapa ¿botani tetehuedsa iquiera bono pore pore quinaco? Nohuerahi. Uva bono tohui quinadsa naco ¿cotihidsa uva bono pore pore quinaco? Nohuerahi. Nadsama ahua huapima bono cajiridsadsapa bono bicahi cajihi nahato inadsapi: “Najari ahuaapa bica tahi” inajaro. Bono tabaccora tahi cajihi nahato inadsapi: “Najari ahuaapa tabaccora tahi” inajaro. ⁴⁵ Aji madijacca ima naqui pina ahuaacca imassa najaro. Aja madijadenipa pohuadeni bodicca ima nahato inejeraraha poccadeni madie qqui inadsapi pohuadeni bodicca ima naqui iadsa ahuaato tajaro.

Madija bica tajaripa pohua bodidsa ima bicani cajidsapa ima bicani ihinana najaro. Naraha madija bica tajarajaripa pohua bodidsa ima tabaccora tani cajidsapa imasiri ihinana najaro. Aja madija huapimapa pohuadeni bodidsa ima caji tadsapi najaro imara huati huati totoquina najari –najari Jeso.

Odsa capamajarocca ima

Mateo 7.24-27

⁴⁶ —Tiadeni motapi ¿nejecotohui ohuadsa “Ohua Medsede” titiquina naraha aji ohuattissa tinanamana-gerani? onajaro. ⁴⁷⁻⁴⁸ Aja madija ohuadsa bacco quinadsa ohuatti mit-tamanadsapa ohuattissa inanamanajaropi pina aja madija “Odsa bicani ocanahatona” najaricca imassa quinajari. Madijapa pocca odsa icanahatonijinepi odi hui idsimajaro. Nami ccara tanihuaji bacco tadsana huehuema ppa idsajari. Nadsapi odsa daco cajirajaro. Nadsapi ppani imeni bacco nadsa dacorehe ssahaha canadsa odsadsa jiba jiba naraha cojo tocana-gerajaro. Aji huehuemapi nami ccara tanihuaji bacco teje najaro. ⁴⁹ Naraha madija ohuatti mittamanaraha ohuattissa inanamana-gerajaropi pohuadenipa pina aja madija pocca odsa nahatode ssamo tajarissa quinajari. Najari madijapa pocca odsa icanahatodsapi huehuemajine odi hui todsanipi ssiqui nami ccara tanihuaji bacco tejerajaro. Odipi huaji tejerani. Nadsapi ppani imeni bacco nadsa dacorehema ssahaha canadsa odsadsa jiba jiba nadsapi odsa cojo tocanajaro. Odsa cojo tocanadsa toquehedimadsapi catirorijarossa najaro –najari Jeso.

7

*Romanodenicca soldado dossedecca medse Jeso inanomijari**Mateo 8.5-13*

¹ Jeso madija mari icanabaqquia jicadsapa odsa panani Capernaohuaji toccanijari. ² Nahidsapa romanodenicca soldado dossede madijari. Pocca dodosse tabaqqui soldadopa 100 quinajari. Najari pocca odsahuajipa pocca medse coma tajari huatiabote najari. Puhuapa pocca medsedsa huati huana tajari. ³ Nanaja Jeso tahimari mittadsapa nahicca jodiodeni ime jocohuideni mota Jesodsa huati toquinahijine dosse inabaqquijari: —Jeso ahuaaji ccajonahijine huati ticanamanahissa tana, nahi occa medse inanomihijine —najari. ⁴⁻⁵ Nadsapa Jesodsa bacco toquinadsapa huati toquinahissa tajari: —Aja romanodenicca soldado dossedepa bica tahi. Puhuapa icca madija jodiodenidsa naco huati huana tajari. Puhuapa icca Dio Atti mamari naqui pohuajinena icajijaro. Puhuapa iadsa bica tahi. Manaco pohua acco ticamajo, inajaro —quinajari Jesodsa.

⁶ Nadsapa Jeso pohuadenidsa toccanijari. Odsahuaji bacco tanimanabote naraha romanodenicca soldado dossede pohua tessedeni tahide dosse inabaqquijari, Jeso bacco ijidsamanahijine. Jeso jahuidsa bacco ijidsamanadsapa pohuadsa huati toquinajari: —Soldado dossede attipa ajama napaja: “Ohua Medsede, epeje, occa odsahuaji ticajona tejeraji. Tiapi nahatojide tijirani naraha ohuapi ajimani, ssamo onani. Occa odsahuaji tiqquedsimanijine

jipera tinanitide” napaja -quinajari Jesodsa.
⁷ —Pohua attipa: “Jeso, ohuapi pina aji tia bica tinajarossa onejerani onadsa tia qquide oqquejerajaro. Naraha tia huati tinadsapi occa medse tonomihitohui, onajaro” napaja -quinajari. ⁸ —Pohua atti denima naqui: “Aji ohua naqui occa taminecca dossenijidsa omadijaro. Manaco soldadodenipa occa dossenijidsa madimanajari. Pohnadenitohui huahua onadsapi jahijona tahi. Dosse dosse onadsa naco ohuattidsa jai toja tahi. Occa medsedsa naqui: ‘Tidsepe ijiji’ onadsa naqui pina aji ohua odossejarossa inana tani. Nema nadsapi ajidsa huati tinadsa occa medse tonomihijine tipajirani, napaja tiquinana” najari romanodenicca soldado dossede atti -quinajari pohua tessedeni.

⁹ Najaro ima Jeso mittadsapa huatidsedsa pohua bodi: —A, pohnuapa nahato taha -najari. Tahidehuajanidsa pohua nattihuaji jahimissajaridenidsa huati tajari: —Tiadenidsa huati onana: Ajajari bodi namanahapa pajissa nahissa tajari. Tiadeni Isaraeri potemahideni huapimapi tettideni ohomitta naraha ajararissa najari tiadenidsapa nohuerahi. Pajissa tiquinanissa tani ohomitta nejerani -najari Jeso.

¹⁰ Romanodenicca soldado dossede pohua tessedeni jai tojanidsa pocca odsahuaji bacco tanimanadsapa pocca medsepa tonomihira qqui toquinajari.

Jesopa amoneje tabira tocajani bedi inahatonijari

¹¹ Nahi dsotodepa Jeso pocca dodosse tabaqqui tedseje odsa onini Nainahuaji jai tojajari. Madija huapi taha naco poadenidsa jai tojajari. ¹² Odsa totoqquedsimahuaji bacco toquinabote naraha qqui toquinanaja madija dsoqquehi dsodsojo tocanadsa dsojo icanajonamanajari, ppa idsamanahijine. Aja dsoqquejari imenipi tabira tocajapojaro. Bedi dsoqquedsapa poni motta tojajaro. Poni bedi maqquideje ojari naraha dsoqquejari. Odsahuajicca madija huapima poni huatinimade jahijonajari. ¹³ Naraha Jesopa ponidsa huati huana tadsapa: —Oji tejeraji -najari. ¹⁴ Nadsapa Jeso tohuajiressijari, dsoqquejari dsodsojo tocanadsa bara nadsapa dsojodedeni domo huaha tahi najari. Nanaja Jesopa huati tajari: —Dsabisso, tiadsa huati onana: ¡Titehemaji! -najari.

¹⁵ Nadsapa aja dsoqquejari camittemanidsa totehema, huittari najari. Atti naco cajipomajari. Nadsapa imenidsa Jeso attipa: —Aja, ticca ejedeni tiadsa tojanipomajo -najari. ¹⁶ Madija huapima Jesojine dsabisso camittemanihi qqui toquinadsapa cappinamanaraha Diodsa huatidsemanajari: —¡Iadsa Dio Atti cacomerabote nahato tajari bacco nahi, bacco nahi! -narisamanajari huapima. —Iapi Diocca madija iquejeneje najaro jidapapi Diocca nahatohue aji ia qqui inajarocapi Dio ia acco tocamabaqquihitohui inajaro -quinajari.

¹⁷ Nadsapa Jesojine dsabisso camittemanihicca ima tojaridsadsapi dsama Jodeahuaji madimana-

jarideni huapima mittaridsamanajari. Pocca-
deni dsama jicaqquinihuaji naqui ima bacco
taridsajaro.

*Huano Baotista pocca dodosse tabaqqui tahi-
marideni*

Mateo 11.2-19

¹⁸ Huano pocca mamari tabaqqui —Jeso
canahatori canahi -quinahi ima mittamanad-
sapa Huanodsa huati toquinajari. Nadsapa
Huano Jeso tahimari mittadsapa pocca mamari
tabaqqui pamaha Jesohuaji dosse inabaqqui-
hijine huahua inabaqquijari. ¹⁹ Nadsapa po-
huadenidsa huati tajari: —Jesodsa ticadaji, po-
huadsa ohuatti huati tiquinana. Ajima tiquinaji:
“¿Tiapi aji pohuatohui imadijaro Cristo-Mesia
tijaqui? ¿Ohuahatohui imadiccanijinerane?”
tiquinana Jesodsa -najari Huano. ²⁰ Nadsapa
Huanocca dosseniji Jesodsa bacco toquinadsapa
pohuadsa huati toquinajari: —Huano Baotista
attipa tiadsa huati inanijine ia dosse najon-
abaqquijari. Pohua attipa: “¿Tiapi aja tohui
imadijaro Cristo-Mesia tijaqui? ¿Ohuahatohui
imadiccanijinerane? nadija tiquinana” nade
Huano atti -quinajari Jesodsa.

²¹ Aja pohuadeni Jesodsa huati toquinadsama
Jeso pohua dsepe iji iji nahi qqui toquina-
jari. Madija comaqquiri najarideni comani
onihi, onihi cajiridsamanajari inanomibaqqui-
jari. Madija bodidenicca tocorime ohuaha
ohuaha naridsajarideni naco Jesojine jahininer-
idsajari. Madija nocco sirideni naco nocco ssire

inanaridsajari. ²² Nadsapa Huano dosse inajonabaqqujaridenidsa Jeso pohua cacomerajari: — Jehe, ticadanidsa Huanodsa huati tinanimanaji. Aji qqui tiquinajaro, aji timittamanajaro pohuadsa huati tinanimanana -najari Jeso. — Ajima tiquinana: “Madija nocco sirideni nocco ssire tocanirehi. Madija isso sirideni naco tocanomiredsa jahiridsahi. Madija dsamacoma onini leprajine huapideni jadsimarorarideni naco imedeni tobicaridsahi. Madija huaribodeni didiqquiri najarideni naco huaribodeni ssire tocanireridsahi. Madija huatiajarideni naco camitemmani-ridsamanahi. Madija tohuati nahanacquiri najarideni naco icassiejeranijinecca ima mari icanabaquidsa mittaridsamanahi” tinanimanana tiadeni maridedsa -najari Jeso. ²³ —Aja madija mota attidenipa: “Jesopa Cristo-Mesia jarahi, pocca imapi onihi, Cristo-Mesiacca imassa nejerani” quinaraha madija mota nama quina-jarajari attidenipa: “Pajissa Jesopa icca Mesia” quinadsa pohuadenidsana Dio pocca biquehe inananitohui. Ajjaro ima huapima Huanodsa huati tinanimanana -najari Jeso.

²⁴ Nadsapa Huano dosse inajonabaqqujarideni tohuedanihi natti Jesopa pohuadsa queriqquimanajaridenidsa Huano tahimari huati tajari: —Dsama huamoni ssono caji, siba caji tanihuajipi ¿nejeco qquidera jajahi tija najarotte? Aja madija pocca ima japari tajaro pina boba jojodejine jene jene tocanajarissa najari ¿nama najari qquide jajahi tija najarottarane? Nohueraha. ²⁵ Aji huamonihuaji jajahi tija nadsapi ¿nejeco

qquidera jajahi tija najarotte? Aja madija etero huatini ccara tanicca huedsajari qquide ¿jajahi tija najarottarane? Naraha tiadenipi nahatoqquiri tiquinani: Madija etero huatini ccara tanicca huedsamanajaridenipa taminedenicca odsadsana mamadimana najari. Naraha Huanopa nema najaro madietohui najarajari. Pohuapa camello conera huehuedsa najari. Dsama huamonihuaaji mamadi najari.

²⁶ Naraha ¿nejecotohuira pohua cattade jajahi tija najarotte? “Huanopa Dio Atti cacomerabote dacorajari” titiquina nadsa ¿jajahi tija najarottaqui? Jehe pajissa. Pocca marinajatohui jajahi tija najaro. Huanopa pina Dio Atti cacomeraqquiri najaridenissa naraha pohuapa deni tojajari. Pohua dsepe ijijaripa ima deni tojanicca cajijari. Najaro imapi otahimari Cristo-Mesia tiadeni Idinide ojanijinecca ima inanajora-ridsapojaropaji.

²⁷ Aja, Huano Baotistapa maittaccadsama pohua tedsejemacca ima Dio Atti cacomerabote dsodo inapojararo. Najaropi pina Diopa Cristo-Mesiadsa huati tapojarissa najaro:

“Tahide titahimari tohuaccade madija ojaría tit-edsejema dosse onapohuitohui.

Nahi mittamanadsa madija bodidenipa titohui najoramanapohuijine,

pina tijahine inajoramanapojarissa inanananitoahui, onajaro”

napohui nade Dio Atti Maraquia dsodo inapodsá.

²⁸ —Nadsama tiadenidsa huati onajaro: Aji namidsa madiridsamanajaridenidsa naco madija ohuaha pina Huano Baotistassa najari

nohuerahi. Huano Baotista pohuajinena madija bodideni otahimaritohui Diocca cacahuehecca ima dsati inanajorabaqquipojari. Najarojine Huanopa namidsa madiridsamanajarideni huapimadsa deni tojajari. Naraha Diocca cacahuehepi ima onihi cajijaro. Najaroa nidsa dsotode madijapa Diocca cacahuehecca ima dsati tojani qqui toquinadsa najarodsa toquejenadsapa Huano Baotistadsa deni toquejenahitohui. Madija ajamani tojajari pina tohuati nahana tajari Diocca cacahuehedsa tojadsapa pohua naco Huano Baotistadsa deni tojahitohui -najari Jeso.

²⁹ —Madija huapima Huanocca marinaja mit-tamanadsapa jodiodeni mota, romanodenicca taminecca dosseniji dsiniro nanaccadedeni naco: “Jehe, pajissa Diopa nahato tahi. Bicaqquiri inejerani. Icca tabaccorehe inebona” quinadsapa Huano topa idsanabaqquijari. ³⁰ Naraha jodiodeni marinaja pariseodsa jehe quinajari-denipa, jodiodenicca marinaja maridedeni ted-seje nama quina-jarajari. Huanocca marina-jadsa huaribodeni sibaqquiri nadsapa topaniji tohui quina-jarajari. Diopa pohuadenidsa ima dsati bicani inananitohuiraha pohuadenipa ettajomanajaro. ³¹ Naraha jidapanana aja madija madiridsamanajaridenipa ¿pina nejecojaridenissa quinajari? onajaro. Ohuatti timittamananissa tanijine ajijaro namidsa imadinicca imadsa tiadeni mari ocanabaqquina. ³² Jehe, madija jidapana madiridsamanajaridenipa pina ejedenideni boronidsa jassi tadsa poccadeni it-tome tossamodsa ahuaji johua, ahuaji johua

quinajarissa najari, onajaro. Pohnadenipa pohnadeni tessedenidsa: “Jaho, dsobi tiquinanijine totoredsa tore tore inaraha tetidsemana-jerani, dsobi dsobi tiquinejerani” quinajari. Pohnadeni atti naco: “Ittomedsa naqui tiadeni oji inanabaqquinijine ajie tohuati nahana taniccadsa jiri jiri inaraha tiadenipi oji tiquinehe nejerani” quinajari –najari Jeso. ³³ —Jehe, aja jidapana madimanajaridenipa pina ejedeni jamimanagerissa quinahi onajaropi Huano Baotista Dio Atti cacomerade tojadsapa ejetecca jipaqqiecca jijipa jipa-jarahi, dse najarahi nadsa johua johua quinadsa attidenipa: “Huano Baotistacca madie jidsa tani. ¡Satanacca dodosse tocorime pohua bodidsa madidsajari itidija!” quiquinanajari. ³⁴ Dsotodepi ohua Madija Bedi ojajaroa ejetecca jipaqqiecca jijipa ojipa, dsedse dse onadsapa ohuadsa johua johua quinajari attidenipa: “Jaho, pohnapa jipajide rahi, dsedsejide rahi. Romanodenicca taminecca dosseniji dsiniro nanaccadedeni, madija imasiri cajimanajarideni naco pohua tesse toquejenajari” quiquinanajari ohuadsa. ³⁵ Huanodsa, ohuadsa attideni nama quinaraha nidsa imasiri cajimanajarideni ettijine bodideni cacajiqquimera, imarideni cacajiqquimera nadsapa Diocca nahatohue ahuato tanitohui –najari Jeso.

Marinaja pariseodsa jehe najari onipa Simon najaricca odsadsa Jeso jipajari

³⁶ Madija marinaja onini pariseodsa jehe najaripa Jesodsa huahua najari, pocca odsahuaji inajipahijine. Najaricca odsahuaji Jeso toccadsa

toqquedsimadsapa huahuanaridsa huittarijari, jipahijine.

³⁷ Naraha najaro odsa pananidsapi amoneje huananari madijaro. Ponipi ima mittajaro: —Pariseocca odsahuaji Jeso bacco nahi, nahihuaji jipahijine —quinadsa nanihuaji toqquedsimajaro. Jojo bicahi siba alabastro nahatoni dsojo inajonajari. Najari jojodsa majojo bicani ijijaro. ³⁸ Ojiema Jesodsa bacco tadsapi pohua amorihuaji huadsa oji oji najaro. Nadsapi poni nocconi ppajani ssabororo nadsa Jeso amori ppajaja tocaja najaro. Nadsapi poni tatini conanidsa Jeso amori sse ippijari. Amori sse ippia jicadsapa amoridsa mose najaro. Nani dsotodepi ponicca majojodsa naqui Jeso amori ssohoho icanarijaro.

³⁹ Naraha aja pariseo Jesodsa huahua najaripa najaro amoneje Jesodsa nema nani qqui tadsa pohua bodipa: —Ajana, Jesopa Dio Atti cacomeraqquri najaridenissa nadsapa madija bodidenicca ima nahato tanaja. Najaro amoneje pohuadsa mari dsanajaropi madierini tabaccora tajaro. Pnidsa: “Huaji tinaji” nahitohuiraha —najari. ⁴⁰ Naraha Jeso attipa: —Simon, tiadsa huati onana —najari. Naraha pohua cacomera-jari: —Jari Mamaride, huati tinaji —najari.

⁴¹ Jesopa Simon pohua bodidsa atti atti nahi nahato tadsa ima ajima najaro huati tajari: —Maqquideje pamahapa dsiniro dada nanaja nahihuaji debe quinajari. Ojariapa dsiniro ccarara 500 denario debe najari. Madija ohuahapa 50 denario debe najari. ⁴² Nadsama pohuadeni pamahapa poccadeni ima tossamodsapi paca quinahijine pajiramana-jarahi. Nad-

sapa dsiniro dadade attipa: “Jehe, tipajiramana-
jeradsapi ticcadeni cuenta ojine dsodo nani sse
onanitohui. Nani tiadenidsa: Denima ohua paca
tiquinaji, onejeranijine” najari dsiniro dadade
atti. Nadsapi poccadeni cuenta jicani.

—Jari Simon ¿nejecoma tani tetti? ¿Neje-
cojarina dsiniro dadadedsa denima huati huana
tajari? ¿Aja denima debe najaripa dsiniro dadad-
edsa denima huati huana tajarico? ¿Ajamani
debe najarina dsiniro dadadedsa denima huati
huana tajarirana? —najari Jeso Simonds.

⁴³ Naraha Simon pohua cacomerajari: —
Ssamo onani. Aja denima debe najarina dsiniro
dadadedsa denima huati huana tajari itide —na-
jari. Nadsapa Jeso pohuadsa huati tajari: —Jehe
pajissa. Tecomeranissa tani —najari.

⁴⁴ Nadsapa Jeso amoneje icattoma nadsa Si-
mondsa huati tajari: —Qqui, ajijaro amonejeca
tohuati huanehepi ahuato tani. Ohuapi ticca
odsadsa oqquedsimaraha tiapi ohuadsa pina icca
madijacca imassa tinana-jerani. Ohuadsa passo
da ticanehe nejerani, ohuamori ssahua onanijin-
eraha. Naraha ajijaro amonejena oji oji nadsapi
poni nocconi ppajani toccadsa ohuamori ppajaja
tocajadsapi poni tatini conanidsa ohuamori sse
ippijaro —najari Jeso. ⁴⁵ —Tiapi ohuadsa pina
icca madijacca imassa tinana-jerani. Icca madi-
japa itesse jipahijine huahua inadsa bacco nad-
sapa ipano mose mose ihinanajaro, itatidsa oqui
naco sso sso ihinari najari. Opano mose tejer-
araha ajijaro amonejena oqquedsimaponidsama
ohuamori mose mose dsanapojaro. ⁴⁶ Otatidsa
oqui naco sso tari-jararaha ajijaro amonejena

ohuamori majojodsa ssohoho icanarijaro –najari Jeso. ⁴⁷ —Jehe, najarojinea aji huati onajaropaji: Ponipi ima sse taporaha ponicca ima tabaccora tanicca Dio sse inadsapi jidapapi ponidsa ima nohuerani. Ponina denima ohuadsa huatini huana tajaro. Madija ohuahadeni naco poccadeni ima tabaccora tanicca Dio sse inadsapi pohuadenidsa ima nohuerani. Naraha madija bodideni: “Icca tabaccorehepi huapi tapo-jerade” quinajaridenia aja ohuadsa badsira taha huatideni huanaqquiri najaripaja, onajaro. Nadsama Simon, najaro ima tibodi huatoji –najari Jeso.

⁴⁸ Nadsapa Jeso amonejedsa huati tajari: —Aji, ima tinanapoparopi sse inehe jicajaro. Najaroa aji tibicajaropaji Diodsa –najari.

⁴⁹ Naraha nahi huahuanarihuaji Jeso tedseje jipamanahijine jassi tarijarideni pohuadenira huati canirere canajari: —Ajajaripa ¿nejecoma najaritta? ¿Nejecotohui pohuapa madija bodicca tabaccorehe tonanamosside nahato taha? –quinajari.

⁵⁰ Pohuadeni atti nama quinaraha Jesopa amonejedsa huati tajari: —Tiapi ohuadsa jehe tadsa tossiejehe ticajijaro. Diocca jonehema, pocca cappinerehema ticcaniji –najari Jeso.

8

Amonejedeni Jeso acco icamamanajari

¹ Nahi dsotodepa Jeso odsa panani onihihuaji onihihuaji mari mari naridsajari. Diocca cacahuehecca ima bicani huati huati naridsajari. Pocca dodosse tabaqqi 12 quinaha pohuadsa

jahiridsajari. ² Amonejedeni naqui Jeso pohuadsa jahiridsajaro. Ponidenipi comacquiri naporaha Jesojine tocanomireridsajaro. Onihideni naqui tocorimejine comacquiri naporaha Jesojine bodinidenicca jahininejari. Najarodeni ojarie oninipi Maria, poni dsamarini onini Madarenadsa cacanijaro. Poni naqui tahidepi tocorime ⁷ quinajari cajiporaha Jesojine jahininejari. ³ Amoneje onihi naqui Jesodsa ccaridsajaro, oninipi Dsohuana. Ponicca maqqui onipa Cosa. Cosapa tamine Herodecca odsa imeni cacahuade tojajari. Herodecca medsedeni naco dosse dosse najari. Amoneje onhipi Sosana ponidenidsama Jesodsa toccajaro. Amoneje onihideni naqui huapi tehe Jesodsa jai tojajaro. Ponideni huapimapi Jeso acco camade toquejenajaro. Ponidenicca dsinirodsa naqui pohuadeni taparideni mitta mitta nanaridsamana najaro.

Jesocca marinaja huidsaja ppappadecca ima tadsajani mari icanabaqquijari

Mateo 13.1-9; Maraco 4.1-9

⁴ Odsa pananicca madija huapima naco jai tojaja camajari Jeso qquide. Madija huapima pohuadsa queriqquimanadsapa Jeso pocca marinaja mari icanabaqquihijine ajijaro namidsa imadinicca ima tadsajani mari icanabaqquijari. Nadsapa pohuadenidsa ajama najari:

⁵ —Jehe, huidsaja ppappadepa pocca huidsaja huirade toccajari. Huidsaja bacco tadsapa huirade tojaridsajari. Cadsi huira, cadsi huira, cadsi huira naridsajari. Aja nocco huira inaridsajari motapa jahuihuaji catojarijine ttai ttai

tojaridsajari. Nocco ahahuatori nadsapa ppiriri saca quinajari. ⁶ Aja nocco huira inaridsajari motapa siba ccababa tanihuaji catojaridsajari. Najari naco moro taraha jabo nami ppaja tanihuaji bacco tajaradsapa maji ppoconejine botejari. ⁷ Aja nocco mota naco namidsa cotihi caji tahihuaji catojajaripa cotihi tedseje paja moro toquinarihi naraha cotihijine ssomi tojajari. ⁸ Nadsapa nocco mota huira naridsajaripa nami bicanidsa catojaridsadsapa mororo canaridsadsa bica taha napijari. Bono cajiridsadsapa ede ojariapa bono 100 naha cajijari. Ede huapimacca nama naridsajari -najari Jeso.

Jeso huati huati taha jicadsapa pohuadenidsa jadsirema huati tajari: —Nadsama teribodeni ticajimanadsapi ohuatti timittamananissa taji, onajaro -najari Jeso.

Madija motapa Jesocca marinaja mittamanagerajari

Mateo 13.10-17; Maraco 4.10-12

⁹ Nahi dsotodepa pocca dodosse tabaqqui pohuadsa huati toquinajari: —Jeso, ajijaro namidsa imadinicca ima tadsajani ia mari ticanabaqquijaropi ¿nejecoma najaro ticca marinaja? -quinajari. ¹⁰ Naraha Jeso pohuadenidsa huati tajari: —Jehe maittaccadsama Diocca cacahuehecca ima dsati najoraporaha madija inahattabaqqui-jaraccade. Jidapanana Djojine pocca cacahuehe tahimarini dsati tiadenidsana ahuato tani. Naraha madija motapa ajijaro namidsa imadinicca ima tadsajani pohuadeni mari ocanabaqquidsapa mittamana-jarajaripaja.

Nama quinajaripa pina Dio Atti cacomerabote Isahia dsodo inapojarossa najaro. Isahia attipa: “Qqui qqui toquinaraha pina qqui toquirahi nahitohui. Pohuadeni bodi pina ssamo-qquiri najarissa nahitohui.

Diocca dosseniji mimittamana naraha pina mit-tamanerahi nahitohui”
napohui nade Isahia atti –najari Jeso.

—Huidsaja ppappadecca imapi ajima najaropaji –najari Jeso

Mateo 13.18-23; Maraco 4.13-20

¹¹ —Aji occa marinaja ajijaro namidsa imadinicca ima tadsajani tiadeni mari ocanabaqquijaropi ajima najaro: Aja noccopa Dio Attissa najaro. ¹² Nocco huiru inaridsajari mota jahuihuaji catojaripa pina madija Dio Atti mit-tamanaraha pohuadeni bodidsa toja-jeranijine maidsehe jinede Satana ccajonadsapa pohuadeni bodicca Dio Attipi amossi inaridsajaro. Najaropi pina nocco jahuidsa catojadsa ahahuatori nadsapa ppiriri saca inaridsamanajarissa najari. Najarossa najaroa maidsehe jinede Satanajine bodideni inassamobaqquidsapa Diodsa pajissa quina-jaradsa tocassiejera-jarahitohui.

¹³ —Madija ohuaha bodidenicca imapi pina aji siba ccababa tajarocca imassa najaro. Dio Atti mittamanadsa huatidsemanaraha pohuadeni bodidsa toja-jerajaro. Najaro imapi pina aja nocco moro taraha siba ccababa teje najaro jabo huapihujira toccabaqquijaricca imassa najaro. Najaria aja moro todsatiraha maji ppoconejne botejaripaja. Najaro imapi pina madija tahidepa:

“Jehe, Dio Atti bica tani” quinaporaha dso-tode pohuadenidsa ima ssonaridsa ocasserani ahuamanadsapa: “Epejena, Dio Attipi inebona” quinajari.

¹⁴ —Madija ohuaha bodidenicca imapi pina cotihi tedseje nocco moro tajaricca imassa najaro. Pohuadenipa Dio Atti mittamanaraha pohuadenia ajijaro namicca ima Dio Atti tadsajani icanejemamana-dsanapojaro. Nadsama pohuadenia aja pohuadeni dsepedeni ihijimana najarotohuira disseraqquri nadsapa Dio Atti tocahatterahissa tajarajari. Nadsama madija attidenipa: “Todsepetaji inehemana” quiquinanadsa naco poccadeni jeheniji maidsehe toja tani. Aji namicca ima pohuadeni tohuini quinahiccadsara huahuatidsemana nadsa naco Dio Attipi huatideni ajamamanajari. “Dio Attina denima bica tani” quina-jarajari. Nadsama poccadeni jehenijipi pina aja cotihi tedseje nocco moro taraha cotihijine ssomi tojadsapa bono-jarajarissa najaro. Nama najari madija naco otahimari bicani icassiejeranijinecca pohuadeni tesse mari icanabaqquimanageradsapa ohuatti mittamana-jarajaripaja. Poccadeni madiedsa occa marinaja ahuato tejeradsapi pohuadeni tesse ohuadsa pajissa quina-jarajari. Nama quinadsapa pina bononoraqquri najarissa quinajari.

¹⁵ —Naraha madija ohuaha bodidenicca imapi pina aji nami bica tajarocca imassa najaro. Dio Atti mittamanadsapa jehe quinahissa tajari. Pohuadeni bodipa pajissehe tohuini quinajari, bodideni bicaqquri najari. Dio Atti pohuadeni

bodidsa ecahuamana-dsanapojaro. Poccadeni jeheniji napidsapi pina aja nocco nami bicanidsa moro tahissa tadsapa bono cajijari. Nadsama pohuadenipa Dio Attidsa disseraqquri nadsa ocasserani ahuamanadsa naco nama naha Dio Attidsara jehe dsanapomanajari. Pohuadenipa madija ohuaha acco acco ihicamabaqquimana nadsapa najarideni naco Diocca ejedeni toquejenajari –najari Jeso atti.

Jojororo tahimari

Maraco 4.21-25

¹⁶ —Nadsama jojororo toquehessidsapa boco icanahijine jarahi. Huahuada dopanihuaji naco tocanajimahijine jarahi. Jojororo toquehessidsapa aja pohua cacahittari nahidsana cacahittari najari, nahi madija odsa bodihuaji jahidsimarideni ssiajani cajimanahijine. Ohuatti naqui najarossa najaro, pina jojororo ssiejene ssiaja tararissa najari. Aja madija ohuatti cajimanageridenipa ecomamana-jeranijine, najaro ssiajanipi madija huapimadsa tossiajabaqquinijine, onajaro. ¹⁷ Nadsama ima ahuatora tanicca caji taraha nidsa dsotodepi ahuato tanitohui. Aji occa marinaja mota ahuatora tadsa timittamanajeraraha nidsa dsotodena tiadenidsa ahuato tadsana timittamananitohui, onajaro –najari Jeso.

¹⁸ —Jehe, nadsama ohuatti timittamananissa taji. Paji, occa marinaja timittamanadsapi mohuaradsa ohuatti huapima tiadenidsa tojanissa tanijine timittamananissa taji. “Ponimaha” tiquinejeraji. Aji tiadeni ohuatti tecahuamanadsapi denima ticahatteranitohui. Naraha occa marinaja timittamanaraha ohuatti

tecahuamana-jeradsapi occa marinaja odinini-tohui. Occa marinaja tiadenidsa tojapomajeranijine, onajaro. Nadsapi tiadenira tiadeni ticamaidsanimanadsa naqui: “Dio Atti ocajini, nahato onani” tiquinaraha najaro naqui odinini-tohui. Paji, nemamana tejeraji, onajaro -najari Jeso.

Jeso imeni, pohua imecotedeni

Mateo 12.46-50; Maraco 3.31-35

¹⁹ Naraha Jeso pohua mari mari nahihuaajipa Jeso imeni, pohua imecotedeni quinadsa pohuahuaaji bacco toquinajari. Bacco toquinaraha madija huapi taja najari pohuahuaaji jai tojed-simahijineraha tojera tajaro. ²⁰ Naraha madija ojaria Jesodsa huati tajari: —Ticca ami, timecotedeni amossinidsa domo huapaja: “Tia qqui inana” quinapaja -najari.

²¹ Naraha Jeso pohua attipa: —Aja madija Dio Atti mittamanahissa tadsa Pohua Attissa inanamanajarodenina pina occa amissa, pina ohuemecotedenissa quinajari -najari Jeso.

Jesopa jojode inatappa ssodadani inatappa nanicca ima

Mateo 8.23-27; Maraco 4.35-41

²² Nadsapa Jeso pocca dodosse tabaqqi ted-seje canoadsa jai tojedsadsa nahi canoadsa pohuadenidsa huati tajari: —Jina, coridsa jippehuaji jaijana -najari. ²³ Nadsapa tohuaccamanaraha Jesopa huadaja dsanapojari. Huatideni ajamama canaraha jojode dacorehema ccajona, passo dacorehema ccajona nadsapi coridsa ssoda ssoda najaro, canoadsa passo ssonidsa ssonidsa

najarojine je tocanamanabote najari. ²⁴ Nadsapa Jeso huadahihuaji jai tojeppidsa nocco tojahijine cobo quinajari: —¡Ia Maride, ia Maride! ¡Nocco tijaji! ¡Je icanabote nani! —quinajari. Nadsapa Jeso totehemadsa jojodedsa, passo ssodadanidsa huati tajari: —¡Epeje taji! —najari. Nadsapi jojode, passo ssoda ssoda najaro naqui joma najaro. Joma nadsapi passo podsippanissa tajaro. ²⁵ Nadsapa Jeso pocca dodosse tabaqquidsa huati tajari: —Tiadenipi ohuadsa: “Jehe, Jesopa ia tohuacahua-baqquihijine pajirahi” ¿tiquinejearorane? —najari Jeso. Naraha pohuadenipa cappinamanajari. Bodideni jabojo quinadsa pohuadenira imahaha canajari: —Aja ia Maridepa ¿nejeco madija? Puhuapa jojode, passo ssodadanima quejema naraha jojodedsa: “Epeje taji” naneje joma naha —quinajari.

Jerasacca madija Satanacca dodosse tocorime cajijari

Mateo 8.28-34; Maraco 5.1-20

²⁶ Jojode jicadsa denima tohuaccamanadsapa dsama Carirea jippehuaji bacco toquinajari. Pohuadeni huana tocanamanahihuajicca dsama oninipi Jerasa. ²⁷ Nahidsa Jeso toqquemoradsapa nahicca odsacca madija ojaria pohuadsa bacco najari. Najari madijapa Satanacca dodosse tocorime cajijari. Najaripa tocorimejine ccoroje mamadi najari. Odsadsa madi-jarahi. Tonocco-birihuajina mamadi najari. ²⁸⁻²⁹ Huajijiradsa tocorimejine totodacora najari. Nahi odsa panan-icca madijapa ecahuamanahijine cadenadsa biji jore quinaraha tocorimejine dacoradsa cadena

joca tajojo, joca tajojo najari. Isso naco cadenadsa jore quinaraha ttai tajojo, ttai tajojo najari. Dsama huaji tanihuaji madija madide nohuerahihuaaji naco tocorimejine joppa tajari.

Nadsapa Jeso toqquemoraraha najari madija naco qquedsippajari. Jesodsa bacco dsippadsapa madija bodicca tocorime toqquenahijine pohuadsa huati tajari: —¡Tocorime, tiqqenaji! ¡Najari madija tinebojo! —najari. Nadsapa Jeso baccohuaaji pohua pitodsa huitta nadsa jadsirema johua johua najari: —Jeso ¿nejecotohuira ticcajonajaro? ¿Ohua najidsode ticcajonajaroqui? Tiapi Dio deni tojajaricca Ejedeni tijani. ¡Epejena, ohua najidso tejeraji! —najari. ³⁰ Nadsapa Jeso huati tapomajari: —¿Tia onipi nejeco? —najari. Naraha pohua cacomerajari: —Ohua onipi Siba tani —najari. Pohnadenipa huapi taja najari pohua bodidsa madidsamanajari. ³¹ Pohua bodiccana Jesodsa huati toquinajari: —¡Jaho, ia dosse tininebaqqui-jeraji! ¡Nami odini huaji tanihuaji ia hua tidsima-jeraji, inaha! —quinajari. ³² Naraha nahi ssono huajira tanidsa poroco huapi taha jiparidsamanajari. Nadsapa tocorimedeni Jesodsa huati toquinapomajari: —Porocodsana iquejenaccana —quinajari. Nadsapa Jeso: —¡Jehe, porocodsana tiquejenana! —najari. ³³ Nadsapa najari madija bodicca tocorime jahininedsapa porocodsana jai tojed-simaridsajari. Nanaja porocopa coridsa inidi sseberanihuaji domo toqquedsippadsa diri-ri-ri todsippadsapa cojo-jo-jo quinajari, tocatojedsippajari. Je tocaniredsapa coridsadsa cacotedsanajari.

³⁴ Nadsapa poroco cacahuadedenipa aja poroco tocatojedsippahi qqui toquinadsapa ahuajicca odsa pananihuaji ima joppa tocanajari, ohuahapa huidsajahuaji ima joppa tocanajari. Nama naridsamanajari. ³⁵ Nadsapa madija huapima qquide jahijonana canajari. Jesohuaji bacco najonamanadsapa aja madija bodicca tocorime jahininedsa tonomihira qqui toquinajari. Nahi Jeso huahidsa huitta canajari. Etero huedsapomajari, bodi huatohue naco cajipomajari. Nadsapa madija huapima cappinamanajari. ³⁶ Qqui toquinapojaridenia aja madija tocorime cajiraha tonomihicca ima madija huapimadsa huati toquinajari. ³⁷ Nadsapa dsama Jerasahuajicca madija huapima cappinamanadsa poccadeni dsamadsa Jeso toccanihijine dossede dissassera tajari: —¡Ticcaniji, aji icca dsamadsapi timadi tejeraji! —quinajari. Nadsapa Jeso canoadsa toqquedsanidsapa tohuaccanimanajari. ³⁸ Naraha jai tojani-jaraccadsa aja madija bodicca tocorime jahininedsa tonomihipa Jesodsa huati tajari: —Jeso, tiadsa occana ¿jehe taqui? —najari. Naraha Jeso pohuadsa: —Poni, tiboji —najari. ³⁹ —Ticca odsahuajina ticcanina. Ticca madijadsa aji Djojine tinominicca ima huati tinanina —najari. Nadsa toccanidsapa nahicca odsa pananicca madija huapimadsa aja pohua tonomihicca, Jeso pohua inanomihicca ima huati taridsajari.

Jairo bedeni tonominicca ima, Amoneje amais-

soranaja coma taraha tonominicca ima

Mateo 9.18-26; Maraco 5.21-43

⁴⁰ Nadsapa Jeso coridsa jippe pohuadeni natti-huaji jai tojanidsapa bacco tanimanajari. Bacco tanimanadsapa nahicca madija huapima hu-atidsemanadsa: —¿Nija, ticcanijaroqui? Iadsa bacco tanidsapi bica tani -quinajari. Puhuato-hui madimanapoja najari. ⁴¹ Naraha nahidsa Jeso bacco nanidsatiraha Jairo naco nahihuaji bacco najonaja najari. Puhuapa jodiogenicca Dio Atti mamarihuajicca tamine. Puhuapa Jeso-huaji bacco nadsapa pohua bodipa: —Jesopa deni tojahi, ohuapi ajimani ojan -nadsa Jeso baccuhuaji pohua pitodsa huitta tocattedsa najari. Nadsapa Jesodsa huati tajari: —Jina, occa odsahuaji icadaccana. Occa ejedeni tomijirapaja -najari. ⁴² Jairo bedenipi ojari najaro, ponicca huajanopa 12 naraha huatiabote najaro. Nadsapa Jeso Jairocca odsahuaji toccajari. Madija pohua toccahi qqui toquinadsapa madija huapima pohuadsa jai tojaja najari. Si toccajari cad-sanapoja najari Jesopa mere tabote dsanapojari.

⁴³ Madija huapima jai tojahidsa naqui amoneje coma tajaro tohuanajaro. Ponipi dsamacoma onini amaissoranaja cajijaro. Poni coma tanicca huajanopa 12 naraha ama jicaquera tanicca tonahanajonajaro. Toponi totonanomidedenidsa totocca naraha tonomi-jerajaro. ⁴⁴ Naneje ponipi Jeso qqui tadsapi Jeso natti-huaji toccamissadsa tohuajiressissi nadsa pocca etero iponi bara inajaro. Nahi poni bara inahidsa amadsati amani totappajaro.

⁴⁵ Nanaja Jeso pajadsa huati najari: — ¿Nejecojarina ohua bara najarinaja? —najari. Naraha manaco madija huapimapa: —Iapi nohue ijirani —quinajari. Naraha Pedro atti: —Ia Maride, madija huapi taja najari. Tiapi ahuaji bai, ahuaji bai quinajaria —najari Pedro. ⁴⁶ Naraha Jeso pohua cacomerajari: —Madija ohua bara nahi nahato onani. Occa dacorehe pohuadsa tojani nahato onani —najari. ⁴⁷ Naraha amonejepi poni cacomaraha Jesojine ima tojani mittadsapi: —Jehe, nahato tahi —nadsapi cappinadsa tacca-cca canehe Jeso baccohuaaji poni pitonidsa huitta nadsa ponicca ima ecomerajaro. Aji poni Jesocca etero bara inadsa amadsati amani tomossijarocca ima huati tadsa madija huapima mittamanajari. ⁴⁸ Naraha Jeso ponidsa huati tajari: —Jehe asi, ohuadsa tibodi: “Jehe, Jeso ohua tonanomihijine pajirahi” tadsapi najarojine ticca dsamacomapi toccapa. Ticcanidsapi ticappina tejerana —najari.

⁴⁹ Jesopa amonejedsa huati huati tahipaja naraha jodiodenicca Dio Atti mamarihuajicca tamine pocca odsacca madija ojaria bacco najonajari. Ejedeni imehidsa huati tajari: —Jairo, ticca ejedenipi huatiapaja. Ia Maride Jesodsa huati tidsima tejeraji: “Epejena occa odsahuaji tiqqejeraji” tana —najari. ⁵⁰ Naraha Jeso ima mittadsapa Jairodsa huati tajari: —Tibodipi ticappina tejerana. Pina “Jehe, poni tonominijine” tadsapi ticca ejedeni tonominitohui —najari.

⁵¹ Nadsapa Jeso Jairocca odsahuaji bacco tadsapa aja Jeso pohuadsa jahijonajaridenipa

Jairocca odsadsa jai tojedsima-jarahijine Jeso ec-cocobaqquijari. Naraha jai tojedsimahipa Jeso pohua, Pedro, Huano, Satiaco, aji ejedeni imehi imeni todsimamanajari. ⁵² Madija huapima nahidsa queriqquimanajarideni oji oji camajari. Ponitohui huatideni huanacquiri nadsapa poccadeni ojiema johua johua quinajari. Naraha Jeso pohuadenidsa huati tajari: —Ojimana tiquinejeraji. Ejedenipi dsoqque-jerani. Huadajaro -najari. ⁵³ Naraha pohuadenipa ejedeni huatiani nahatoqquiri nadsapa Jeso atti jaja icanamanajari.

⁵⁴ Naraha Jesopa ejedeni huatiajaro porini-huaji toqquedsimadsa dsapanidsa mari nadsa jadsirema huahua najari: —¡Ejedeni, titehemaji! -najari. ⁵⁵ Naneje ejedeni ponipi camitemani-pomadsapi amadsati totehemajaro. Nadsapa Jeso attia: —Ticcadeni ejedeni tinajipamanaji -najari. ⁵⁶ Ponicca abi ami jabojo quinaraha huatidsemanajari. Naraha Jeso pohua attipa: —Ajijaro imapi huati taridsamana tejerana. Poni -najari pohuadenidsa.

9

Jesopa pocca dodosse tabaqqui 12 quinaha madija maride dosse inaridsabaqquijari

Mateo 10.5-15; Maraco 6.7-13

¹ Jesopa pocca dodosse tabaqqui 12 quinajaridenidsa huahua nadsa queriqquijari. Jesopa tocorimedsa pohuana denima atti dacorajari. Najaro pohua atti dacorehe pocca dodosse tabaqquidsa inanajaro. Pohuadenidsa

huati tadsa naco ajama najari: —Ohuatti, occa nahatohuema tiadenidsa onanana, aja madija bodidenicca tocorime ohuaha ohuaha naridsajarideni naco dosse dosse titimaridsa-baqquimana nahijine, onajaro. Madija huapima comani onihi onihi naha cajiridsamanajari-denicca naqui titinanomi-baqquimana nahijine, onajaro -najari Jeso. ² Pohuadeni motta jai tojaridsahijine Jesopa pohuadeni dosse inabaqquijari: —Diocca cacahuehecca ima tecomeraridsamanana. Madija comaqquiri najari-deni tiadenidsa bacco quinadsa naco titinanomi-baqquimana nana -najari.

³ Pohuadenidsa denima huati tajari: —Ticcadeni benehidsa naqui tiadeni totocahuejidsa ahua dsojomana tiquinejeraji. Ticcadeni saco, ticcadeni dsamatapa, ticcadeni dsiniro, najaro huapimapi tiaccamana tejeraji. Ticcadeni etero naqui pamehepi tiaccamana tejeraji. Aji tedsamanajarora ohojariri tinanamanaji. ⁴ Nadsama odsa panani bacco tiquinadsapi aji jai tijedsimapojarocca odsadsara timadimanaccaji. Nani odsa pananihuaji ticcadeni marinaja jicadsapi odsa panani onihihuaji denima jai tijapomaji. ⁵ Nadsama odsa panani onihihuajiccapa tiadenidsa: “Ajidsa timadimanaji, Diocca cacahuehecca ima imittanijine” quinaradsapa nani poccadeni odsa pananihuajipi tinebomanadsa jai tijeqquimani bica tani, onajaro. Jai tijeqquimadsa naqui temoridenicca sadariadsa ssiqui ma tajaro catojanijine pporo pporo tiquinana. Nahi poccadeni ibohue bodideni huatoma-manahijine -najari Jeso.

6 Nadsapa poccadeni benehidsa jai tojabaqquiridsajari. Odsa panani huapimadsa ima bicani icassiejeranijinecca mari mari nanaridsamana najari. Madija comaqquri najarideni naco ihinanomi-ridsabaqquimana najari.

*Huano Baotista dsoqquehi naticca ima
Mateo 14.1-12; Maraco 6.14-28*

7 Nadsama dsama arobeni Carireahuajicca tamine Herodepa Jesocca ima huati toquinahi mittajari. —Jesopa canahatori canajari —quinahi mittadsapa Herode pohua bodidsa: —¿Ima nejecoma najarona paji? —najari. Madija motadeni attidenipa: —Aja canahatori canajaripa Huano Baotista nahatonijari —quiquinanajari. ⁸ Madija ohuaha attideni naco: —Maittaccadsamacca Dio Atti cacomerabote Eria nahatonijari —quiquinanajari. Madija ohuaha attideni naco: —Maittaccadsamacca Dio Atti cacomerabote ohuaha nahatonijari itide —quiquinanajari. ⁹ Naraha Herode attipa: —Ohuana ocadossebaqquidsa Huanopa matto ca ijidsamanajaride. Nadsama aja canahatori canajari pohua tahimari ohuadsa huati huati totoquina najaripa ¿nejecoma najari napaja? —najari. Atti nama nadsapa Jeso qqui tahijine dissera tajari.

*Jeso madija 5 mil quinajarideni inajipabaqqu-
jari*

Mateo 14.13-21; Maraco 6.30-44; Huano 6.1-14

¹⁰ Jesocca dodosse tabaqqui bacco nanimanad-sapa poccadeni benehicca ima huati nanimanajari. Nahi dsotodepa Jeso pohuadeni pohuadenira odsa panani Besaidahuaji iac-cabaqquijari. ¹¹ Nadsama madijadenipa Jeso toc-cahi nahatoqquiri nadsapa dsotode jai tojamis-sajari. Bacco toquinadsapa Jeso pohuadenidsa huati tajari: —¿Nija, bacco tajonamanajaroqui? —najari. Nadsapa Diocca cacahuehecca ima mari icanabaqquijari, aja comaqquri najarideni naco inanomiridsa-baqquijari.

¹² Naraha Jesocca dodosse tabaqqui ¹² quina-jarideni maji toccahi qqui toquinadsapa Jesodsa huajiressimanadsa pohuadsa huati toquinajari: —Ajajari madijadeni huati tinabaqquijo toca-hadijanina. Pohuadeni tapari naco odsa onihi-huaji mitta naridsamanana. Aja iadsapa dsamat-apa nohuerahi —quinajari.

¹³ Naraha Jesopa: —Tiadeni tinaji-pabaqquimanajo —najari pohuadenidsa. Naraha pohuadeni attipa: —Naraha pan 5, aba pama naha icajini. Denima icappirani —quinajari. —¿Nadsapa pohuadeni tapari odsa pananihuaji mittade jaijanijinerane? —quinajari.

¹⁴ Aja madija Jesohuaji queriqquijaripa maqquideje 5 mil quinajarijine pocca dodosse tabaqquideni inajipabaqqui-manahijinepa pajiramana-jarajari. Naraha Jeso pohuadenidsa huati tajari: —Aja madija huapima jassi taridsahijine huati tinabaqquimanajo. Madija 50 naha tinequeriqquimana, ohuaha 50 naha tinequeriqquimana naridsadsa jassi jassi teri tinanaridsa-baqquimanajo, jipade

najoraridsamanahijine. Nama tinanaridsa-baqquimanajo -najari Jeso.

¹⁵ Nadsapa nama inanaridsabaqquidsapa madija huapima jassi taridsajari. ¹⁶ Nadsapa Jeso pan 5 naha inacca, aba pamaha idsaba nadsa Jeso memehuaji tocattamacossa nadsa Diodsa huati tajari: —Jehe, epejeni. Ticca daniji iadsa bica tahi -najari. Nadsapa Jeso canahatori canajarijine pan, aba najari tohuapidsa icanabobiridsadsapa pocca dodosse tabaqquidsapa da inabaqquijari. Pohnadenina aja madija jassi jassi teri najaridenidsa da inabaqqui-ridsamajari. ¹⁷ Da inabaqqui-ridsamandsa jipamanadsapa accararidsamajari. Jipamanahissa taraha mota tojjari. Pan bobi, aba ime mota inaccaniridsamandsapa quiqui 12 naha ijjiridsajari.

—*Jesopa Cristo-Mesia -najari Pedro*
Mateo 16.13-20; Maraco 8.27-30

¹⁸ Nahi dsotodepa Jeso Diodsa huati tahijine pocca dodosse tabaqqui tedseje pohnadeni motta madija nohuerahihuaji jassi tajari. Nahidsa Jesopa pohnadenidsa huati tajari: —Madija otahimari huati huati nanaridsamana nadsapa ohuadsa attideni ¿nejecoma nejecoma quiquinanahi? -najari Jeso pohnadenidsa.

¹⁹ Naraha pohnadeni attipa: —Tiadsa madija motapa: “Huano Baotista tijani” quiquinanajari. Ohuahadenipa: “Maittaccadsamacca Dio Atti cacomerabote Eria tijani” quiquinanajari. Ohuahadeni naco: “Maittaccadsamacca Dio Atti cacomerabote ohuaha nahatonijari” quiquinana-

jari –quinajari Jesocca dodosse tabaqqui attidenipa.

²⁰ Nadsapa Jeso pohuadenidsa huati tapomajari: —Naraha tiadenidsapi ¿nejecojari ojani? –najari. Nadsapa manaco Pedro huati tajari: —Tiapi Diocca dosseniji Cristo-Mesia tijani –najari.

²¹ Nadsapa Jeso attipa: —Jehe, bica tani. Naraha najaropi madija ohuahadenidsa tecomanaccana –najari.

*Jesopa pohua dsoqquehicca ima huati tapojari
Mateo 16.21-28; Maraco 8.31-9.1*

²² Jesopa pocca dodosse tabaqquidsa denima huati huati tajari: —Aji ohuapi Madija Bedi ojararoa nidsa dsotode najidsohue imeni ocasserani ohuanitohui. Jodiideni ime jocohuideni, dada toqqumade taminedeni, jodiidenicca marinaja maridedeni quinajaridenipa ohua ettajomananitohui. Nadsapi ohua inanadsoqqemananitohui. Naraha ohua ppa idsamanaraha huada huatinimade tojari nadsapi Abi Dio ohua nahatonihitohui –najari Jeso.

²³ Nadsapa Jeso madija huapimadsa huati tajari: —Aji “Jesocca madija iquejenana” tiquinadsapi tiadeni tohuini tiquinanicca tohui tetideni ajimamanaji. Ohuadsara disseraqquri tiquinaji. Madija tiadenidsa: “Ahua porimacossanidsa tidsoqqueji” quinadsa naco: “Jehe, odsoqqueni bica tani. Jeso onebo-jarahi” titidsanapomana nana huajjiradsa, onajaro.

24 Tiadenipi ticcadeni madie ohuadsa teccoramanadsapi madija tiadeni tonajicabaqqi-manaraha camittehe jiquejeranicca ticajimand-sanaponitohui. Naraha madija ohuaha pocca madie ohuadsa acco tadsa ajijaro namidsa madi-dsanapohuijine tohuinira nadsapa dsoqquehitohui. Dsoqquedsapa camittehe jiquejeranicca caji-jarahitohui –najari Jeso atti. ²⁵ —Madija naco ajijaro namicca biquehe tohuini madidsa, ajijaro dsamacca ima deni tojanicca tohuini madidsa naco huapima pohuadsa tojaraha Diotohui najaradsapa nidsa dsoqquedsa jororoni jiquejeranihuaji dsori tajarahitohui. Nadsapa pohua cajijaricca huapima ponima tojanitohui. ²⁶ Nadsama aji tiadenipi madija ohuaha noppinedeni ticappinamanadsa: “Jesocca madija oajerani” tiquinadsapi aji occa marinajadsa naqui: “Omittana onejerani” tiquineje camadsapi manaco ohuatti tiadenidsa: “Occa madija tiquejenerani” onanitohui. Ohuapi Madija Bedi ojararoa nidsaranibote ajijaro namidsa occaronapomadsapi occa deni tojehema, occa Abi Dio ssiejenema, Diocca dodosse tabaqqi memehujicca dacorehema occaronapomanitohui. Nadsana: “Onocco jidsa tani tiadenidsa” onanitohui. ²⁷ Naraha ohuapi pajissara tiadenidsa huati onajaro. Ajidsa tidomodeni huajaro motadenipi tidsoqquemana-jeraccadsama Diocca cacahuehe qqqi tiquinanitohui –najari Jeso.

*Jeso assire tojidsa, jidseremani najari
Mateo 17.1-8; Maraco 9.2-8*

²⁸ Jeso pohua tedsejemacca ima huati tapohui jicani huada 8 nani nattinipi ajijaro ima tojajaro. Jeso pocca Abi Diodsa huati tahijine ssonohuaji toqquemoradsapa Pedro, Huano, Satiaco quinajaridenira iaqquemorabaqquijari. Jai tojemoradsapa ssono tetepihuaji bacco tomoramanajari. ²⁹ Nahidsa Jeso Diodsa huatide tojanaja pano todsibehihi najari. Pohua pano todsibehidsapa pocca etero naqui tonopo-po nadsapi todsibehijaro. ³⁰ Nadsapa cattomama cananaja nahihuaji madija pamaha Jesodsa imahaha canajari. Najaridenipa Moisesi, Eria tedseje. Pohuadenipa maittaccadsamacca Dio Atti cacomeraqquri najarideni Jesohuaji ahuatoma-manajari. ³¹ Pohuadenihuaji tossi-ajabaqqi najaro, Dio madihihuajicca ssiajani pohuadenidsa ahuatohujanijaro. Jesopa madija huapimacca tabaccorehe manaconi tojahijine Jerosaredsa inanadsoqque-manahijinecca ima imahaha canajari Moisesi, Eria, Jeso quinadsa. ³² Naraha Pedro, Huano, Satiaco quinajaridenipa cahadijabote, noccodeni ssire-re nadsa Jeso pohua ssiejene qqui, pohuadsa madija pamaha ahuatoma-manahi qqui toquinajari.

³³ Moisesi, Eria tedseje Jesohuaji tohuedanibote nadsa Pedro Jesodsa huati tahijineraha pohua bodi ssamo tadsa pohuama pohua atipa: —Ia Maride, iapi ajidsa iquejenadsa bica tani. Ticcadeni odsa huahuaqquide 3 canehe inahatona. Nadsapi tiadsa, Moisesidsa, Eriadsa cananijine -najari. ³⁴ Pedro huati huati taja naraha essenipi pohuadeni tetepihuaji ccaronajaro. Ccaronadsapi pohuadenidsa ijihuajani

nadsa cappinamana najari. ³⁵ Nadsapa nahi essen bodidsa atti qquenajaro: —Ajajariपा occa Ejedeni. Pohuadsa ohuati huana tajaro. Pohuapa madija Idinide tojahijine ocattejidsapojaride. Pohua atti timittamananissa taji -najari Dio.

³⁶ Najari atti jicadsapa qqui toquinanaja Jeso pohua motta hua canajari. Naraha Pedrodenipa pohuadeni qqui toquinajaricca ima ecomamana naccajaro. Madija ohuahadsa huati naridsamana-jaracchahi.

Ejedeni bodidsa tocorime madidsaraha Jeso dosse ininejari

Mateo 17.14-21; Maraco 9.14-29

³⁷ Huada ssiaja ssonohuaji jai tojedsippanidsapa madija sibema Jeso bacco ijidsabaqquijari.

³⁸ Nahidsa madija ojaria Jesodsa huahua najari: —¡Ohua Maride, jari occa ejedeni qqui taccajo! Occa ejedeni ajajari ojarihi -najari.

³⁹ —Tocorime pohua dama inadsa johua johua najari. Pohua bodi tossamodsapa pitora pitora nanaja nadsapa pohua ajari ssabojene tocca tocca najari. Tocorime pohua inajidsoja najari, apaja inana-jarahi. ⁴⁰ Ticca dodosse tabaqquidsa huati onadsa: “Occa ejedeni tinanomimanajo” onaraha pajiramana-jarahi -najari imehi atti.

⁴¹ Nadsapa Jesoa: —Jaho, madija huapima Diodsa jehe tiquinanissa tejerani. Ajijaro namicca ima bica tejeranicca ticajimaneje najaro. Tiadeni mari mari ohocanabaqqui naraha ¿nejecoma nadsa ticahatterapadseje? Ticcadeni jeheniji pajiranissa tejeradsapi ohuadsa ocassera

taraha ¿nema nehe onahana-dsanaponijinequi?
 -nanaja: —¡Jari, ticca ejedeni ohuadsa teccajon-
 ajo! -najari Jeso.

⁴² Naraha ejedeni Jesohuaji tohuajiradsapa tocorimejine namidsa tohuedimajari. Pohuajine pitora pitora naraha Jeso pohua dosse ininejari. Pohua attipa: —¡Tocorime tabaccorabote! ¡Ejedeni tinebodsá tiqquenaji, onajaro! -najari. Nadsapa qquenadsa amadsati ejedeni tonomijari. Nadsapa Jeso ejedeni imehidsa inananijari.

^{43a} Nadsapa madija huapima jahijonajaridenipa jabojo quinaraha huatidsemanajari: —A, nama nahi qqui qqui inapo-jarade. Diocca nahatohuepi deni tojani -quinajari.

Jesopa pohua dsoqquehicca ima huati tapomajari

Mateo 17.22-23; Maraco 9.30-32

^{43b} Madija huapimapa Jeso ejedeni inanomihicca ima imahaha cananaja Jesopa pocca dodosse tabaqquidsá huati tajari: ⁴⁴—Aji ima huati huati onajaropi timittamananissa taji: Ohuapi Madija Bedi ojajaroa nidsa dsotode madija ojaría ohua ccaccoradsapa madija dsepedenidsa ojanitohui -najari.

⁴⁵ Naraha pocca dodosse tabaqquipa aja Jeso huati huati tajari mittamanahissa tajarajari. Diojine Jesocca imapi ahuatora tajaro, mittamana-jaracchijine. —¿Nejecoma tajaro? -quinahitohuiraha cappinamanadsapa Jesodsá huati toquina-jarajari.

—¿Nejecojarina deni tojajari? -quinajari
Mateo 18.5; Maraco 9.33-37

⁴⁶ Nadsapa Jesocca dodosse tabaqqupa pohuadenira imahaha canajari. Ahuaji huati, ahuaji huati quinadsa attideni ajama quinajari: —Aji ia huapimapi ¿nejecojarina deni tojajari? —quinajari. ⁴⁷ Naraha Jesopa pohuadeni bodi nahato tapojari. Nadsapa ejedeni idi nadsa, pohua inoridsa inahua najari. ⁴⁸ Nadsapa pohuadenidsa huati tajari: —Ajajari ejedenissa najaridsa tetideni huanagquiri nadsapi ohuadsa naqui tetideni huanagquiri najaro. Ohuadsa tetideni huanagquiri nadsa naqui ohua Cadossede Abi Diodsa tetideni huanagquiri najarossa najaro. Aja madija ejedenidsa huati huana tadsapa pohua tessedsa naco huati huana tajari. Najaripa madija huapimadsa acco camade dissera tadsapa pohua atti naco: “Ohuapi ajimani ojan, Diodsara ibora onani” nanaja najarina Diodsa bica tajari. Pocca ima bica tadsapi pocca deni tojehe pajissehecca ahuato tajaropaji —najari Jeso.

—Madija iadsa huadi tajaradsapa ia acco camajari —najari Jeso

Maraco 9.38-40

⁴⁹ Nadsapa Huano Jesodsa huati tajari: — Ohua Medsede, madija ohuaha tia oni hua nadsa madija bodicca tocorime madidsajari dosse ininehi qqui inade. Naraha pohuapa iadsa ccaridsa-jaradsa pohuadsa: “Epeje taji. Poni” inade —najari Huano. ⁵⁰ Naraha Jeso attipa: — Pohuadsa poni tiquinejeraji. Pohuapa occa ima inatabaccora-jerajaro. Madija nama najaripa iadsa huadi tajaradsapa ia acco camade tojajari —najari Jeso.

Samaritanodenipa Jesodsa nacasseraquiri najari

⁵¹ Jesopa memehuaaji toccamacossanihijine tohuajiradsa huati tajari: —Jerosarehuaaji occana. Ima ohuadsa oppina taraha nema nehe occana –najari. ⁵² Nadsapa dsama Samariacca odsa pamema nanihuaji huati toquinahijine Jesopa pohua tedsejema madija dosse inabaqquipojari: —Nanihuajicca odsadsa edacossanijine huati tiquinana –najari. ⁵³ Nadsapa jai tojajari, bacco toquinadsa huati toquinaraha samaritanodenipa odsa dade jiperaquiri najari. Pohuadenipa — Jesopa Jerosarehuaaji toccahitohui –quinahi ima nahatoqquiri nadsa nahidsa Jeso huadahijine jiperaquiri najari.

⁵⁴ Naraha pocca dodosse tabaqqui pamaha Satiaco Huano tedsejepa samaritanodeni atti: —Jeso ajadsa huadahijine jiperaquiri inani –quinahi ima mittamanadsapa Jesodsa huati toquinajari: —Ia Maride, iapi memehuaajicca jororonidsa jicahijine Diodsa huahua inana ¿jehe taqui? –quinajari. (Pina maittaccadsama Eriajine taminecca dodosse tabaqqui nama inanabaqquidsa jicajarissa inanabaqquina.)

⁵⁵ Attideni nama quinadsapa Jeso icattabaqqui nadsa pohuadenidsa huati tajari: —¡Nema tiquinejeraji, poni! –najari. —Occa tiquejenajaropi “manaco” inejerana. [⁵⁶ Ohuapi madija nanadsoqquede occajona-jerajaro. Madija onassiajabaqquihijinena occajonajarode] –najari Jeso. Nadsapa denicca odsa pamema najarodsana jai tojajari.

Madija Jeso huatimade toquejenahijineraha
Mateo 8.19-22

⁵⁷ Jahui jai tojadsapa madija ojaria Jesodsa huati tajari: —Ohua Medsede, tiadsa occaridsana onajaro -najari. —Tiadsa occaridsadsapi tia onebo nejeranijine -najari. ⁵⁸ Naraha Jesopa pohuadsa huati tajari: —Ohuadsa ticcaridsanjine tipajira-jeranitide. Ajana dsohuadsahuapa odinedeni cajiridsamanahi. Ppiriri naco tadsarideni cajiridsamanahi. Naraha aji ohua Madija Bedi oजारोपी odsa ocappira, ohuadanijinecca huahuada ocappira nani -najari Jeso.

⁵⁹ Nadsapa Jeso madija ohuahadsa huati tajari: —Ohuadsa ticcaridsaji, tia naqui occa dossenijidsa tidsepe ijiniijine -najari. Naraha pohua atipa: —Jehe ohua Medsede, occa abi huatiahi ppa odsahijine occa odsahuaji occanipocana. Nidsa dsotodena tiadsa occaridsanjine ¿jehe taqui? -najari. ⁶⁰ Naraha Jeso pohuadsa huati tajari: —Madijapa Diocca camittehe cappiramanajarideni caji tahi. Pohuadenina poccadeni madija dsoqquedsa ppa idsamanahijine pajiramanahi. Naraha tiapi ohuadsa ticcaridsaji. Diocca cacahuehecca ima tecomeraridsanjine. Icca benehi inajorani -najari Jeso.

⁶¹ Madija ohuaha naco Jesodsa huati tajari: —Ohua Medsede, ohua naqui tiadsa occaridsana. Naraha tahidepi occa odsahuaji occaniccana. Nidsa nanihuaji occa madijadsa occanicca ima huati onabaquiccana -najari. ⁶² Naraha Jeso najaridsa naco huati tajari: —“Occa odsahuaji occaniccana” tadsapi Diocca cacahuehedsa tidsepe ijiniijine tipajira-jerani. Najaro imapi pina

bani ssitedecca imassa najaro. Madija bani ssite inahijine pocca bobadsa joca icanaraha pohua nattihuaji qqui tanidsapa bani ssite inajarahi-tohui. Bani ssite inahijinepa banihuaji paja tocattarihi nadsana bica tahi -najari Jeso.

10

Jesopa pocca mamari tabaqqui 72 quinaha dosse inaridsabaqquijaricca ima

¹ Jeso pocca mamari tabaqqui mari icanabaqquia jicadsapa pohuadenidsa: —Odsa panani onihi onihi nanihuaji mari ocanabaqquiridsahijine -najari. Pocca mamari tabaqqui pohua tedsejema dosse inabaqquiridsapojari: —Madija otahimari mittamanapohuijine -nadsapa pocca mamari tabaqqui 72 quinaha Jeso icattejidsabaqquijari pohua tedsejema pama pama naha dosse inabaqquiridsapojari.

² Nadsapa pohuadenidsa huati tajari: —Madija Dio jiraha madimanahi huapi taraha pohuadeni maridea huapi tajarahi. Pina huidsajacca ppa nahi bono jica-jarajarissa quinaraha poredea madija pama quinajari. Nadsapi huidsaja jinede Diodsa huati tiquinaji, Pohua Atti maride dosse inabaqquidsa bono porede tohuapihijine -najari Jeso. ³ Nadsapa denima huati tajari: —Jai tijabaqquiridsaji. Naraha aji tiadeni dosse onabaqquijaropi pina edede bedi dsomaji panahihuaji tiadeni dosse onabaqquijarossa najaro.

⁴ Jai tijaridsadsapi saco, dsiniro huahuadsa, sadaria naco tiaccamana tajarajo. Jahui jai tijadsa naqui “Ahuajicca madijadsa

qqui ijidsaccana” tiquinejerana. Madija jahuidsa qqui tiquinadsa naco “Huati icanaccana” tiquinejerana. ⁵ Madijacca odsadsa bacco tiquinadsa jai tijedsimadsa jinededenidsa huati tiquinadsapi ajima tiquinana: “Diocca jonehe tiadenidsa tojaji” tiquinana, onajaro. ⁶ Nadsapa aja odsa jinede pajissa Diocca jonehe tohuini nadsa Diocca jonehe pahuadsa tojanijine. Naraha madija ohuahapa Diocca jonehe tohuini quina-jaradsapa epejena pahuadenidsa toja-jeranitohui. ⁷ Nadsama aja odsa jinede: “Aji occa odsadsa timadimanaji” nanaridsamana nadsapa nani poccadeni odsahuajira timadimanaccana. Odsa panani onihihuaji jai tija-jeraccadsapi odsa onihihuaji, onihihuaji ticahadjaridsa tejeraji, tijiparidsamana tejeraji, onajaro. Aji odsa bacco tiquinapojarodsara tiadeni totonajipabaqqui nadsa poccadeni dsamatapa titijipamana nana. Poccadeni passo, ahua bono ppejene ocassa tajari naco dse dse titiquina nana, onajaro. Nadsama madija Dio Atti maridera dsepe ijihissa tadsapa manaconi jirehe tiadeni totonajipabaqquimana nana. Aji tidsepedeni ijridsamanadsapi najaropi ticcadeni marinaja manaconissa najaro. ⁸ Odsa panani onihihuaji bacco tiquineje naridsaponi nadsapi nahicca madija: “Ticcadeni marinaja imittana” quinajarideni tiadenidsa: “Aja tijipamanaji” quinajaridenidsara titijiparidsamana nana. ⁹ Nahicca madija comaqquiri najarideni naco tinanomibaqquimanaja naridsapohui nana. Pahuadenidsa huati tiquinadsa naqui: “Tiadenidsa Diocca cacahuehepi huajira tani”

titiquina nana, onajaro –najari Jeso.

Madija iboqqiri najaridenipa caji tahi

Mateo 11.20-24

¹⁰ Jesopa pocca mamari tabaqqidsa den-ima huati tajari: —Nadsama odsa panani onihihuaji bacco tiquinadsa naqui tiadenidsa: “Ajidsapi timadimana tejeraji” nanaridsamana nadsapa jahui jai tijeqquimadsa pohuadenidsa ajima tiquinana: ¹¹ “Tiadenipi Diocca cacahue-hecca ima mittade jiperaqqiri tiquinadsapi epe-jena jaijeqquimanijine” tiquinana. “Tidsamari-denicca ssiqui emoridsa matajaro naqui catojanijine pporo inana, nani ticcadeni ibohue tibodideni huatoma-mananijine” tiquinana. “Naraha tiadenipi ;timittamananissa taji! Diocca cacahuehe tiadenidsa huajira taraha...” tiquinana, onajaro. ¹² Ajina, nidsa dsama jicadsa Diopa dsama huapima ima manaconi huati tadsapa najaro odsa pananicca madija occa marinaja mittade jiperaqqiri nadsapa najidsohue imenidsa madimanahitohui. Ajina, maittaccadsama odsa panani Sodomacca madijapa imasiri sseqqiri nadsapa Diojine jicaridsapojari. Naraha pohuadenipa nidsa dsama jicadsapi poccadeni imasiri manaconipa najidsohue oppina tajaro pohuadenidsa tojanitohui. Naraha occa marinaja mittade jiperaqqiri najaridenidsana najidsohue denima oppina tanicca tojanitohui, onajaro –najari Jeso.

¹³ —Jaho, madija odsa panani Corasinahuaji timadimanajarodenipi najidsohue oppina tanicca tiadenidsa ssonarinitohui. Jaho, madija

odsa panani Besaidadsa timadimanajarodeni naqui najidsohue oppina tanicca tiadenidsa ssonarinitohui. Ticcadeni odsahuaji ocanahatori canani qqui qqui tiquinaraha tibodideni cacajiqquimerehe nejerade. Ajina, maittaccadsama odsa panani Tirohuaji madimanapojarideni tabaccoraqquiri najari. Aji odsa panani Sidohuaji madimanapojarideni naco tabaccoraqquiri najari. Pohuadeni huapimapa aji ocanahatori canani qqui toquinapo-jarajari. Nassa qqui toquinadsapa Diodsa toquejenahijine najomana-jarahitohuiraha. Poccadeni imasirijine bodideni ocassera tadsapa etero jidsa tanicca huedsamanadsa dsippo oconidsa jassi tadsa oji oji quinahitohuiraha –najari Jeso. ¹⁴ — Naraha nidsa madija huapimacca ima cattemani-jinecca huada bacco tadsa Dio Pohua baccohuaji tidomodeni huadsapi Tirohuaji madimanajaridenidsa Dio pocca najidsohue ajimani tojanitohui. Sidohuaji madimanajaridenidsa naco ajimani tojanitohui. Naraha tiadenidsana Dio pocca najidsohue denima oppina tanitohui.

¹⁵ —Jaho, madija odsa panani Capernaohuaji timadimanajarodeni naqui najidsohue oppina tanicca tiadenidsa ssonarinitohui. Dio memehuaji madijaridsa bacco tiquinadsa tiadenidsa Pohua Attipa: “Jehe, tiadenipi bicaqquiri tiquinani” ¿napadsaja? ¡Nama najarahitohui! Ticcadeni ibohuejinepi nami odini huaji tani jicacquini nohueranihuaji tiadeni hua todsimahitohui –najari Jeso.

¹⁶ Naraha denima pocca mamari tabaqquidsa huati huati tajari: —Tiadenipi otahimari tecom-

eraridsamanadsapi madija tettidenidsa jehe quinadsapa ohuadsa naco jehe quinajari. Nadsama madija ohuahadeni tiadeni tohuattajo-baqquidsapa ohuadsa naco huattajojo tajari. Ohuadsa huattajojo tadsapa aja ohua cadosse-jaridsa naco huattajojo tajari –najari Jeso atti, pocca mamari tabaqqi jai tojaridsahijine dosse inabaqquijaridsa.

Jesocca mamari tabaqqi 72 quinajarideni jahiqquinijari

¹⁷ Jesocca mamari tabaqqi 72 quinajarideni jahiqquinidsapa huatidsemaneri nanidsa Jeso pohuadsa huati toquinajari: —Ia Medsede, tia onima huati inadsapi Satanacca dodosse tocorime ettidsa iboraqqiri nadija –nanimanajari.

¹⁸ Nadsapa manaco Jeso pohuadenidsa huati tajari: —Jehe, ohuana Diocca huadi Satana memehuaji Djojine ssonaronahi pina sssissiedessa naronahi qqui onajaride. ¹⁹ Occa dacorehe tiadenidsa onanaridsajaropi aja Satanacca dacorehe cajimanajaridenidsa tiadenina deni tiquejenanitohui. Nadsama oppina tanicca pina macca ttai tinanaqquimanadsa tiadeni cca todsa-jarahitohui. Dsorima ssidede naco ttai tinanaqquimanadsa tiadeni ttodi todsa-jarahitohui. Satana pohua, pocca dacorehe cajimanajarideni naco tiadeni tonajidsobaqquimana-jarahitohui. ²⁰ Naraha tocorime tettidenidsa iboraqqiri nadsa tetidsemanaraha najaro imapi ajimani. Ima denima bica taniccapi ajima nani: Occa madija

tiquejenadsapi tiadeni onipi memehuaiji Diocca papeodsa dsodo naridsani. Najaro imadsana denima tetidsemanaji, onajaro –najari Jeso.

Jesopa Imehidsa huati tajari, pocca mamari tabaqquidsa naco huati tajari

Mateo 11.25-27; 13.16-17

²¹ Huati taha jicadsapa Jeso Dio Corimejine huatidseri nadsa Imehidsa huati tajari: — Jehe Abi, tiadsa ohuatidsejaro. Tiapi memehuaiji madimanajarideni Cacahuade tija, namihuaiji madimanajarideni Cacahuade tija najaro. Jehe, madija nahatoqquiri najaridenipa ajijaro dsamacca ima tocahatteraraha Tiadsa jiperacquiri najari. Nadsama tijinepi ticca ima pajissacca mittamana-jarahijine pohuadenidsa ahuatora tinanajaro. Naraha madija motadenipa: “Iapi ssamoqquiri inajaro, pina ejedenissa inajaro. Dio, ia acco ticamabaqquiji, iatta naccaraho” quiquinanajari. Jehe, nadsama tijinepi ticca ima pajissacca mittamanahijine pohuadenidsana ahuato tinanajaro. Jehe Abi, ipajissa! Tia jipa tinadsapi tijine nema tinanajarode, onajaro. Nadsama tijinepi ohuadsa bica tani, onajaro –najari Jeso. ²² Nadsapa pocca mamari tabaqquidsa huati tapomajari: —Occa Abipa ohuadsa pocca nahatohue huapima inaridsajaro. Occa Abina pohua motta ohuadsa nahato tahi ojari najari. Occa Abipa nadsama Pohua ojari naha ohuadsa nahato taha nama najonajari. Ohuapi Abi Diocca Ejedeni ojani. Ohua naqui nadsama. Ohua ojari onehe Pohuadsa nahato onehe nema onajonajaro. Nadsama

ohua Dio Bedi ojadſapi madijadeni ohuadsa toquejenajaripa pohuadenidsa jipa onadsapi ojine pohuadenipa Dio Pohuadsa noccodeni tojidserahitohui –najari Jeso. ²³ Nadsapa Jeso pocca mamari tabaqqui icattabaqqui nadsa huati tajari: —Aji ohua ocanahatoriri canajaro tinoccodenidsa qq̄ui tiquinaridsajaropi Dio tiadenidsa ima bicani inanajaropaji. Ohuapi madija Idinide ojeje najaro aji tiadeni tinoccodenidsa qq̄ui tiquinajaropaji. Dio naco tiadenidsa ima bicani inanajaropaji. ²⁴ Maittaccadsama Dio Atti comeraqq̄ui najarideni, jodiodenicca taminedeni naco occa nahatohue aji jidapana tiadeni qq̄ui tiquinajarocca qq̄ui toquinahijine tohuini quinaporaha tahide tojicapodsapa qq̄ui toquinajarajari. Aji occa marinaja timittamanajarocca naqui najaro mittamanahijine tohuini quinaporaha tojicapodsapa mittamana-jarajari –najari Jeso.

Diocca dosseniji deni tojanicca

Mateo 22.34-40; Maraco 12.28-34

²⁵ Jassi nahuajanidsa aja jodiodenicca marinaja maride pohua bodipa: —Jeso nattome onana –nadsa totehemadsa huati tajari: —Mamaride ¿nejecoma onadsa camittehe imadidsanaponicca bacco onanijine? –najari. ²⁶ Naraha pohuadsa Jeso huati tajari: —¿Nejeco ima hua hua tatte Diocca dosseniji dsodo nanidsa? Hua tadsapi ¿nejeco imara tiadsa ahuato tatte? –najari Jeso.

²⁷ Nanaja jodiodenicca marinaja maridepa Dio Atti ecomerajaro:

—“Tiadeni Medsede Diodsa tetideni huanagguiri naji. Tibodideni huatonissa tadsa, dacoco tijiradsa Pohnadsara disseragguiri tidsanapomanadsapi Pohnadsa tetideni huanagguiri nanijine. Tinorideniccadsa naqui tetideni huanagguiri naji, pina tiadenidsa tetideni huanagguiri najarossa naji”

nade Dio Atti dsodo nanidsapi -najari jodiodenicca marinaja maride atti.

²⁸ Nadsapa pohnadsa Jeso huati tajari: —Huati tinani bica tani. Nema tidsanapodsapi Diodsa timadinitohui -najari.

²⁹ Naraha jodiodenicca marinaja maride pohna bodi attipa: —¿Nejecojaridenina ohuitoricca? Najaro Moisesicca marinaja Dio Atti dsodo nanipi ¿ohuacahuanissa tajaroqui? -najari. Nadsapa Jesodsa huati tajari: —Diocca dosseniji najarossa onananijineraha ¿nejecojaridenina ohuitoricca? -najari jodiodenicca marinaja maride.

Samaritano tahimari

³⁰ Jodiodenicca marinaja maride attipa: —¿Nejecojaridenina ohuitoricca pohnadsa ohuati huana tanijine? -nadsapa Jeso manaco pohnadsa ajijaro ima huati tajari: —Jodiodeni ojariapa odsa panani Jerosarecca jahui odsa Jericohuaji toccanihuaji toccajari. Toccaraha... bobotidedeni dama quinadsa idagguimanaha, huatiabote nadsa eterori ssiti quinehe jica nadsa jahui inorinidsa inebomanadsa jai tojanijari. ³¹ Naraha dada toqquimadepa huati ajama canaha jahui toccanaja madija biquerajari ponacossahi

qqui taraha toccarihuaja-dsanapojari. ³² Nahi dsotode naco dada toqquimade bijideni accode rehuitadeni quiquinanajari ojaria najaro jahui toccajari. Najari naco madija biquerajari ponacossahi qqui taraha toccarihuaja-dsanapojari. ³³ Nadsapa madija ohuaha dsama onini Samariacca madija naco najaro jahui toccajari. (Aja Samariacca madijadenidsa: samaritano, quiquinanajari. Pohuadenipa jodiideni tedseje ahuaji jipera ahuaji jipera quinajari.) Nadsapa samaritano quiquinanajari ojaria najaro jahui toccadsa madija biquerajari ponacossahi qqui tadsapa pohuatohui huati huana tajari, pocca madija jararaha. ³⁴ Nadsapa samaritano uva bono ppejene ahua oquini icanejemadsa bobotidedenijine biquerajari ecanajijari. Pocca bejo jore inacossadsapa pocca bojodsa ibarijari. Nadsapa odsa onihihuaji iaccajari, nahidsa ecahuahijine. ³⁵ Naraha huada ssiaja samaritano toccabote nadsa odsa jinededsa ccarara denario capamehe dahaha icanajaro. “Coma tajari tecahuana. Nidsa occanipomadsa tiadsa aja tecahuajari manaconi mota tojadsapi da onapomanijine” nahi nade samaritano attipa -najari Jeso jodiidenicca marinaja maridedsa.

³⁶ Naraha Jeso pohuadsa denima huati huati taccajari: —Aja madija 3 quinajaripa dada toqquimade, Rehuita, samaritano quinajaridenipa ¿nejecojarina paja aja bobotidedenijine biquerajaridsa pina pohua inoriccassa najari? -najari Jeso.

³⁷ Nadsapa jodiidenicca marinaja maride

ecomerajaro: —Aja madija biquerajaridsa huati huana tajarina paja -najari. Nadsapa pohuadsa: —Jehe, ticcanidsapi nema tidsanapoji -najari Jeso.

Jesopa Marta Mariadenicca odsadsa maride tojajari

³⁸ Jesopa pocca dodosse tabaqqui tedseje poccadeni benehidsa denima jai tojeqquimadsapa odsa capamema nanidsa bacco toquinajari. Nanidsapi amoneje onini Marta madijaro. Najarona Jesodsa huahua najaro: —Occa odsadsa timadiccaji -najaro. Nadsapa Jeso toqquedsimajari. ³⁹ Martacca eso Maria naqui nanidsa madijaro. Jeso maride tojadsapa Mariapi pohua atti mittade huittajaro. ⁴⁰ Naraha Martapi ponicca odsa bica tocananijine, huapima jipaqquimanadsa bica tanijine dsapani ijiridsajaro. Dsapani jica-jeradsa ponidsa tonajoni nadsa Jesodsa huati tajaro: —Ohua Medsede, ohua motta occa odsadsa odsepe ijini. Ohue-mecote ohua acco cama-jeradsapi ¿tiadsa bica taqui? Ponidsa huati tinaji, ohua acco camac-anijine -najaro.

⁴¹ Naraha Jeso Martadsa huati tajari: —Marta, tiapi ticca odsa bica tocananijine, jijipa naco tinajoranijine najarotohuira teti huatojaro. ⁴² Naraha ima onihina denima bica tajaro. Najarotohuina teti huatonijine bica tajaro. Mariapi ima denima bica tajarocca icattejidsajaro. Jehe, epejena. Ponipi occa marinaja mittana. Tiahuaji dosse onejerani -najari Jeso.

11

Diodsa huati huati inanijinecca ima

Mateo 6.9-15; 7.7-11

¹ Jesopa pocca dodosse tabaqqui tedseje dsama onihihuaji maride ccaridsadsapa Diodsa huatide tojajari. Huatide jicadsa pocca mamari ojariapa Jeso pahuadsa huati tajari: —Jari, ia naqui Diodsa huati huati inanijine ia mari ticanabaqquiji, pina Huano pocca mamari tabaqqui mari icanabaqquijarissa tinanaji –najari.

² Nadsapa Jeso pahuadenidsa huati tajari: — Diodsa huati tiquinadsapi ajima tiquinaji: “Jehe Abi Dio, iapi ticca ejedeni Tiadsa huati inajaro.

Jehe, Tiapi nahatojide tijirani ojari tani. ¡Bica tinani!

Madija huapima: ‘¡Dio, Tiapi deni tijani!’ quinana, inajaro.

Ticca cacahuehe huapimadsa tinanaridsana, inajaro.

³ Itapari naco huada huajjiradsa iadsa da da tajo.

⁴ Madija iadsa tabaccorehe inanamanadsa poccadeni tabaccoreheda: ‘Epejena, huadi onejerani’ inadsapi manaco icca tabaccorehe epeje tinanaji, Abi Dio. Icca tabaccorehe manaconi najidsohue iadsa tinana-jeraji, inajaro.”

Jesopa: —Diodsa huatide disseraqquri tiquinaji –najaricca ima mari icanabaqquijari

⁵⁻⁶ Jesopa Diodsa huatide tocahatterahijine denima mari icanabaqquijari: —Ajima najaro imadsa tiadeni mari ocanabaqquina. Dsome

nocconi titesse huaji tanicca bacco nadsa tita-pahijine nohueradsapa titesse tinoridsa madi-jaridsa huahua tajaro: “Otesse huaji tanicca bacco najonahi. Naraha otapari nohuerahi, pohuadsa da onahijine ocappirani. Ohuadsa pan huatimade tojari naha da tajo” tajaro. ⁷ Naraha odsa bodicca pohua cacomerajari: “Ohuadsa huahua tejeraji, noccobiji cahacossani. Occa ejedeni ohuinoridsa cahadijahi. Tiadsa da on-ahitohuiraha otehemaniijine tojera tani” najari tinoricca -najari Jeso. ⁸ —Naraha tiadenidsa huati onajaro: Tinoriccapa titesseraha pohuadsa huahua tapodsapa qquena-jarahi. Naraha ticappina-jeradsa huade dissera tinadsana qque-nahitohui. Qquenadsapa ticappiranicca tiadsa da inahitohui -najari Jeso. ⁹ —Nadsama ohuapi tiadenidsa huati onajaro: Abi Diodsa huati huati titiquina naji, onajaro. Dio Pohuadsa huati tiquinadsapi tiadenidsa ticcadeni huatinajassa nehe da inanitohui. Pina tohuini tanicca qquide dissera tinadsapi bacco tinanitohui. Najarossa najaroa Diodsa huatide dissera tinadsapi Po-huapa ticca huatinaja tiadsa inapajiranissa tan-itohui. Pina madijacca odsadsa tiqquedsimani-jine tohuini tadsa odsa jinededsa huahua tadsapi tiadsa noccobiji icatabojidsanitohui. Najarossa najaroa Diodsa huati huati tiquinadsapi ticca-deni huatinaja mittahi. ¹⁰ ¡Pajissa! Madija Diodsa huati tadsapa Diopa pohuadsa pocca hu-atinaja da inanitohui. Madijapa Diodsa huatide dissera tadsapa Dio Pohuajine pocca huatinaja inapajiranissa tanitohui. Madijapa pina Diocca noccobijidsa huade dissera tajarissa nadsapa Dio

pohuadsa noccobiji icatabojidsanitohui, onajaro.

¹¹ —Ajana, madijapa pocca ejedeni aba tohui huati tadsapa ¿pohua bedidsa macca da ina taco? Nohuerahi. Tiadenidsapa madija nama najari nohuerajari. ¹² Madija ohuaha pocca ejedeni tacara nappanitohui huati tadsa naco ¿pohua bedidsa dsorima da ina taco? Nohuerahi. ¹³ Tiadenipi tabaccorehe ticajimanaraha ticcadeni ejedenidsa bica tahicca dade nahatoqquri tiquinani. Aji tiadeni naqui ticcadeni Abi Dio memehuaji madijaridsa huati tiquinadsapi tiadenidsa bica tahicca dade denima jipa tahi. Pohua Corime tohui tiquinadsa naqui Pohuadsa huati tiquinadsapi tiadenidsa da inahitohui, onajaro -najari Jeso.

Jesocca dacorehe ahuato tajaroraha pohuadsa ima inanamanajaro

Mateo 9.32-34; 12.22-32; Maraco 3.20-27; 9.40

¹⁴ Nadsapa madija pohua bodidsa Satanacca dodosse tocorime madidsajarijine ebene siri tojajari. Atti cappiraha madijari. Naraha Jesojine ebene siri bodicca qqenadsapa ebene biquemanidsa atti cajipomajari. Nadsapa nahihua-jicca madija qqui toquinadsapa: —A, bica tahi. ¡Jesopa nahato tahi! -quinajari. ¹⁵ Naraha nahihua-jicca madija ohuahadeni pohuadsa pajissa quina-jaradsa mota attidenia: —Ajana, Jesopa tocorimedenicca tamine Beheosebocca dacorehe cajijarijinea pocca dodosse tabaqqui dosse ininebaqquijaripaja -quinaraha maid-samanajari. ¹⁶ Naraha mota bodidenia: —Jeso nattome inana. ¿Nejecojaricca dacorehe

cajijari? –quinadsapa Jesodsa huati toquinajari: —Jari, pajissa Diocca dacorehe ticajidsapi memehuaajicca nahatohue bicabote ahuato tinanaji. Qqui inana, inajaro –quinajari Jesodsa. ¹⁷ Naraha Jesopa pohuadeni bodi nahato tajari. Pohuadeni bodi huatomanahijine pohuadenidsa ajijaro ima huati huati tajari: —Dsama huapimacca taminepa madija ecahuabaqquiraha dsotode pocca madija cahadiremanadsa ahuaji atti ahuaji atti quinadsapa pocca cacahuehe inassamomanajaro. Nadsapa pocca madija domo tocca tahi. Najarossa najaro odsa cajariecca madija cahadiredsapa poccadeni ima tossamodsapi tojaribaqqui tahi. ¹⁸ Ima najarossa najaroa Satanapa pocca dodosse tabaqqui madija bodidsa madidsamanajarideni dosse ininebaqquidsapa pina pohua pocca madija tedseje cahadirejarissa najari. Nama nadsapa pocca dossehe inassamodsapi sara tabaqquihitohuiraha. ¿Nadsapa pocca dodosse madija bodicca dosse ininehijine jipa taco? Jipera tahi. Aji ohuadsa tettidenipi: “Beheosebocca dacorehedsa pocca dodosse dosse tininejari” tiquinaraha najaropi pajissa jerani. Nassa najaro pajissa tojadsapi Satana pohua pocca dodosse tabaqqui inajaribaqquiridsahitohuiraha. ¹⁹ Ajina, ohuadsa: “Beheosebocca dacorehe ticajini” tiquinaraha ticadeni mamari tabaqqui naco tocorime dosse dosse ihininebaqquimana najari. Naraha pohuadenipa ¿nejecojaricca dacorehedsa nama quinajari? Aja ticadeni mamari tabaqqui da corehe cajimanadsa tocorime dosse ininebaqqui-

manaraha pohnadenidsa: “Beheosebocca dacorehe ticajimanani” ¿tiquinattaqui? Nema tiquinejerani, onajaro. Nadsama ¿nejecotohui ohuadsa nema tiquinajaro? Tibodidenipi quejemama canajaro -najari Jeso. ²⁰ —Naraha ohuapi Diocca dacorehe ocajije najaro Satanacca dosse tabaqqui dosse dosse ohoninebaqquiridsa najari. Nema onanadsapi tiadenidsa ahurato onanajaro: jidapana Diocca cacahuehe tiadenidsa bacco najonajaropaji, onajaro -najari Jeso atti.

²¹ —Nadsama Satanapa dacorehe cajiraha ohuapi deni ojajaro. Pohnapa ajamani, pina ajijaro ima tiadenidsa huati onabote najarossa najaro. Aja madija dacorajaripa dsepe cajidsa pocca odsacca huapima ecahuanissa tajararo. ²² Pohna bodipa: “Odsepe ocajidsapi daco ojirani” naraha madija ohuaha denima dacorajari bacco nadsapa odsa jinede dama inajari. Dsepecca equididsa jinede biji jore inadsapa pohna dsepetaji huapima inaccadsa da inabaqquijaro. Ima najarossa najaroa aji occa dacorehe deni tojadsapi Satana jore onaqquidsapa pocca dodosse tabaqqui dosse dosse ohoninebaqqui najaripaja -najari Jeso.

²³ Nadsapa Jeso denima huati huati tajari: —Nadsama madija ohuadsa toja-jaradsapa occa huadi tojajari. Pohna naco madija ohuadsa toquejenahijine pohnadeni acco icamabaqquijaradsa pohnajine ohuadsa tohuajimanajari, onajaro -najari Jeso.

Satanacca dodosse tocorime toccaraha cca-nipoma tahi

Mateo 12.43-45

²⁴ Jesopa ima onihidsa mari icanabaqquijari. Pohua attipa: —Nadsama tocorime ojaria madija bodidsa madidsaraha qquenadsapa toccajari. Aji dsama huamo tanihuaji, passo nohueranihuaji pohua madihijine qquide toccadsa qqi qqi naridsaraha pohua madihijine bacco tajarajari. Nadsapa: “Jehe, occa mamadi botehuaji occa-nipomana” najari tocorime atti. ²⁵ Nadsapa ccanipomajari, bacco nanidsa madija pohua bodi tohuirehi qqi tadsapa pina odsa johue tocanehe huisso tocanajarossa najaro. ²⁶ Nadsapa tocorime toccapomadsa pohua tessedeni tocorime 7 quinaha jina inanibaqquijari. Najaridenipa denima tabaccoraqquiri naraha pohua tedseje jai tojedsimajari, madimanahijine. Nadsama ima nema najaro madijadsa tojadsapi pocca madie tabaccora taporaha dsotodepi denima totabaccorajaro –najari Jeso.

Huatidsehe icajinicca ima

²⁷ Nadsapa Jeso maride tojadsapa amoneje madija sibemadsa quejemajaropi jadsirema huahua najaro: —Jehe, ticca amidsapi ima bicani tojani. Ponipi bedi nahato tajari inanapidsapa huatidsehe cajini –najaro amoneje attini.

²⁸ Naraha Jeso huati tajari: —Jehe, naraha madijapa Dio Atti mittamanadsa najarossa inanamanadsapi najaridenidsana ima bicani tojanitohui. Huatidsehe naqui cajimanahitohui –najari Jeso.

Madija tabaccoraquiri najarideni Jeso canahatori canahijine tohuini quinajari

Mateo 12.38-42; Maraco 8.12

²⁹ Nadsapa Jesodsa madija toqueriqquija dsanapohui najari. Nanaja madija si tocajajari canadsa mari icanabaquidsapa ajama najari: —Nadsama aja jidapana madija madimanajaridenipa tabaccoraquiri nadsa ocanahatoriri cananijine tohuira huati toquinaraha occa nahatohue onahatona onejerani. Naraha ocanahatoriri cananicca ima ojariena ahuato onananitohui. Najaropi Dio Atti cacomerabote Jonasocca imassa najaro.

³⁰ Najaroa aji Jonaso pina huatiajarissa naraha Djojine tossiajadsa madipomajari. Pocca ima odsa panani Ninibehuaji madimanapojarideni mittamanadsapa: “Jehe, ajararipa Diocca dosseniji, Dio Atti imittanijine” quinade. Najarossa najaro imadsa Diopa madija jidapana madimanajarideni inahattabaquihitohui. Aji ohua Madija Bedi ojararopi nidsa ohuatiadsa Djojine ossiajadsapi omadipomanitohui. Pina Jonasocca imassa najaro ohuadsa tojanitohui, onajaro –najari Jeso.

³¹ —Nadsapi nidsa madija huapimacca ima cattermanijinecca huada bacco tadsapi Dio Pohua baccohuaji tidomodeni huanitohui. Nanidsapi dsama Sebahuaji tamine amoneje madijaropi ticcadeni ima tiadenidsa inassonariniijine huati tanitohui. Poni attinipi: “Ohuapi dsama huaji tanihuaji omadiraha tamine Saromocca nahatohue omittanijine occajonade. Naraha tiadenidsa madijaripa denima nahato taraha

pohua atti mittade iboqquiri tiquinajaro. Nema tiquinadsapi Dio tiadeni tohuattajo-baqquidsapa bica tani, onajaro” nanitohui Sebahuaajicca tamine amoneje attinipi -najari Jeso. ³² —Najaro huadadsa odsa panani Ninibehuaji madimanajarideni naco ticcadeni ima tiadenidsa inassonarimananijine huati toquinahitohui: “Tapi Jonasocca ima imittadsa ibodi cacajiqquimerade. Naraha tiadenidsapa Dio Atti cacomerabote deni tojjari madiraha pohua atti mittade iboqquiri tiquinajaro. Nema tiquinadsapi Dio tiadeni tohuattajo-baqquidsapa bica tani, inajaro” quinahitohui Ninibecca madija -najari Jeso.

Dio ssiejene pina jojororossa najari

Mateo 5.15

³³ —Nadsama jojororo naco toquehessidsapa ahuatora tanihuaji tocanajimahijine jarahi. Ssapotodsa naco boco icanahijine jarahi. Jojororo toquehessidsapa aja pohua cacahittari nahidsa cacahittari najari, nahi madija odsa bodihuaji jahidsimajarideni ssiajani cajimanahijine. Najarossa najaro Dio ssiejene tiadenidsa bacco teje nadsapi tibodideni tossiajaridsani -najari Jeso. ³⁴ —Inoccopi essiredsa pina jojororossa najaro. Inocco bica tadsapi essire ssiajani ijini. Idsepedsa naqui damade nahato inajaro. Emoridsa naqui ccaridsade nahato inajaro. Icca tarabajidsa naqui ipajirajaro. Ibodi huatode naqui nahato inajaro. Naraha inocco bica tejeradsapi pina inocco dsidsi tajarossa najaro, issamo tani. Dama inanijine naqui

ssamo tani, iccaridsanijine naqui ssamo tani, icca tarabaisa naqui ssamo tani. Imapi najarossa najaro tibodidenidsa Dio ssiejene toqquedsimadsapi tibodidenidsa ssiaja taridsani. Naraha Dio ssiejene toqquedsima-jeradsapi tibodidenidsa pina dsidsini ijiridsajarossa najaro -najari Jeso. ³⁵ —Aji tiadenipi: “Nahatoqquiri inani. Ibodi ssiaja tani” tiquinadsapi ipaji! onajaro. Najaro ssiajanipi occa imassa nejeradsapi ssiajani ticajimana-jerajaro. Dsidsini oppina taniccadsana timadimanajaropaji, onajaro. ³⁶ Naraha tibodidenidsa Dio ssiejene ijd-sapi, aji dsidsinicca ima oba tanicca tibodideni tecahuamana-jeradsapi, otahimari Diocca ima tibodidenidsa ahuato tanissa tanitohui. Pina jororo ssiejene tiadenidsa tossiajabaqquijarissa nahitohui -najari Jeso.

Pariseodeni, jodiodenicca marinaja maridenedeni tedseje huahuattajo toquejenahicca ima

Mateo 23.1-36; Maraco 12.38-40; Roca 20.45-47

³⁷ Jesopa madija mari icanabaqquia jicadsapa marinaja pariseodsa jehe najari ojaria Jesodsa huati tajari: —Occa odsahuaji tijipanijine ticcajonaji -najari. Nadsapa Jeso najaricca odsadsa toqquedsimajari. Jipahijine huahuanaridsa huitaritari. ³⁸ Nadsapa pariseopa pohua dsepe ssahua najari, —Oppina tahicca bara onahitide -nadsa. Nama nama quiquinanajari marinaja onini pariseodsa jehe quinajarideni huapima. Naraha Jesopa pohua dsepe ssahuarahi huitaridsa pariseo qqui tadsapa huajo najari.

³⁹ Naraha pohuadsa Jeso huati tajari: —Marinaja

pariseodsa jehe tiquinajaro, ticcadeni madiepi pina dsedse, parato huapihuajira ssahua ssahua tiquinajarissa najaro. Naraha tibodidenina pina dsedse parato bodihuaaji ssahuarahi oba tajarissa tiquinajaro. Tibodidenidsa tibotimanajarocca ima ijijaro. Tohuini tiquinajarocca ima naqui ijijaro. ⁴⁰ ¡Ssamoqquri tiquinani! Diopa essire nemanehē inahatojaro. Puhuapa ġibodi nahato tajaraco? Ibodi nahato tahi. ⁴¹ Nema nadsapi ticcadeni tabaccorehe tinebomanaji, tibodideni tohuirenijine. Nadsapi maidsehedsa dsiniro denima tiadenidsa totoja nejeranijine. Madija tohuati nahanaqquri najarideni naco acco acco titicanabaqqumana najo. Nadsana ticcadeni madie naqui tobicanitohui, onajaro.

⁴² —Jaho, marinaja pariseodsa jehe tiquinajaro, tiadenipi huahuattajo tiquejenanitohui. Ticcadeni odsa inorinicca ppa nahi dsamatapa quequejema majo bica tajari pore tiquinadsa naco badsira taraha mota Diodsa da da titiquina najari. Najaro ticcadeni marinaja ajimanicaraha tecahuamananissa tajaro. Naraha Diocca dosseniji deni tojaniccapi tecahuamanajerajaro. Diocca dosseniji deni tojaniccapi madija ticamidsabaqqumana-jaradsa tettideni pajiranissa tanijine. Diodsa naqui tetideni huanacquiri nanijine. Jehe, najaro dosseniji tecahuamana-jeradsapi ticcadeni ima dsori tajaro. Aji ticcadeni odsa inorinicca ppa nahi mota Diodsa da da titiquina najari bica tahi naraha najaro dosseniji ajimanicca aji Diocca dosseniji deni tojanicca tadsajani tecahuamanaji, onajaro.

⁴³ —Jaho, marinaja pariseodsa jehe tiquina-

jaro, tiadenipi huahuattajo tiquejenanitohui. Ticcadeni Dio Atti mamarihuaji jassi tinarinjinepi deni toquejenajaridenicca huihuittari tohuini titiquina najaro. Aji dadahuajicca jahuidsa jai tijaridsadsa naqui madija tiadenidsa: “¿Nija, bica tinani? Tiapi deni tijani” quinahijine naqui tohuini titiquina najaro.

⁴⁴ —Jaho, tiadenipi huahuattajo tiquejenanitohui. Tiadenipi pina madija ppa todsahibote noccobiri tohuatorajarossa tiquinajaro. Madijapa najaro tonoccobiri tetepihuaji jai tojeqquimadsapa madija nahidsa ppa todsaraha ssamoqquiri nahi. Nama quinadsapa ima oppina tanicca pohuadenidsa tojajaro. Madija tiadeni qqui toquinadsapa pina bicaqquiri tiquinajarossa naraha tibodidenicca tabaccorehepi ssamoqquiri najari –najari Jeso.

⁴⁵ Naraha jodiodenicca marinaja maride ojaría Jesodsa huati tajari: —Mamaride, tetti nema nadsapi iadsa naqui ima tinahanajaroa –najari.

⁴⁶ Naraha Jesoa: —Jehe, jodiodenicca marinaja maridedeni tiadeni naqui huahuattajo tiquejenanitohui. Tettidenipi: “Diocca dossenijidsa ajima tiquinaji” tiquinaraha ticcadeni marinaja najo taniccara tinaharimanajaro. Nadsapi tijinedeni ima toccanajani najaro. Najaro imapi madija ecahuamananjine pajiramana-jarahi. Tiadeni naqui najaro ima madija ecahuamananjine acco ticamabaqquimana-jarahi.

⁴⁷ —Jaho, tiadenipi huahuattajo tiquejenanitohui. Tiadenipi Dio Atti cacomeraqquiri napojarideni noccobirideni tetepidsa siba hua tinamaromanajaro, “Poccadeni ima bica tade, eti

ajima-jerana” tiquinadsa. Naraha najaridenipa ticcadeni ididenijine jicaridsajari. ⁴⁸ Pohuadeni noccobiri tetepidsa siba hua tinamaromanadsapi pina ticcadeni ididenicca imadsa jehe tiquina-jarossa najaro. Pohuadenijine Dio Atti cacomeraqquri najarideni jicaridsajari. Tijinedenina pohuadeni noccobirideni nahatoridsajaro.

⁴⁹ —Nadsama Diopa Pohua bodi nahato tapodsapa ajama najari: “Madijadenidsa Ohuatti cacomeraqquri najarideni dosse onabaqquihitohui. Occa dodosse tabaqqi naco pohuadenidsa dosse onabaqquihitohui. Naraha motapa inajicamanahitohui. Motana jicahijine itaqquidso-ridsamanahitohui” napohui nade Dio. ⁵⁰ Nadsama aji jidapana timadimanajaropi tiadenidsa najidsohue imeni ssonarinitohui. Aja dsama inahatopodsama Pohua Atti cacomeraqquri najarideni tojicadsa emenedeni toccajaro manaconedeni tiadenidsa ssonarinitohui. ⁵¹ Aja tahidepa Abeona pohua ohuahajine dsoqquepojari. Najari emene toccapodsama aja Dio Atti cacomeraqquri najarideni naco inajicamanaja najonapohui najaria aja Sacaria inanadsoqque-manahi bacco najonajaropaji. Sacariapa Diodsa dada toqquma bacconihuaji aji Diodsa da tahijinecca huaahuanari inorinidsa inanadsoqque-manajaripaja. Jehe, pajissara tiadenidsa huati onajaro: Aja Dio Atti cacomeraqquri najarideni huapima jicajonajari manaconedeni jidapana timadimanajarodenidsa Diojine najidsohue ssonarinitohui.

⁵² —Jodiodenicca marinaja maridedeni tiadeni

naqui huahuattajo tiquejenanitohui. Dio Atti madija mari ticanabaqquimanahissa tadsapa madija Dio Atti tocahatterahijineraha. Dio Atti mari ticanabaqquimanahissa tajaradsa, ticcadeni marinaja najo tanicca tinaharimanadsa naqui tijinedeni madija Dio Atti tocahattera-jarajari. Nema tiquinadsapi pina Diocca cacahuehecca noccobiji ticahacossamanajarossa najaro. Nadsapa madija Diocca cacahuehedsa jai tojedsima-jarajari. Tiadeni naqui pocca cacahuehedsa jai tijedsima-jerajaro -najari Jeso.

⁵³ Jesopa poccadeni ima huati taha jicadsapa najaro odsadsa toqquenadsa toccajari. Naraha jodiodenicca marinaja maridedeni pariseodeni tedsejepa poccadeni ima acconi huatideni jami-manajari. Nadsapa najaro huadadsa Jesocca ima tossamonijine ima idimamanadsa huada huajijiradsa pohuadsa ima onihidsa huati, ima onihidsa huati dsanapomanajari. ⁵⁴ Jeso ima bica tejeranicca ecomeranjine tohuini quinadsa pohuadsa huati huati dsanapomanajari. Pohuadsa ima inassonarimananjine disseraqquri naraha Jesopa ima pajiranissa taniccara ehecomera najaro.

12

—*Paji, pariseodenicca imassa tinanamana-jeraji -najari Jeso*
Mateo 10.26-27

¹ Isaraeri potemahi jodiodeni mota marinaja pariseodsa jehe quinajaridenipa Jesocca marinaja inassamomananjine disseraqquri naraha

madija Jeso pocca marinajatohui queriqquid-sapa denima tohuapi, denima tohuapi najari. Madija panahicca tohuapihi dsanapod-sapa poadeni amori ahuaji ttai, ahuaji ttai quinajari. Naraha nahidsa Jesopa pocca dodosse tabaqquidsana tahide huati tapojari: — Pariseodenipa mamaisamana najari. “Dio Atti cacahuade iquejenani” quinaraha poccadeni marinaja Moisesicca marinajadsa inaharimanajaro. Poccadeni madie naqui Dio Attissa nerani. Poccadeni ima najimehecca caji tani. Najaro poccadeni marinaja, poccadeni madie maidsehecca totojaribaqqui najaro. Pina pan ssaja tahijine quequejemacca imassa najaro. Paji, poccadeni imassa tinanamana-jeranjine dacoco tijiraji. ² Nadsama madija huapima poccadeni maidsehecca imapi inajimamanaraha nidsa dsotodepi ahuato tanitohui. Ima ahuatora tanicca huapimapi ahuatomanitohui. Aji ima bicani ahuatora tanidsa inanamanajaro, aji ima bica tejeranicca ahuatora tanidsa inamanajaro naqui ahuato tanitohui. ³ Nadsama dsome ima huati huati tiquinadsa naqui nidsa dsotodepi ssiajanidsana ticcadeni imapi ahuato tanitohui. Odsa coba canahuajanini bodidsa ima ojidsa huati huati tiquinadsa naqui dsotodepi amossinihuajina madija huapima mittamanahijine ticcadeni ima madija ohuahana jadsirema ecomeramananitohui, onajaro –najari Jeso.

—¿Nejecojaridsara ticappinamananjine?
 -najari Jeso
Mateo 10.28-31

4 —Nadsama otessedeni, ohuatti tecomeraridsamanadsa ticcadeni madiepi pina occa marinajassa tinanamanadsapi madija ohuahadenipa tiadenidsa: “Jicana, jicana” quiquinanadsapa ticappinamana tejerana. Madijapa tiadenidsa: “Jicana” quinadsapa timedeni jicanijine pajiramanaraha tijicani nattinipi tiadeni tonajidso-baqquipomahijine ssamoqquiri nahi. Aji jororoni jiquejeranihuaji tiadeni hua todsimabaqquihijinepa ssamoqquiri nahi. Nadsama tiadenipi pohuadenidsa ticappinamana-jeraji, onajaro. ⁵ Naraha Diodsana ticappinamanaji. Puhuapa: “Tijicaji” nadsapa tijicanitohui. Najarina tijicani nattini naco tiadeni tonajidso-baqquihijine nahato tajari. Puhuapa aji jororoni jiquejeranihuaji tiadeni hua todsimabaqquihijine naco nahato tajari. Madijadsapi ticappinamana tejeraji naraha Diodsana ticappinamanaji, onajaro -najari Jeso.

6-7 —Diopa madija huapimacca ima nahato tajari. Aji titatideni conani huapima onini huade naco nahato tajari. Diopa dsama huapimacca cacahuade nahato tajari. Ajina: “Ppiriri mitta onana” tiquinadsapi ppiriri da da quinahihuaji dsiniro bedenidsa ppiriri mitta mitta titiquina najari. Ppiriri ⁵ nahapa ccarara capamehedsa mitta mitta titiquina najari. Naraha ppiriripa huati ccarera tahiccaraha Diopa ppiriri naco ecahuabaqquijari. Ppiriri naco pohua dsoqquehicca huada bacco tejeraccadsapi dsoqquejaraccahi. Nadsama tiadenipi ticappinamana tejeraji, onajaro. Ppiriripa ajamani toque-

jenaraha Diopa pohnadeni ecahuabaqquijari. Naraha Diopa tiadenidsana denima huati huana tajari. Tiadeni tohuacahua-baqquihissa tahitohui, onajaro –najari Jeso.

*Madija ohuahadeni mittamanahijine:
—Ohuapi Jesocca ojani –quinajarideni
tahimarideni*

Mateo 10.32-33; 12.32; 10.19-20

⁸ —Nadsama ohuapi tiadenidsa huati onajaro: Madija ojariapa madija ohuaha mittamanahijine pohua cacomeradsa: “Ohuapi Jesocca madija ojani” nadsapa manaco ohuapi Madija Bedi ojararoa Diocca dodosse tabaqqi memehua-jicca mittamanahijine pohnadenidsa ohuacom-eranitohui: “Ajajari madijapa occa madija tojahi” onanitohui. ⁹ Naraha madijapa madija ohuaha mittamanahijine pohua cacomeradsa: “Ohuapi Jesocca madija ojarerani” nadsapa manaco ohuapi Diocca dodosse tabaqqi memehua-jicca mittamanahijine ohuacomeranitohui: “Najaripa occa madija jarahi” onanitohui –najari Jeso.

¹⁰ —Aji ohua Madija Bedi ojararodsa madija atti atti quinadsa ohua itamassomanaraha nidsa dsotode: “Icca ima inebona” quinadsapa poccadeni imasiri, poccadeni tamassohue Diodsa ecomeramanadsa Diopa poccadeni imasiri epeje inananitohui. Naraha Dio Corime itamas-somanadsa, pohnajine tojararodsa maidsehe huahua quinadsa naco Diopa pohnadeni atti huati ajama-jarahitohui. Poccadeni imasiri epeje inana-jeranitohui.

11 —Naraha jodiidenipa nidsa otahimari tiadenidsa tojajaro acconi huadimanadsapa poccadeni Dio Atti mamarihuaji tiadeni tohuaqquedsimabaqqui-manahitohui. Tiadeni tonajidso-baqquimanahijine ima cacattemededenihuaji, taminedenihuaji naqui tiadeni tohuaqquedsima-baqquimanadsapa ticcadeni ima tecomeramananijine ¿nejecoma onapadseje? tiquinejerana. Occa marinaja tecomeramananijine naqui ticappinamana tejerana. ¹² Nani pohuadeni tedsejema terimanadsa huati tiquinanijinepi Dio Corimena tiadeni tonahattabaqquihitohui, onajaro -najari Jeso.

—Paji, tidsepetaji tohuapinijine tohuira tibodideni huato-jeraji -najari Jeso

¹³ Nadsapa aja madija panahicca ojaría Jesodsa huati tajari: —Mamaride, occa atodsa huati tinaji. Aja occa abi dsoqquejari dsepetajibote mota ohuadsa pohuadsa nanijine. Occa atodsaha ojari nani -najari. ¹⁴ Naraha manaco Jeso attipa: —Otesse, ohuapi ticca abi dsoqquejari dsepetajibote ticca atodsa, tiadsa nanijine cacahuade ojajerani -najari Jeso pohuadsa.

¹⁵ Nadsapa Jeso huapimadsa huati tajari: —Paji, todsepetaji acconi tedimana tejeraji. Tibodideni tecahuamanaji, aji tidsepedeni tossenijine tohuira tibodideni huato-jeraji. Najaro tidsepetaji huemadsa tetidsemanehe timadimanani ojari-jerani. Diotohuira timadimananina bica tajaro -najari Jeso.

¹⁶ Nadsapa Jeso pohnadenidsa ajijaro namidsa imadinicca ima huati tajari: —Madija dsepe sse tajari nami bicani cajidsapa pocca huid-sajacca porede toquejenadsapa huemahi pore pore quiquinanajari. Aroso jidsadsa trigo mota totoja najari. ¹⁷ Nadsapa dsepe sse tajari bod-ipa: “¿Nejecoma onanijine? Occa huidsajacca trigo mota cacahuahijine odsa onihi ocappirani” najari. ¹⁸ Nadsapa pohua bodi huatojari: “Jehe jidapanana nahato onani. Occa trigo huadsaridsajaricca odsara otaboridsadsa den-ima ojine odsa motaraqquiri naridsana. Nani najarodsana occa trigo, aja huapima ocajijaricca ohuacahuaridsahijine” najari. ¹⁹ Pohua bod-idsa naco: “Nadsapi aji ohua otahimari huati onanijine: Jehe, jidapapi sse onani. Huajano huapi taha omadinijine opajirani. Jehe, nadsapi pina jassi onana. Pina ojipa, dse onajaro ohuatidseri ohuatidseri naridsana, onanitohui” najari. ²⁰ Naraha Diopa pohnadsa huati tajari: “Tiapi ssamo tinani. Ajijaro dsomedsa tidsoqquenitohui” najari. “Aja tidsepetaji, aja huidsajacca bonoma tecahuaridsajaripa tidsoqquedsapi ¿tiadsa nama dsanapopadsaja? ¡No-huerahi! Tidsepetajipa madija ohuahadsana to-jaridsahitohui” najari Dio. ²¹ Imapi nema najaro madija pohua tonanabichijine todsepetaji in-ehemaraha Diodsapa pina cappirajarissa najari, Diodsa huatidse-jaradsa -najari Jeso.

*Dio pocca ejedeni ecahuabaquijari
Mateo 6.25-34*

²² Nadsapa Jeso pocca dodosse tabaqquidsa huati tajari: —Tiadenidsa ohuattipi: Timadi-mananijinecca ticappiramanani noppineni ticappinamana tejeraji, onajaro. Pina ¿nejecora oji-papadseje? ¿Nejecora ohuedsapadseje? tiquinejeraji. Najarotohuii tibodideni huahuatomacca nejerana, onajaro. ²³ Icca madiepi dsamata-paha ojari-jarahi. Icca madiena denima bica tajaro. Essire naqui etero edsanijinea ojari-gerani. Essirecca imana denima bica tajaro —najari Jeso. ²⁴ —Jari, tosicocca imadsa tibodideni huatoma-manaji. Tosicopi huidsajacca ppa nahi pperaqquiri, huidsajacca ppa nahi bono poreraqquri nadsapi nidsa dsotode jipamananijine ppa nahi bono naco odsadsa ecahuamanajarajari. Naraha Diona ponidenidsa jipamananijine da da ihinanajari. Diopa tosicodenidsa huati huana taraha tiadenidsana denima huati huana tajari. Tiadenidsa naco tijipamananijinecca da da ihinanahitohui. ²⁵ Naraha tiadenipi ¿nejecotohui tibodideni: ¿Denima omadi-dsanapopadseje? tiquinajaro? Najarotohui tibodideni huahuatomacca nadsapi ¿ticcadeni madie denima tinanamananijine nahatoqquri tiquinaqui? ¡Nahatoqquri tiquinegerani!
²⁶ Najaro nahatohue ssamoqquri tiquinaraha Diodsapi najora tani. Nadsama ¿nejecotohui ima onihitohui, ima onihitohui tibodideni huahuatoma najaro? Pina Dio tiadeni tohuacahuabaqqui-jarajarissa najari. Naraha “Jehe, Diona nahato tahi ia cacahuabaqquihitohui” tiquinana, onajaro.

²⁷ —Jari, qqui tiquinanaja mohue ppata tarid-

sajari. Naraha mohuepa tarabaidsera, huepe picocora, etero ssequiquira taraha ppata taridsadsapa pina etero bicani huedsamanajarissa najari. Ajana maittaccadsama naco Isaraeri potemahidenicca tamine Saromopa dsepe ssejide radsapa etero bicani huatini ccara tanicca huedsadsapa bica tataja naraha mohuena denima bicaqquri najari. ²⁸ ¡Jaho, ticcadeni jeheni-jipi badsira tani! ¿Nejecotohui tiadenipi “Dio ia tohuacahua-baqquihi” tiquinejerani? Ajina, dseropi etero huedsanijine cappiraraha Diojine poni mohueni cajidsapi pina etero bicani huedsajarossa nani. Dseropi mohueni cajini bica taraha huada huada huada nadsa dseqqueri nadsapi botta ina tani. Naraha dseropi ajimanicca. Tiadenipi pina aji dserossa tiquinejerani, Diocca cacatidse tabaqqi tiquejenajaro. Nadsama Diopa tedsamananijinecca etero naqui denima tiadenidsa da inanitohui, onajaro. ²⁹ Naraha tiadenipi ticappinamaneri naridsajeraji. “¿Nejecora ojipapadseje? ¿Nejeco dsamatapa ppejenera dse onapadsaja?” tiquinejerana, onajaro. ³⁰ Ajijaro dsamacca madija Diodsa toquejena-jarajarideni huapimapa nama nama nanaridsamana najari. Poccadeni jiji-pa tohuira pohuadeni dsepetaji tohuira bodideni huahuatoma-mana najari. Naraha tiadenipi Abi bicahi ticajimanani. Pohuapa ticappiramananicca huapima nanahato najari. ³¹ Diocca cacahuehecca imadsa tibodideni huatomaridsanijine Diotohuira tataridsamana naji. Nema tiquinadsana Diojine ticappiramananicca tiadenidsa inanaridsanitohui, onajaro -najari

Jeso.

—*Memehuaji Dio madihidsa ima bicanira tinahapimanana –najari Jeso*

Mateo 6.19-21

³² —Nadsama tiadenipi occa edede, occa cacacahua tabaqqui tiquejenajaropi ticappinamana tejeraji. Aji tiadeni ohuacahua-baqquijaropi tipamema naraha occa Abipa tiadenidsa: “Aji occa cacahuehepi tiadenidsa onanajaro” najari. ³³ Nadsama ohuatti tiadenidsa ajima najaro: Tidsepedenitaji manaconitohui da tinaridsamanaji. Najaro manaconi dsiniropi madija cappiramana-jaridenidsa da tinabaqqui-ridsamanaji. Aji tidsepedenitaji, dsiniro naqui ¿nejecodsara tecahua-manadsa ticajimana-dsanaponijine? ¿Aji dsiniro dsamini totabaccorarera tanicca caji taqui? Nohuerani. Naraha cappiramanajaridenidsa da tinabaqquiridsa-manajaropi pina memehuaji aja Dio madihidsana ima bicani tiadenidsa tinahapimanapojarossa najaro. Najaropi Diocca daniji bicabote jiquejeranicca tiadenidsa da inanitohui. Najaro Dio pocca danijidsapa bobotide botihijine nohuerahitohui, poni maccanijine naqui ssari nanijine nohuerani. ³⁴ Ajina, tiadenipi ajijaro namicca todsepetaji tohui, dsiniro tohuira timadimaneje nadsapi najarodsara tetidserid-samanajaro. Naraha Dio Pohua tohuini nahicca tohuira timadimanadsapi Diocca danijidsana tetidsemananitohui, onajaro –najari Jeso.

Ia Medsede ccnipomahitohui inajorehe imadinijinecca ima

Mateo 24.43-44

35-36 Jesopa pohua ccaronapomahitohui najoramanahijine mari icanabaqquijari. Pohua attipa: —Tiadenipi tinajoramanaji, pina madija pohuadeni medsede cajicajicca ejetehuaji tocadsa “dsome bacco nanihitohui” quinadsa poccadeni etero huedsamana, jojororo iquehessi-mana nadsa najoramanajarissa tiquinaji, onajaro. Ajana pocca dodosse tabaqqi pohuatohui najoramanadsa bacco nanidsapa noccobijidsa coba coba nadsa amadsati icatabojid-samananitohui. ³⁷⁻³⁸ Dsome nocconi bacco nanihitide, ssiajajonadsa itide ssamoqquri naraha noccodeni bissadsa pohuadeni medsede bacco nanidsapa pohuadenipa ima bicani cajimanahitohui. Pajissara tiadenidsa huati onajaro: Pohuadeni medsede pohuadenidsa huatidsedsapa: “Huahuanaridsa jassi tahuajaniji” nahitohui. Nadsapa jipamanahijine pohuana taparideni dsojo dsojo nahitohui, pina poccadeni dodossessa nahijine.

³⁹ —Nadsama tiadenipi ajijaro imadsa tibodideni huatoji: Odsa jinedepa bobotide ccajonahijinecca maji nahato tapodsapa pocca odsadsa botide qquedsima-jarahijine pocca odsa ecahuanissa tanitohuiraha ssamo taja najari. ⁴⁰ Naraha tiadenipi tinajoramanehe timadimanaji. Madijapa ohua Madija Bedi ojajaroa occaronapomanicca huada ssamoqquri nahi. Nidsa huatideni ajamama canadsa bacco onanipomanitohui –najari Jeso.

Madijacca dodosse ibora tadsapa ima bicani

cajihitohui, tabaccora tadsapa nanajidso tojahitohui

Mateo 24.45-51

⁴¹ Nadsapa Pedro huati tajari: —Ia Maride ¿aji titohui inajorehe imadinijinecca ima huati huati tinajaropi iadsaha ojarinijinequi? ¿Madija huapimadsarane? —najari.

⁴²⁻⁴³ Nadsapa Jeso pohnadenidsa ima onihi huati tajari: —Madija dsepe ssebotepa huaji tani toccahijine najoradsapa pocca dodosse ojariadsa huati tajari: “Occa madija tecahuabaqquina. Jipamanahijine bacco tadsa pohnadeni tapari da da titinabaqqui nana” najari. Nadsapa dsepe ssebote toccajari.

—Nadsapa pocca dodosse nahato tadsa, ibora tadsapa madija ecahuabaqquihissa tahitohui, pina pohua dossede attissa inananitohui. Nama nadsapa dsepe ssebote ccanidsa qqui tadsapa pocca dodossedsa ima bicani inananitohui.

⁴⁴ Nadsapi pajissara tiadenidsa huati onajaro: Madija dsepe ssebotepa pocca dodosse ibora tajaridsa ajama nahitohui: “Tiapi occa odsa, occa huidsaja, odsepetaji huapima tecahuaji” nahitohui —najari Jeso.

⁴⁵ —Naraha dsepe ssebotecca dodosse tabaccora tadsapa pohua dossede attissa inananitanitohui. Pohua bodi attipa: “Ohua dossede ccanihijine najoccahi, qqui tajarahi” nahitohui. Nadsapa pohua dossedecca dodosse tabaqqi maqquideje inajidsobaqqi, amoneje inajidsobaqqi nahitohui. Jipadera ccaridsadsa coma tanicca dse dse naridsadsapa comani ahahua nahitohui. ⁴⁶ Pocca dodosse tabaccorabotepa

pohua dossede ccanihicca maji, huada ssamo tadsa pohuatohui najora-jarajari. Nama naridsa nanaja dsepe ssebote bacco nanidsapa pocca dodosse inajidsohuitohui. Dsoqquedsapa iboqquri najaridenihuaaji inanahitohui -najari Jeso.

⁴⁷ —Jehe madijapa pohua dossede atti nahato taraha pohua attissa inananijine ibo tadsapa nanajidso inahananitohui. ⁴⁸ Naraha madija ohuahapa pohua dossede atti ssamo tadsapa pohuajine bica tejeradsapi cossi cossi inebo nahitohui. Jehe, Dio naco madijadsa dosse dosse najari. Pocca dossenijissa inanadsana bica tani. Diopa iadsa: “Occa madija tecahuabaqquina” nadsa pocca madija ecahuabaqquihissa tadsana bica tani -najari Jeso.

Jesojinepa madija pohuadenira pohuadenira naridsamanajari

Mateo 10.34-36

⁴⁹ —Nadsama ajijaro namidsa occaronajaropi pina dsippo diji tajarossa onanadsa madija huapimadsa ssonariridsanijine. Nidsa imasiri manaconi ojanijinepi Diocca najidsohue madijadsa ssonariridsanitohui. Jaho, najaro ima jidapana ohuadsa toja naccaraho, onajaro. ⁵⁰ Aji ohua imasiri manaconi ojanijinepi najidsohue imeni onahanaccanitohui. Najaro imapi nahato onaraha najaro ima ohuadsa toja-jeraccadsapi aji nacassera onajaropaji. ⁵¹ Tiadenipi tibodideni: “Jehe, Jesopa ajijaro namidsa jonehe tojaridsanijine ccajonajari” ¿tiquinajaroqui? Naraha ohuapi najarotohui occajona-jerani.

Madija motapa ohuadsa jehe quinajari, madija motapa ohuadsa jehe quina-jaradsapa pohuadenira pohuadenira naridsamanahitohui. ⁵² Aja jidapana naco odsa cajariecca madija 5 quinajari pamahapa pohuadenira, huatimade tojari najaripa pohuadenira quinajari. Nama quinajaripa cahadire cahadire naha nama dsanapomanahitohui. ⁵³ Nadsama ojine madija pohuadenira pohuadenira quinadsapa ajima nanitohui: Dsabissopa imehidsa huahuadi nahitohui. Imehipa bedidsa huahuadi nahitohui. Imenipi bedenidsa huahuadi nanitohui. Bedeni naqui imenidsa huahuadi nanitohui. Massodinipi jinomadinidsa huahuadi nanitohui. Jinomadini naqui massodinidsa huahuadi nanitohui –najari Jeso.

Meme qquide nahatoqqiri naraha pohuadenidsa ima dsati tojani qquide ssamoqqiri najari

Mateo 16.1-4; Maraco 8.11-13

⁵⁴ Jesopa madija huapimadsa ima denima huati huati tajari: —Maji toccahihuaji meme essen caji tani qqui tiquinadsapi: “Passo ccabote nani” titiquina najaro. Nadsapi nema neneje najaro. ⁵⁵ Dsama napticossanihuajicca jojode jojo najonani qqui tiquinadsa naqui: “Icca dsamadsa ppocoranitohui” titiquina najaro. Nadsapi nema neneje najaro. ⁵⁶ Jaho, tiadenipi pina maidsajidede rabotedenissa tiquinajaro. Meme qquide nahatoqqiri, nami qquide nahatoqqiri tiquinaraha aji jidapanacca ima dsati tojajaropi

qquide ssamoqquri tiquinani. Najaropi Diojine ajijaro dsamadsa Cristo-Mesia pohua dsepe ijiridsahi tiadenidsa ahuato taraha ticahattera-jerajaro –najari Jeso.

Aja tia huadidepa huati tinassonapona nanicca ima

Mateo 5.25-26

⁵⁷ —¿Nejecotohui tiadenipi ima bica tanic-cara ticattejidsamana-jerajaro? –najari Jeso.

⁵⁸ —Nadsama madija ohuahadsa ima tinanadsa naqui pohua attipa: “Tia ohuaccana ima cacattemahuaji” nadsa naco tahide tia tohuaccaraccadsama pohua tedseje ticcadeni ima ticattemamanapoji. Pohua huati tinassonapojo, nahi taminehuaji tia tohuacca-jarahijine. Ticca ima ticattemamanapo-jeradsapi ima cacattemahuaji bacco tinadsapi ima tinanajaro manaconi todsepe tijanitohui. Toponi cocorohuaji tia coroidsimamananitohui. ⁵⁹ Tiadsa huati onajaro. Nani toponi cocorohuaji timadidsapi amadsati tiqquena-jeranitohui. Ima tinanajaro manaconi nemaneha tinajicanissa tadsana tiqquenanitohui –najari Jeso.

13

Tibodideni cacajiqquimera-jeradsapi tijicarid-sanitohui

¹ Jeso mari mari naraha madija jahijonajaridenia aja tamine Pirato dsama Carireacca madija inajicajaricca ima Jesodsa huati toquinajari: —Carireacca madijapa Jerosarehuaji Diodsa dada toqquimadsa poccadeni da naqquinaja

iaqquedsimamanajari. Bani ette tojahicca Diodsa da quinahijine ssipori huisside toquejenaraha tamine Piratocca dodosse tabaqquideni bacco todsimamanadsapa ijinedeni ahuamamanajari. Pohuadenijine bani bedi dade toquejenajari emenedeni bani bedi emene tedseje quejemajaro –quinajari Jesodsa.

² Naraha manaco Jeso pohuadenidsa huati tajari: —Tettidenipi: “Carireacca madijapa imasiri sseqquiri nadsa oppina tanidsa jicajari” ¿tiquinajaroqui? Aja “Carireacca madija motapa imasiri badsira tehe cajimanadsapa pohuadenidsa ima oppina tehe bacco nejerajaro” tiquinanitidija. ³ Naraha imapi nema nejerani. Tiadeni huapima Dio Attidsa ibobo tinadsa tibodideni cacajiqquimera-jeradsapi dsoqqeche jiquejeranicca bacco tiquinanitohui –najari Jeso.

⁴ —Ima onihi naqui ajima najaro: Jerosaredsa passojine hui todsani onini Siroe inorinidsa siba hua nahuajanijaro tirocossadsa madija 18 naha jicajari. Najaridenidsa naqui tettidenipi: “Imasiri sseqquiri nadsa oppina tanidsa jicajari” ¿tiquinajaroqui? Aja “Jerosarecca madija motapa imasiri badsira tehe cajimanadsapa pohuadenidsa ima oppina tehe bacco nejerajaro” tiquinanitidija. ⁵ Naraha imapi nema nejerani. Tiadeni Dio Attidsa ibobo tinadsa tibodideni cacajiqquimera-jeradsapi dsoqqeche jiquejeranicca bacco tiquinanitohui –najari Jeso.

Ahua iquiera bono-jarahicca ima

⁶ Jesopa ajjaro namidsa imadinicca imadsa mari icanabaqqujari, madijadeni bodi

cacajiqquimera-jeradsapa jicahi noppine bodideni huatohuujine. Pohua attipa: — Maqquideje ojariapa pocca huidsajadsa ahua iquiera ppa todsahi huajari. “Nanihuaji occana, ahua iquiera bono cajihitide” najari. Naraha nahihuaji bacco tadsapa bono cahua najarajari. ⁷ Nadsapa huidsaja cacahuadedsa huati tajari: “Huajano tahideccadsa qquide occajona, huajano dsotodeccadsa qquide occajona, jidapana naqui qquide occajona naraha bono qqui onajaraha. ¡Ca tinajo! Pohuama nahidsa hua dsanapona onejerani” najari. ⁸ Naraha huidsaja cacahuadepa manaco huidsaja jinededsa huati tajari: “Ohua medsede, ca inajaraccana. Ajari huajanodsa jabohuaji hui onahuajanidsa ahua huahuassa tadsajani ocanejemahijine” najari. ⁹ “Nama onanadsa bonohitidija. Naraha bono-jaradsana ca tahijine” najari huidsaja cacahuade -najari Jeso.

Jesopa jassinajacca huadadsa amoneje ideni jocadsajaro inanomijaro

¹⁰ Nadsama dsotodepa jassinajacca huadadsa Jesopa Dio Atti mamarihuaji toqquedsimadsapa madija mari icanabaqquijari. ¹¹ Nanidsa naqui amoneje coma tajaro qquedsimajaro. Satanacca dodosse tocorimejine poni ideni jocadsajaro. Huanissa tanijine ssamo tani. Huajano 18 naha nema najonajaro. ¹² Naneje Jeso qqui inadsapi poni ccajonanjine huahua najari. Bacco nadsapi: —Asi, ticca dsamacoma tomossini -najari Jeso.

¹³ Nadsapa pohua dsepedsa bara inadsa amad-sati ideni tobicajaro. Nadsa huanissa tadsapi huatidsedsa Diodsa jiri jiri najaro: —Jehe, Tiapi bica tinani, bica tinani –najaro Diodsa. ¹⁴ Naraha Jeso jassinajacca huadadsa madija inanomidsapa Dio Atti mamaricca tamine jipera tajari. Aja jodi-odenipa: —Jassinajacca huadadsa madija dsepedeni ijimanahijinepa oppina tani –quiquinana-jari. Nadsapa Dio Atti mamaricca taminepa huadi tadsa madija queriqquimanajaridenidsa huati tajari: —Huada 6 nehe idsepe ijini bica tani. Najaro huada 6 nehe ticanomirenijine jai tijedsimaji. Naraha jassinajacca huadadsa toponi totonanomidetohui jai tijedsima tejeraji iponi! –najari Dio Atti mamaricca tamine atti. Pohua atti nama nadsapa Jesodsa ima inanajaro. Jassinajacca huadadsa madija inanomibaqquid-sapa pina pohua dsepe ijjarissa najari.

¹⁵ Naraha Jeso taminedenidsa huati tajari: — ¡Mamaidsadedeni, ponima huati tiquinajaro! ¿Jari, tiadeni naqui ticcadeni bohui, ticcadeni bojo, ticcadeni odsadsa ssoque ssoque dsaneri naridsadsapa jassinajacca huadaraha madone dicca tiquinadsa passo dse quinahijine passo-huaji joca joca titiquina nejeraqui? Najaropi jassinajacca huadadsa tidsepedeni ijimana tani. Naraha: “Najaropi icca bohui nomiqquiri nahijine, oppinera tani” titiquina najaro –najari Jeso. ¹⁶ —Nadsapi jassinajacca huadadsa ticcadeni bohui tecahuabaqquidsapa aji amoneje jassinajacca huadadsa onanomidsa naqui oppinera tani. Ponipi Abarahao potemahije najaro pina tiadenissa naraha ponipi huajano 18 nehe

tabaccorehe jinede Satanajine ideni siri tojehe madijaro. Ponipi huajano huapi tahi coma tajaro. Satanapa pina poni ssoque idsanajarossa najaro. Nadsama jassinajacca huadadsaraha ponipi Satana ssoque idsanaraha tappa inanijine bica tani, onajaro. ¿Naraha tiadenidsapi bica tejeraqui? -najari Jeso Dio Atti mamaricca taminedenidsa huati tajari.

¹⁷ Ima nema najaro huati tadsapa pohuadsa huadiqquiri najarideni cappinamanajari. Naraha madija motapa amoneje tonomini qqui toquinadsa Jesocca nahatohue bicani, deni tojanicca qqui toquinadsapa huatidsemanajari.

Jesopa mostaza noccocca ima tadsajani mari icanabaqqijari

Mateo 13.31-32; Maraco 4.30-32

¹⁸ Nadsama najaro ima jicadsa Jeso attipa: — Tibodideni huatomanaji. ¿Nejecoma najarona paji Diocca cacahuehe? Aji Diocca cacahuehe tahimarini timittamananijinepi ajijaro namidsa imadinicca ima onihidsa tiadeni mari ocanabaqquina -najari Jeso madijadenidsa huati tadsa. ¹⁹ —Diocca cacahuehepi pina mostaza noccossa najaro. Mostaza noccopa potera taraha madija huidsajadsa ppa idsadsa napidsapa pina ahua imehissa najari. Motaradsapa pohua ininedsa ppiriri pohuadeni tadsari bina tari-mana tahi. Jehe, Diocca cacahuehecca ima mari ocanabaqquijaripa pina najaro imassa najaro. Tahidepi madija pamahadsa tojapojarro. Dsotodena madija huapimadsa tojaridsadsapi Diocca cacahuehedsa madija tohuapihitohui -najari Jeso.

Jesopa pan ssaja tahijine quequejemacca ima tadsajani mari icanabaqquijari

Mateo 13.33

²⁰ Jeso huati tapomajari: —Aji, Diocca cacahuehecca ima timittamananijine ima onihi tadsajani tiadenidsa huati onana. ²¹ Diocca cacahuehepi pina pan ssaja tahijinecca imassa najaro. Amonejepi pan inahatohuijinepa pan ssaja tahijine quequejema oni levadura aja trigo ria nahidsa ijine icanejemajari. Ssaja tahijine quequejema badsira taraha trigo ria nahi harina 3 kilopa motarajari. Naraha ssaja tahijine quequejema trigo ria nahi harinadsa tojaribaqquidsapa ssaja tajari. Aji Diocca cacahuehecca ima naqui najaro imassa najaro. Tahidepa madija pamaraha dsotodena Diocca cacahuehecca ima dsama huapimadsa tojaribaqquidsapa madija huapimadsa tojaridsajaro –najari Jeso.

Noccobiji tohuabaccadsa jai tijedsimanijine tinajomana tejeraji

Mateo 7.13-14, 21-23

²² Nadsama Jesopa Jerosarehuaji pocca benehidsa toccadsapa odsa panani onihidsa, onihidsa mari icanabaqquija dsanapohui najari. ²³ Madija mari icanabaqquidsapa nahicca madija ojaria pohua bodi huatodsapa Jesodsapa huati tajari: — Ohua Medsede ¿madija tocassiejerahijine naco ipama najaroqui? –najari Jesodsapa.

Nadsapa Jeso atti huapimadsa: ²⁴ —Dacoco tijiraji. Noccobiji tojera tanihuaji jai tijedsimanijinepi tinajomana tejeraji. Aji occa imadsa

jehe tiquinanijine Diocca cacahuehedsa tiquejenanijine naqui tinajomana tejeraji. Tiadenidsa ohuattipi ajima onajaro: Nidsa dsotodepi madija huapi taha: “Jaijedsimana, Jesodsa iquejenana” quinahitohuiraha ohuadsa toquejenahijine pajiramana-jarahitohui, onajaro. ²⁵ Tahide ohuadsa jai tijedsima-jeradsapi nidsa dsotodepa odsa jinede najoradsa totehema, noccobiji ecosani nadsapi jai tijedsimanijine ssamo tanitohui. Nadsapi amossinidsa tidomo huadsa noccobijidsa coba coba tiquinadsa odsa jinededsa: “Noccobiji iadsa ticatabojidsaji” tiquinaraha po huapa: “Tiadenipi ¿nejecohuajicca tiquejenani?” nahitohui tiadenidsa. ²⁶ Nadsapi ima huati ticadsanamanitohui: “Nadsa timadidsama ia qqui tinabaqquide. Tiadsa iji-paqquidsa ocassa tanicca naqui dse inade. Icca odsa boronidsa naqui ia mari ticanabaqquide” tiquinanitohui, onajaro. ²⁷ Naraha odsa jinedepa manaco tiadenidsa huati tahi-tohui: “Naraha ohuapi jai tijajonanihuaji ssamo onani. Tiadenipi jidsaqquri tiquinani” nahitohui. “Imasiri ticajimanadsapi ohuadsa timadimana-jeraji. ¡Ajicca jai tijaji!” nahitohui, onajaro.

²⁸ —Nadsapi Diocca cacahuehedsa huati tinadsa ticattomama canadsapi ticcadeni idideni Abarahao, Isahaca, Jacobodenipa, aja Dio Atti cacomeraqquri najarideni tedseje, huapima nahidsa madimanahi qqui tinabaqquimanaraha tiadenipi huahuattajo tiquejenanitohui. Tiadenipi ocasserani temanadsanapodsapi tipanodeni todsani

nadsa oji oji tiquinanitohui. ²⁹ Nadsapa dsama nemanehedsa madiridsamanajarideni naco Diocca cacahuehehuaaji jahijonana canahitohui. Motapa Isaraerideni quejena-jararaha ohuadsa pajissa quinajarideni naco jahijonana canahitohui. Dio pocca cacahuehedsa queriqquimanadsapa pocca jipagquiecca ejete imenidsa huahuanaridsa jassi nahuajanitohui. ³⁰ Nadsapa madija mota ajijaro dsamadsa madimanaccadsapa Dio Atti cajimanapojari. Naraha najarideni arobedeni motapa Diocca cacahuehedsa toquejena-jarahitohui. Madija ohuaha naco ajijaro dsamadsa madimanaccajaridenipa Dio Atti cajimanapo-jarajari. Naraha dsotodena Dio Atti pohuadenidsa bacco tadsa pohuadeni motapa Diocca cacahuehedsa toquejenahitohui -najari Jeso.

*Jesopa Jerosarecca madijatohui oji oji najari
Mateo 23.37-39*

³¹ Jeso huati huati taja naraha jodiodeni mari-naja onini pariseodsa jehe quinajarideni bacco najonamanadsa pohuadsa huati toquinajari: — Ajidsapi timadi tejeraji. ¡Ajicca ticcaji! Tamine Herodepa: “Tia onanadsoqquena” nahi -quina-jari Jesodsa.

³² Naraha manaco Jeso pohuadenidsa pohua cacomerajari: —Najari dsomaji huadibotedsa huati tiquinaji: “Jeso attipa ajama nahi” tiquinana. “Tibodi huatoji. Jidapana, dsemassa naqui, madija bodidenicca tocorime dosse onineridsa-baqquihitohui, madija

tocanomirehijine. Comaqquri najarideni naco onanomibaqquihijine. Huada onihidsana odsepe jicanitohui. Najarotohui occaronajarode nadija” tiquinana Herodedsa –najari Jeso. ³³ — Nema nehe nani occanitohui. Occa imapi najorapode. Jidapanapi ajidsa odsepe ijiccani. Dsemassana denima occanitohui. Huada ssiajapi denima occapomanitohui. Huada onihicadsa naqui nema odsanapojaroa Jerosare bacco onanitohui. Aja Dio Atti cacomeraqquri najarideni naco Jerosarehuajina jijicamana najari. Odsa onihihuaji odsoqquenijinepi bica tejerani –najari Jeso.

³⁴ Nadsama Jesopa odsa panani Jerosarehuaji madimanajaridenicca ima huati tajari: — Ohuapi titohuideni oji oji onadsapi: “Jerosare, Jerosare” ohonanajaro. Maittaccadsama ticcadeni idideni madimanapodsa naco Dio Atti cacomeraqquri najarideni inanadsogque-ridsamanaja najonapohui najari. Diopa pocca dodosse tabaqqui tiadenidsa dosse dosse inajonabaqquiporaha sibadsa tiquinabaqquimanaja najonapohui najari. Naraha ohuapi tiadeni ohuacahuabaqquina, onajaro. Pina tacara poni bedi poni appani dopanidsa ecahuabaqquijarissa onanijineraha tiadenipi ohuadsa jiperaqquri tiquinajaro. ³⁵ Tetideni huatoji. Diopa tidsamarideni Jerosare inebonitohui. Tiadeni tohuacahuabaqqui-jarahitohui. Ohua naqui ohua qqui timanimanapoma-jeraccanitohui. Nidsaranibote ima najoranissa tadsa occanipomadsana ohua qqui tiquinapomanitohui. Nadsana tettidenipi:

“Jehe, ajaripa Dio onima ccaronajari. Puhuapa bica tahi, bica tahi” tiquinanitohui –najari Jeso.

14

Jesopa madija jitemarojari inanomijari

¹ Jassinajacca huadadsa Jesopa pariseodeni taminecca odsahuaji jipade toccajari. Nahid-sapa pariseo ohuahadeni naco jipamanajari. Puhuadenipa Jeso inoccodsamanajari: —Nidsa pocca ima dsori tadsapi pohuadsa ima inas-sonarinijine –quinajari. ² Nahi Jeso tedsejemapa madija jitemarodsa coma tajari qquedsimajari. ³ Nadsapa Jeso najari qqui tadsapa pariseo-denidsa, jodiidenicca marinaja maridedenidsa naco huati tajari: —Jari, Moisesicca marina-jadsa, icca madijacca marinajadsa naqui jassinajacca huadadsa madija coma tajari inanomihipa “Oppinera tani” ¿tiquinaqui? “Oppina tani” ¿tiquinajarorane? –najari Jeso.

⁴ Naraha pohuadenipa joma quinajari. Nadsapa Jeso madija coma tajari bara inadsa tonomijari. Nadsapa: —Ticcaniji –najari pohuadsa. ⁵ Nadsapa Jeso pariseodenidsa huati tapomajari: —Jari, tiadenipi jassinajacca huadadsa idsepe ijinijine “oppina tani” tiquinaraha pina ticcadeni ejedeni itide, ticcadeni bohui itide passojine hui todsanidsa tossonippadsapa ¿joca timoranimana-jaraco? Naraha coma tajari onanomijaripa pina najaro imassa najaroa –najari Jeso.

⁶ Naraha pariseodeni, jodiodenicca marinaja maridedeni Jesodsa ima inassonarimananjine tohuini quinadsapa pohuadeni cacomamanajari.

Jipacquiedsa jahidsimajaridenicca ima

⁷ Nadsapa nahi pariseodenicca taminecca odsadsa jipacquimanahijinepa deni toquejenajaridenicca huihuittari bica tanicca tohui icattejidsaridsa-manajaro. Pohuadeni bodipa: — Jehe, ohuana bica onani -quinahicca ima ahurato tanijine deni toquejenajaridenicca huihuittaridsa jassi tarijari. Nama naridsamanahi Jeso qqui tadsapa pohuadeni mari icanabaqquijari, ajjaro namidsa imadinicca imadsa.

⁸ —Jari, tiadenidsa huati onana, timittamananjine -najari. —Madijapa pina cacajirehijinecca jipacquie tojabote nadsapa tiadenidsa huahua nadsa jai tija tani. Naraha nanihuaji jai tijedsimadsa jassi tinarinijine huihuittari deni toquejenajaridenicca huihuittaridsa huittarimana tejeraji. Deni toquejenajaridenicca huihuittaridsa tittarimanadsapi nidsa dsotode madija tiadenidsa deni tojajari bacco nahitide.

⁹ Nadsapa odsa jinede tiadsa huati tahitohui: “Ticca huihuittaridsapa ajararina huittarina” nahitidija. Nadsa tibodi cappinadsapi ajamani toquejenajaridenicca huihuittaridsa tittarirana, onajaro. ¹⁰ Naraha ticca ima bica tanijinepi madija pohuadsa tijipanijine titohui huahua nadsa aja ajamani toquejenajaridenihuaji tittarinina bica tani. Nadsapa odsa jinede tia qqui tadsa: “A, otesse, denima bica tanihuaji tittariji”

nahitohui. Nadsama aja huapima jassi nahua-janijarideni qqui toquinadsapa odsa jinede denima bica tanihuaji tia dosse tahitohui. Nadsapa: “Jehe, pohuapa denima bica tajari” quinahitohui tiadsa. ¹¹ Najaro imadsana Diocca cacahuehecca madie ticahatteranijine. Madijapa: “Ohuapi deni ojani” nadsa Diopa najari ajamani inanahitohui. Naraha madijapa: “Epejena, ajimani ojani naqui bica tani” nadsapa najarina Dio deni inanahitohui –najari Jeso.

¹² Jesopa marinaja onini pariseodsa jehe quinajaridenicca tamine Jeso pohuadsa jipahijine huahua najaridsa huati tajari: —Jehe, madija tiadsa jipacquimanahijine jipa tinadsapi titessedenitohui, timecotedenitohui, ticca madijatohui huahua tejerana. Tinocco jidsera tajaridenitohui, dsiniro sseqquiri najaridenitohui, najaridenitohuipi huahua tejerana. Manaco pohuadenipa tijipanijine tiadsa huahua quinahitohui. Nadsapi pohuadenidsa ima bicani tinanajaro manaconi ticajini. ¹³ Naraha madija tiadsa jipacquimanahijine jipa tinadsapi aja madija cappirajarideni, madija siri toquejenajarideni, aja madija isso sirideni, madija nocco sirideni, nama najaridenitohuira huahua tana. ¹⁴ Nema tadsapi tibodi tetidsenitohui. Pohuadenipa manaco tiadsa jipacquie inahatomananijine pajiramana-jarahi, ssamoqquiri najari. Naraha nidsa Diopa pocca madija inahatonibaqquidsana manaco Pohuana tiadsa ima bicani inananitohui –najari Jeso.

Jesopa jipacquie imenicca ima tadsajani mari

*icanabaqqujari**Mateo 22.1-14*

¹⁵ Nadsapa nahidsa jipade jassi tarijarideni ojaria Jesocca marinaja mittadsapa Jesodsa huati tajari: —Nidsa Diocca cacahuehedsa madija toquejenadsa Diocca jipaqquinaja imenidsa jipamanadsapa Dio pohuadenidsa ima bicani inananitohui –najari.

¹⁶ Naraha Jesopa pocca marinaja ajijaro namidsa imadinicca ima tadsajani pohuadsa huati tajari: —Jehe, madija dsepe sse tajaria: “Jipaqque imeni onahatona” nadsapa madija huapi taha huahua inabaqqujari. ¹⁷ Jijipa najoradsapa jipaqque jinede pohua tessedenitohui pocca dodosse dosse inajari, pohua tessedenidsa: “Ohua medsepe atti: ‘Jijipa najorahi, jai tijajon-aji’ napaja” nahijine.

¹⁸ —Nadsapa pohua tessedenidsa huatide ccaridsaraha “Idsepe ijini” naridsamanajari. Pohuama huati toquinajari. Tahidecca attipa: “Ohuapi huidsaja tojanijine dsama mitta onajaro, najaro qquide occabote nani. Tia medsepecca jipaqquedsa occanijine opajirajerani. Epejena, otohui timadi tejeraji” najari. ¹⁹ Nadsapa jipaqque jinedecca dodosse madija ohuahadsa naco huati taraha najari naco: “Odsepe ijini. Occa bohui mitta odsati 10 quina-jari ojine papamacosseri nadsa occa huidsajacca nami boto nanijine nattome onabaqquiccana, onajaro. Tia medsepecca jipaqquietohui occan-itohuiraha odsepe ijini” najari. ²⁰ Nadsa huahua inapojari ohuahadsa naco huati taraha najari naco: “Ohuapi oqquejerani. Tia medsededsa

huati tinana: Aji ohuapi amoneje ocajidsatije najaro. Epeje, ticca jipacquiedsa oqquedsima-
jerani” najari.

²¹ —Nadsapa jipacquie jinedecca dodosse toc-
canijari, poccadeni ima huapima huati tanijari.
Jipacquie jinedepa najaro ima mittadsa huadi-
jari. Pocca dodossedsa huati tajari: “Nema nehe
huassinaja odsa pananihuaji ticcaji. Nanihua-
jicca jahui onihi onihicca madijatohui qqui tarid-
saji. Aja dsiniro cappiramanajarideni, madija
siri toquejenajarideni, pina isso siri tojajari,
nocco siri tojajari najarideni ahuaji teccani-
baqquijo” najari. ²² Nadsapa dsotode pocca
dodosse madija huapima eccanibaqquijari. Ji-
paqque jinededsa huati tajari: “Jehe ohua
medsede, tettissa onanaraha ticca odsapi ca-
jinissa tejeraccani” najari. ²³ Nadsapa jipacquie
jinede huati tapomajari: “Jari, jahui onihi odsa
panani inidihuajicca jahui ticcaridsaji. Madija
ohuahadeni teccanibaqquijo, jahidsimahijine.
Occa odsa cajinijine, onajaro” najari. ²⁴ “Aja
madija huahua onabaqquijopjaridenipa occa ji-
paqquedsa jai tojedsima-jarahitohui. Occa ji-
jipa ecatamamana-jarahitohui” najari jipacquie
jinede –najari Jeso, Diocca cacahuehecca ima
mari icanabaqquidsa.

—*Occa madija tiquejenanijine ajima tiquinana
-najari Jeso*

²⁵ Nadsapa Jeso pocca benehidsa toccadsapa
madija huapi taha pohnadsa jai tojamissa-
jari. Nadsapa Jeso cattahuajanihi nadsa po-
huadenidsa huati tajari: ²⁶ —Madijapa ohuadsa

tojahijine tohuini naraha pohnapa pocca madijadsana denima huati huana tadsa, ohuadsapa ajamani huati huana tadsapa najaripa occa tojahijine pajira-jarahi. Madijapa pocca abi, pocca ami, pocca amoneje, pocca ejedenideni naco, pocca ato naco, pocca asi naqui, pocca esodeni naco, ojari itide, huapi tahitide, ima onihi pina ohuattissa nejeranicca pohnadsa huati toquinadsa pohnadeni attidsana ibora tadsapa occa madija tojahijine pajira-jarahi. Occa madijapa ohuattidsana iboraqquri najari. Madija naco pohna pocca madiedsa denima huati huana tadsapa ohuadsa ajamani huati huana tajari. Pina ohuattissa inana-jeradsapi occa madija tojahijine pajira-jarahi. ²⁷ Madija ohuadsa disera tajaradsapa occa madija tojahijine pajira-jarahi. Occa madija tojahijinepa otahimarijine ocasserani inahanaraha nema nehe otahimarid-sara disera tajari. Pohnadsa: "Ahua porimacossanidsa tia inanadsoqquena" quinadsa naco pohna attipa: "Epejena odsoqquena. Jeso onebo-jarahi" nadsapa najarina occa madija tojajari -najari Jeso.

²⁸ Jeso denima huati huati tajari: —Jehe, occa dodosse tabaqqi tiquejenanijinepi ponima "Jesocca ojana" tiquinejerana. Tahidepi tibodideni huato-mananissa tapoji. Pina ajijaro imassa najaro: Tettidenipi: "Odsa imeni nami macconi botta tanidsa ocanahatona" tiquinadsapi ¿nejecoma titiquinapo najaro? Jehe, tahidepi: "Odsa manaconipi ajima nanitide" titiquinapo najaro. Nadsapi: "Occa odsa cajicanissa tani-jine ¿occa dsiniro pajirapadseje?" titiquinapo

najaro. ²⁹ Naraha tahidepi ticca odsa canahatonijine manaconi nattome tapo-jeradsapi dopani-huajicca nami macconi botta tani hua inaririd-samanajarodsara ticca dsiniro jicagquinitidija. Najarodsa dsiniro jicadsapi ticca odsa cajica-jeranitohui. Nadsapi madija huapima tia jaja icanaqquimananitohui. ³⁰ Attidenipa: “Ajajari madijapa odsa icanahatoraha cajicanissa tani-jine ssamo tajari” quinahitohui –najari Jeso.

³¹ —Nadsama ima onihipi ajima najaro: Tamine pamaha dsama onihicca dsama onihicca tedseje cahadirehijine poccadeni soldado tedseje najoraridsamanajari. Tamine ojariapa pocca soldado 10 mil naha cajijari, naraha tamine ohuahaccapa denima huapi tajari, 20 mil naha cajijari. Nadsapa aja soldado 10 mil naha cajijaripa aja tamine soldado 20 mil naha cajijari tedseje bacco tocanire-jaradsama ¿pohua bodipa nejecoma napopadsaja? Jehe, pohua bodi huatopohuitohui: “Ohuapi aja tamine soldado 20 mil naha cajijari tedseje icahadired-sapi ¿deni ojapadseje? ¿deni ojajerapadseje?” nahitohui najari tamine. ³² Nadsama: “Occa soldado 10 mil nadsapa deni ojajeranitohui” nadsapa aja tamine soldado 20 mil cajijari jahionahi huaji taccadsama pohuadsa ima dosse inajaro: “Icahadire-jerana. Ijicarana. ¿Nejecora tiadenidsa da inadsa icajoneranijine?” nahitohui –najari Jeso.

³³ —Jehe, ima najarossa najaroa tiadeni naqui occa madija tiquejenanijine tahide tibodideni huato-mananissa tapoji, onajaro. “¿Jesocca ojadssapi huapima oneboridsanijine opajirapad-

seje?" tiquinaji. Aji ticajimanajarocca huapima tinebomananijine iboquiri tiquinadsapi occa madija tiquejenanijine tipajiramana-jeranitohui -najari Jeso.

Saho tahimarini

Mateo 5.13; Maraco 9.50

³⁴ —Nadsama sahopi bica tani. Banidsa coro idsippadsapi ajibo tajaro. Aba jadsijarahijine naco sahodsa huira inajari. Naraha saho ajiboni tomossidsapi tomajidera tani, icca bani naco totabaccora tahi. Ajibo tapomanijine ssamo tani. Saho ajiboni tomossidsapi ponima tojajaro. ³⁵ Namidsa huira inadsapi sahojine icca ppa nahi moro tajarahi. Ahua huassa tajaridsa quejemadsa naqui sahojinepi ppa nahi moro tajarahi. Nadsama saho ponima tojadsapi nebojaro. Najaro imapi pina tiadeni naqui ajijaro dsamacca madijadsa ima bicani tinanamandaridsajaro. Nema tidsanapomanana. Nema tinanamana-jeradsapi ticcadeni jeheniji ponima tojarana. Nadsama teribodeni ticajimanadsapi ohuatti timittamananissa taji -najari Jeso.

15

Edede amossi najari tahimari

Mateo 18.12-14

¹ Nadsapa aja romanodenicca taminecca dosseniji dsiniro nanaccadedeni, imasiri sseqquiri najarideni tedsejepa: —Jesocca marinaja imittana -quinadsa Jesohuaji jahijonajari. ² Naraha jodiideni mota marinaja pariseodsa jehe quinajarideni, jodiidenicca

marinaja maridedeni tedsejepa aja imasiri sseqquiri najaridenidsa Jeso quejemahi qqui toquinadsapa jiperaquiri najari. Nadsapa atti atti quinajari: —Ajana, ajajari madijapa imasiri sseqquiri najaridenidsa nija nahi taji. Pohuadeni tedseje naco jipajari. Naraha iapi pohuadeni tedseje ijipanijinepi oppina tani, inajaro -quinajari.

³ Naraha manaco Jeso pohuadenidsa ajijaro namidsa imadinicca ima tadsajani mari ican-abaqquijari. ⁴ Pohua attipa: —Jari, tiadenipi ticadeni edede 100 naha ticajimanadsapa onideni hua tiquinadsa ojaría amossi nadsapa ¿pohuato-hui qquide jai tija-jeraqui? Jehe, edede jinedepa pocca edede qquide toccahitohui. Pocca edede 100 naha cajiraha ojaría amossi nadsapa 99 tojajari. Pocca edede 99 naha huamonihuaji inebobaqquidsapa ojaría amossi najari qquide toccajari. Nadsapa qqui qqui naridsanaja pocca edede bacco inanijari. ⁵ Bacco inanidsapa pohua mattodsa ibari nanijari. Nadsapa huatidsenijari. ⁶ Nadsapa odsa bacco nanidsapa pohua tesselohui huahua najari: “¡Occa edede amossi najaripa bacco onanihi! ¡Occa odsahuaji jai tijajonaji, etidsenijine!” najari. ⁷ Nadsama pajissara tiadenidsa huati onajaro: Najarossa najaro madija imasiri sseqquiri najaridenipa pina edede jano tojadsa amossi najarissa quina-jari. Naraha ojaría: “Diodsa ojanijine, occa ima onebona” nadsapa Diopa pocca dodosse tabaqqi memehujicca tedseje huatidsemana tahi. Aja madija tahide Diodsa toquejenapojari-denicca imadsa naco memehujiccapa huatidse-

mana tahi. Naraha aja madija Diodsa tojedsatid-sapa denima huatidsemana tahi –najari Jeso.

Amoneje ponicca dsiniro amossi cananicca ima

⁸ Nadsapa ima onihi naqui huati tajari: — Amonejepi dsiniro ccarara ¹⁰ nehe cajiraha ponicca dsiniro cajarie amossi canadsapi ¿qquide dissera tejeraqui? Dissera tajaro. Jojororo iquehessidsa ponicca odsadsa johue naridsajaro. Ponicca dsinirotohui mohuaradsa qqui narid-sanissa tajaro. ⁹ Bacco icananidsapi poni tas-sanitohui, poni inoriniccatohui huahua najaro: “¡Ohuadsa tetidsemanaji! Occa dsiniro amossi canaraha bacco ocananini” najaro –najari Jeso. ¹⁰ —Nadsama ohuapi tiadenidsa huati onana: Najarossa najaroa madija imasiri sse tajaripa: “Diodsa ojanijine, occa ima onebona” nadsapa Dio pocca dodosse tabaqqui tedseje huatidsemana tahi –najari Jeso.

Madija pohua bedi jano tojaraha bacco nanipomahicca ima

¹¹ Jesopa dsoqquejari dsepetajibotecca imadsa huati huati najari: —Madijapa pohua bedi pamajari. ¹² Dsotodeccapa imehidsa huati tajari: “Abi, tidsepetaji, ticca dsiniro, ticca dsama huapima nidsa tidsoqquedsapi icca tojanijine tade. Nadsapi aji occapi tidsoqque-jeraccadsama ohuadsa arobeni da taji” najari. Nadsapa imehi pohua bedi pamahadsa pohua dsepetaji, pocca dsama icanaroberidsadsa pohnadenidsa da inaridsajaro. ¹³ Naraha huada onihidsapa pocca abicca

daniji aji dsama cajidsati, pohua dsepetaji cajidsati naqui dsinirotohui da inaridsajaro. Nadsapa dsiniroma dsama huaji tanihuaji toccajari. Nadsapa dsama huaji tanicca odsa bacco tadsapa ejetetohui, dsodsobitohui, amonejetohui naridsajari.

¹⁴ —Nadsapa pocca dsiniro nemanehē inajicajaro. Naraha najari huajanodsa pemi naqui tojaridsajaro. Dsamatapa naco bonoridsa-jarajari. Nadsapa dsabisso pemijari.

¹⁵ Tarabaidstohui nahihuajicca madijadsa huati tajari. Nahihuajicca madija pohuadsa: “Occa poroco tecahuabaquijo” nadsa pocca poroco madimanahihuaji dosse injari. (Naraha dsabissopa jodioja nadsa poroco cacahuade pohuadsa ocassera taraha nama naha poroco ecahuajari.) ¹⁶ Pohuadsa dsamatapa da quinaradsa pemidsapa: “Poroco tapari ojipa naccaraho” nanaja naraha poroco tapari pina imissa najaro naqui pohuadsa da quinehe nejerani.

¹⁷ —Nadsapa bodi huatomajari: “Occa abicca odsadsapa tatarabidsadedeni caji taraha pohuadenidsa dsamatapa mota totoja nade. Naraha ohuapi ajihuaji pemi, ohuatiabote nani” najari pohua bodi. ¹⁸ Nadsapa pohua bodi huatodsapa: “A, occa abicca odsahuaji occanina. Bacco onanidsapi pohuadsa occa ima huati onanijine: Abi, ojine ima tabaccora tani Diodsa. Tiadsa naqui ojine ima tabaccora tani, onanijine” najari pohua bodidsa. ¹⁹ “Nadsama: Abi jidapapi ohuadsa: ‘Occa ejedeni’ tejeraji. Tiapi bica tinaraha ojinepi ima bica tejerani,

onanitohui. Naraha jidapapi ticca dodosse ojanijine ¿jipa tinaqui? onanitohui” najari pohua bodidsa.

²⁰ —Nadsapa pocca abihuaji toccanijari. Toccanijari... bacco tanibote nadsa pocca abipa huaji taraha pocca ejedeni ccanihi qqui tajari. Qqui tadsapa pocca ejedenidsa huati huana taja najari. Joppa tojidsajari, dama, icahuajocossa, pano mose inajari. ²¹ Naraha bedi attipa: “Abi, ojine ima tabaccora tani Diodsa. Tiadsa naqui ojine ima tabaccora tani. Abi, jidapapi ohuadsa: ‘Occa ejedeni’ tejeraji. Tiapi bica tinaraha ojinepi ima bica tejerani” najari imehidsa.

²² —Naraha pocca abipa bedi atti mittaraha pina mitterahi najari. Pocca dodosse tabaqquid-sana huati tajari: “¡Huassinaja occa ejedeni etero bicanidsa tinehedsamanajo! ¡Todsepecca naqui dsepe tinahanamanajo, amoricca naco tinehedsamanajo!” najari. ²³ “Bohui napidsati oqui tajari naco teccanimanadsa tidamanajo, ijipaqquinijine” najari. ²⁴ “Etidsenijine bica tani. Occa ejedeni pina dsoqquejarissa naraha madinipomahi. Pohuapa pina jano tojajarissa naraha bacco nanipomahi” najari. Nadsapa pocca odsacca huapima huatidsemanajari.

²⁵ —Naraha pohua bedi tahideccapa huidsa-jahuaji dsepe ijidsa ccaninaja odsa huajiranidsa mittajari. Tire tire camaja, tore tore camaja najari, pocca abicca odsadsa dsodsobi tojajaro. ²⁶ Naraha pohuapa pocca abicca medsetohui huahua najari. Ccajonadsapa pohuadsa huati tajari: “¿Nejecotohui icca odsadsa ejete tojajaro?” najari. ²⁷ Naraha imehicca medsepa pohuadsa

huati tajari: “Timecote bacco nanijari. Nomi, bica taha ccanidsa ticca abi bohui bedi oquibote inanadsoqquejari” najari.

²⁸ —Naraha pohnapa jamijari. Odsahuaji toqquedsimanide jipera tadsapa pocca abina qqnenajari. Qqnenadsapa bedidsa huati huati tajari, toqquedsimanihijine. ²⁹ Naraha manaco imehidsa huati tajari: “Ohuapi tiadsa huajano huapi taha odsepe ijijaro. Ticca dosseniji aji jipa tinajarocca ohuadsa dosse dosse tajarossa onanaraha ohuadsa bani ette tojahi da taha najarahi, otessedeni tedseje ohua naqui ohu-atidsenijineraha” najari imehidsa. “Bani huati ccarera tahicca pina edede jidsadsa cabra bedi naco ohuadsa da taha najarahi, otessedeni tedseje ijipaqquinijineraha. ³⁰ Naraha ticca ejedeni aja ticca dsiniro ponima amoneje pehiqquri najardenidsa inajicajaro pohnadsana bohui bedi oquibote tinanadsoqquejari” najari imehidsa.

³¹ —Nadsapa manaco imehi pohnadsa huati tajari: “Ato, tiapi ohuadsa timadi-dsanapojaro. Odsepetaji, occa huidsaja, occa bani ette tojahi, occa odsa najari huapimapa ticca” najari.

³² “Naraha jidapapi ijipaqquidsas etidsenijine bica tani. Ticca eso dsoqquejarissa naraha jidapapa ima dsatidsa madinihi. Pohnapa jano tojaraha qqui imanihi” najari pohna bedidsa —najari Jeso.

16

Madijapa pohna dossedecca dsiniro ecahuaraha ponima inajicajaro

¹ Nadsapa Jeso pocca dodosse tabaqquidsa ajjaro namidsa imadinicca ima onihidsa huati tajari: —Jehe, madija dsepe ssebotepa pohua cajjaricca huapima pohua biji accode ojaría ecahuajaro. Naraha pohua biji accodepa pohua pohuajine pocca cacahuehe tossamojaro. Nadsapa madija ohuahadenia dsepe ssebotedsa huati toquinajari: “Tibiji accodepa ticca dsiniro ponima inajicajaro” quinajari. ² Nadsapa dsepe ssebote pohua biji accodedsa huahua nadsa huati icanajari: “Nija, ticca ima ohuadsa huati toquinajari. Ponima occa dsiniro tinajicani quinahi ima omittani. ¿Ticca cacahuehe nejecoma tinanajaro? Ohuadsa ticca cacahuehecca dsodo nani huapima tinajoradsa ohuadsa da taniji, onajaro. Nadsama tiapi denima tecahuaji onejerani” najari pohuadsa.

³ —Nadsapa aja pohua biji accodepa pohua ehuerahi bodi huatojari: “Jidapapi ¿nejecoma onapadseje? Ohua dossede ohuadsa jipera tadsapa odsepe ijinijine nohueradsapi ocappiranitohui” najari. “Huidsaja ppa onanijinepi opajira-jerani. Madijadenicca dsiniro manaconi jirehe mitta onanijine naqui cappina onani. ⁴ Pina ajima onana. Ohua dossedsa debe quinajaridenicca debe ajimani onanarid-sana. Nadsana ohuadsa huatidsemanadsa nidsa tarabadsa ocappiradsapi aji ima onajorapojarine ohuadsa: ‘Aji occa odsadsa timadiji’ quinahitohui” najari pohua bodidsa.

⁵ —Nadsapa pohua dossedsa debe quinajari-denitohui huahua najari. Ojaría huahua ccajona, ojaría huahua ccajona najari. Nadsapa tahide

ccajonapojaridsa huati tajari: “Ohua dossededsa debe tani ¿nejecoma natte?” najari. ⁶ Nadsapa huati tajari: “Ahua oribo bono oquine jojori imeni 100 nehe debe onajaridija” najari. Nadsapa dsepe ssebote biji accode attipa: “Aji ticca cuenta dsodo nani tiadsa da onanina. Ajidsa huassinaja tittaridsa ticca cuenta 50’ra dsodo taji” najari. ⁷ Nadsapa dsotodeccadsa naco huati tajari: “Tia naqui ¿ohua dossededsa nejecoma nehe debe tajaritta?” najari. Naraha pohua attipa: “Aroso jidsadsa trigo sacco 100 naha debe onajaridija” najari. Nadsapa pohuadsa huati tajari: “Aji ticca cuenta dsodo nani tiadsa da onanina. Ajidsa huassinaja tittaridsa 80’ra dsodo taji” najari. Nama nama najari debe quinajarideni huapimadsa.

⁸ —Naraha dsepe ssebotepa pohua biji accodejine pohuadsa debe quinajaridenicca debe ajimani inanaridsani ima mittadsapa pohua attia: “Jehe, obiji accodepa pohua tedsejemacca ima maidsehedsa najorapohuijine bodi nahato tajari” najari. Jehe imapi nema najaro. Madijapa pohuadeni tessedenidsa maid-samanahijine bodideni nanajoramanapo najari. Naraha Diocca madijapa pohuadeni tessedenidsa maidsamanahijine najoramanapohuijine ssamoqquiri nahi –najari Jeso.

⁹ —Tadenidsa huati onajaro: Ajijaro namicca ticajimanajarocadsa madija acco ticamabaquimanajo. Nema tiquinadsapi titessedeni tohuapihitohui. Nidsa dsotode Dio madihihujicca mamadi jiquejeraniccadsa timadimanadsapi ticcadeni accorehe manaconipi Dio pocca

biquehena tiadenidsa inanaridsanitohui.

¹⁰ —Madijapa cacahuaniji badsira tehe ecahuadsa maidsa-jaradsapa nidsa dsotode cacahuaniji deni tojanicca ecahuanijine “Bica tahi” quinahitohui. Naraha cacahuaniji badsira tehe ecahuadsa maidsadsapa cacahuaniji deni tojaniccadsa “Jehe pohua ecahuana” quina-jarahitohui. ¹¹ Najarossa najaroa ajijaro namicca biquehe tecahuamanaraha maidsadsa tinadsa tijinedeni toccanissa tejeradsapi Diopa pocca biquehe pajissacca tiadenidsa: “Tecahuamanaji” najarahitohui. ¹² Madija ohuahacca dsiniro tecahuamananissa tejeradsapi ticcadeni dsiniro naqui tecahuamananissa tejeranitohui. Nema nadsapi ticcadeni dsiniro tiadenidsa da quina-jeranitohui.

¹³ —Nadsama tiadenipi tiadeni dossede pamahadsa tidsepedeni ijimananijinepi tipajiramanagerani. Tiadeni dossede pamaha ticajimanadsapi ojariadsana tetideni huanaqquiri najaro. Pohua attidsana iboraqquiri tiquinanitohui. Ohuahadsapi ajimani tetideni huanaqquiri nadsapi pina pohuadsa jiperaqquiri tiquinajarossa nanitohui. Pohua attidsa ibobo tinanitohui.

—Diocca tiquejenadsapi dsinirocca dodosse tiquejenanijine ssamo tani. Dsinirotohuira tetidsemanadsapi Diodsa tetidsemananijine ssamo tani. Ima pamehepi Diotohui, dsinirotohui, timadimananijinepi ssamo tani –najari Jeso.

¹⁴ Jeso maride tojadsa marinaja pariseodsa jehe quinajarideni naco nahidsa quejemanadsa taharibobo canajari. Pohuadenipa dsinirodsana huatideni huanaqquiri najari.

Naraha Jeso atti nama nahi mittamanadsapa pahuadsa ssamoni huahua quinajari. ¹⁵ Nadsapa Jeso manaco pahuadenidsa huati tajari: — Tiadenipi madija noccodenidsa bicaqquri tiquinaraha Diopa tibodideni nahato tajari. Madija huapimapa tiadenidsa: “Bicaqquri nahi” quinaraha pajissa jerani. Ticcadeni madiedsapa Dio jipera tahi –najari Jeso.

Diocca cacahuehecca ima dsatina Moisesicca marinaja inapajiranissa tajaro

¹⁶ —Maittaccadsama Moisesicca marinaja nemaneha, Dio Atti cacomeraqquri najaridenicca dsodoniji naqui mari mari quinaja najonapohui najaria aja Huano Baotistapaja. Nadsana Diocca cacahuehecca ima bicani madijadsa tojanijine Huano Baotistapa tahide mari mari najonapojari. Jidapana ohua naqui maride nema onajonajaroa ajijaropaji. Naraha madijapa Diocca cacahuehecca imadsa jiperaqquri nadsa pahuadenijine najidsohue ssonari ssonari najonaraha nama naha madija Diocca cacahueheda totoquejena najaripaja.

¹⁷ —Ajina ¿meme, nami jicanijine najora taqui? Najo tani. Naraha Moisesicca marinaja jicanijinepi denima najo tani. Jicanijinepi ssamo tani. Dio Atti dsodo nanicca marinaja huapima pajiranissa tanitohui. Tohuatti ojarie dsori teje cama-geranitohui.

¹⁸ —Naraha tiadenipi Diocca dosseniji Moisesidsa huati tapojaricca imadsa madija mari ticanabaqquiraha tijinedenia tojidsajaro. Diocca dosseniji pajissaccapi ajima najarona

paji: Maqquidejepa pocca amoneje inebodsa amoneje onihira icajidsapi imasiri inanajaro. Nama nadsapa Diocca dossenijipi ecahua-jerajaro. Madija ohuaha naco aji amoneje ponicca maqqui inebojaro “Ocajina” nadsa icajidsapi imasiri inanajaro. Nama nahipa Diocca dosseniji ecahua-jerajaro –najari Jeso.

Madija dsepe sse tajari Lasaro tedseje tahimarideni

¹⁹ Jesopa ima onihi huati huati tajari: —Madija dsepe sse tajaripa etero bicani huehuedsa najari. Huada huajijiradsa ejete ihinana najaro. Pohua tessedeni tedseje jijipa bica tahiccara jijipamana najari. ²⁰ Naraha madija tohuati nahana, huapi jadsimaro najaripa nahi dsepe ssebotecca nocobijidsa huihuitta najari. Pohua onipa Lasaro. ²¹ Dsepe sse tajaricca jijipa motatohui huihuitta najari. Pohua huapi jadsijarijine naco ette eno eno quiquinanajari. ²² Nadsapa tohuati nahana tajaripa dsoqquejari. Dsoqquedsapa Diocca dosse tabaqqui memehujicca iaccamacossanimanajari. Nahihuajipa Isaraeri potemahi jodiodeni huapimacca idi Abarahaohuaji bacco tajari. Nadsapa Abarahao tedseje memehujicca dsama bicanidsa madimanajari. Dsotode dsepe sse tajari naco dsoqquedsa ppa idsamanajari. Naraha pahuapa paja jicamanarijaridenihuaji bacco tajari.

²³ —Nadsama dsepe sse tajaripa paja jicamanarijaridenihuaji madidsapa ocasserani ahujari. Nahihuaji madidsapa huaji taraha Lasaro Abarahao tedseje qqui inabaqquijari. ²⁴ Nadsapa

Abarahaodsa huahua najari: “¡Idi Abarahao, ohuadsa teti huana taji! Lasaro ohua acco camahijine pohua dsepe cote passodsa iquehed-sippa nadsa dosse tajonajo, ohuebeno tonahuini nanijine. Ohuapi aji jororoni ppocoranidsa ocasserani ohuani” najari. ²⁵ Naraha Abarahao pohuadsa huati tajari: “Neppe, teti huatomaji. Tahide namihuaji timadiponipi bicani tepode. Naraha Lasaropa ocasserehedsa madipode. Jidapapi Lasarodsa ima bicani tojajaro. Naraha tiapi ocasserani tinahanajaro” najari Abarahao dsepe ssebotedsa. ²⁶ “Ima onihi naqui tia timadi ia imadi nani nocconihujapi cojojo imeni cahujiquimanihuaji imadijarossa najaro. Aja imadinihuajicca madija tiadenihuaji bacco toquinahijine ssamo tani. Manaco nahihuajicca madija iahuaji bacco najonahijine ssamo tani. Nadsama Lasaro tiahuaji dosse onahijine naco ssamo tani” najari Abarahao.

²⁷ —Naraha dsepe sse tajari huati tapomajari: “Idi Abarahao, Lasaro namihuaji dosse tinaronanijo, occa abicca odsahuaji ohuemecotedenidsa huati tahijine. ²⁸ Nadsama ohuapi ohuemecote 5 quinaha ocajidija. Pohuadenidsa ohuatti Lasaro huati tanihijine: ‘Paji Diocca dossenijidsa iboqquri tiquinadsapi nacasserehehuaji bacco tiquinanitohui’ nahijine pohuadenidsa” najari dsepe ssebote atti.

²⁹ —Naraha Abarahao huati tapomajari: “Dio Atti Moisesi dsodo inajaro, Dio Atti cacomeracquiri najarideni dsodo quinajaro naqui cajimanahi. Najaro ima mittamanadsa bodideni

cacajiqquimera-manahijine pajiramanahi” najari. ³⁰ Naraha dsepe ssebote attia: “Jehe idi Abarahao, najaro dsodo nani cajimanaraha najarodsa pajissa quina-jarajari. Naraha madija dsoqquejari nahatonidsa pohuadenihuaji huatide toccanidsana pajissa quinahitohui, poccadeni imasiri inebomananijine” najari dsepe ssebote atti.

³¹ —Naraha Abarahao attia pohuadsa: “Dio Atti Moisesijine dsodo nani cajimana, Dio Atti cacomeraqquri najaridenijine dsodo nani naqui cajimana nahi. Najaro Dio Atti mittamana-jaradsapa aja madija dsoqqueraha nahatonijari attidsa naco mittamana-jarahitohui. Pajissa quina-jarahitohui” najari Abarahao atti -najari Jeso.

17

Imasiri tinanadsapi oppina tanihuaji ticcanitohui

Mateo 18.6-7, 21-22; Maraco 9.42

¹ Nadsapa Jeso pocca dodosse tabaqquidsa huati tajari: —Aji namidsa timadimanajaropi ima tinanamananijine caji tani. Paji, nema najarodsa imasiri tinanamana tani. Naraha madijajine imasiri tinanamanadsapi pohuadsa ima denima oppina tanicca ssonarinitohui. Madija nama najaripa Diona inajidsohuitohui.

² Nadsama madija ojariajine ohuadsa jehe quina-jari imasiri inanamanadsapi pohuadsa najidsohue oppina tanicca ssonarinitohui. Ejedeni ohuadsa jehe quinajarideni naco madija imasiri mamaridejine imasiri tocahatteradsapa

aja imasiri mamaride pohnadsa najidsohue oppina tanicca ssonarinitohui. Pina ajijaro imassa najaro: Siba ccanajabote pohua mattodsa ssoque dsanadsa passo imenihuaji je tahijine cco tod-sippadsapa oppina taraha najidsohue denima oppina tanicca pohnadsa ssonarinitohui. ³ ¡Paji! Tiadenipi tiadeni tecahuamananissa taji, imasiri tinanamana-jeranijine –najari Jeso.

—Nadsama timecote ohuadsa jehe najari tiadsa imasiri inanadsapi manaco mohuaradsa pohua huati ticanajo: “Ohuadsa tijine ima bica tejerani” tana. Nadsapa pohua cacomeradsapa: “Jehe, tiadsa nema onade. Ojine bica tejerani. Jidapapi nema onapoma-jeranitohui” nadsapa manaco pohnadsa: “Jehe, epejena, tiadsa ohuadi-jerani” tana, onajaro. ⁴ Nadsapa timecote ohuadsa jehe najari tiadsa tabaccorehe inanajaro. Dsotode tiadsa imasiri inanapomajaro. Dsotode naqui tiadsa tabaccorehe inanapomajaro. Nama dsanaporaha pocca imasiri jicani nattinipa pohua atti tiadsa: “Epeje, ojine tiadsa bica tejerani. Jidapapi nema onapoma-jeranitohui” nadsapa manaco pohnadsa tettiipi: “Jehe, epejena, tiadsa ohuadi-jerani” taji, onajaro. Huada ojariedsa nama dsanapojari ⁷ nehe bacco taraha nema nehe pocca imasiridsa epeje tidsanapoji, onajaro –najari Jeso.

Diodsa jehe inanissa tadsapi ima najo tanic-cadsa ipajiranissa tanijinecca ima

⁵ Nadsapa Jesodsa pocca dodosse tabaqqupa huati toquinajari: —Ia Medsede, icca je-

heniji Diodsa todacorani nanijine iadsa denima tinanaji –quinajari.

⁶ Nadsapa manaco ia Medsede pohuadenidsa huati tajari: —Ticcadeni jeheniji badsira tehe pina mostaza nocco badsira tajarissa nehe tica-jimanadsapi ssamo tanicca tinanamananijine tipajiramananitohui. Pina ajijaro ahuadsa huati tiquinadsa: “Ahua, tia motta jeo tinadsa passo imeni inididsana tia ppa tidsana” tiquinadsapi ahua tettidenidsa ibora tanitohuiraha –najari Jeso.

Diodsa idsepe ijie jicanissa tadsapi —Deni ijani –inejeranijine

⁷ —Madijacca tatarabaidssade tarabaidssahuaji ccaccani nadsa pohua dossede attipa ¿neje-coma napadsaja? Pina huidsaja ppade ccanidsa, pina edede cacahuade ccanidsa nadsapa pohua dossede: “Jehe, ajidsa tittaridsa tijipaji” ¿napadsaja? Nama najarahitohui pocca tatarabaidssadedsa. ⁸ Pohua dossede attipa ajama nahitidija: “Ohuadsa dsamatapa ppe tadsa, ojipanijine tinajoradsa jijipa hua tarijo. Nidsa ohuajari jicani nattinina manaco tijipanijine” nahitohui –najari Jeso. ⁹ —Nadsapa tatarabaidssade pohua dossede attissa inanadsa pohua dossede attipa: “Jehe, tijine bica tani” ¿napadsaja? Nama najarahitohui. Najaropi pocca tarabaidssade epeje. ¹⁰ Nadsama tiadeni naqui Diocca dosseniji tecahuamananissa tadsapi tettideni: “Epeje, najaropi ia icca idsepe ijie” titiquina nana. “Iapi deni iquejena-jerani. Ia dossedecca tatarabaidssade iquejenani” titiquina nana –najari Jeso.

*Jeso madija 10 quinajari lepra cajimanajari-
deni inanomibaquijaricca ima*

¹¹ Nadsapa Jeso pocca benehidsa Jerosarehuaji toccajari. Dsama arobeni onini Samaria, dsama arobeni onihi onini Carirea tadsajani ttomogguinihuaji ccaridsajari. ¹² Nadsapa nanihuajicca odsa capamema nahihuaji Jeso bacco tajari. Nahidsapa madija 10 quinajari dsamacoma onini leprajine huapideni jadsimanahi madimanajari. Nadsapa Jesohuaji jai tojjajari, pohuadsa huajiji nadsa domo hua najari. ¹³ Jadsirema pohuadsa huahua quinajari: —¡Jeso, ia Medsede, iadsa teti huana taji! —quinajari.

¹⁴ Nadsapa Jeso pohuadeni qqui inabaqquid-sapa pohuadenidsa huati tajari: —Diodsa dada toqquimadedenihuaji jai tijedsimadsa pohuadenidsa tepideni nohue tiquinaji —najari. Nadsapa pohuadeni huapi nohuede jahui jai tojaninaja tocanomirejari.

¹⁵ Nadsapa ojaría pohua huapi tobicahi qqui tadsapa dsodonijari. Huatidsedsa jadsirema: —¡Diopa bica tahi, bica tahi! —nanijari. ¹⁶ Jesodsa bacco nanidsapa —Jehe bica tinani —nahijine Jeso baccohuaaji pohua pitodsa huitta, tocattedsa nadsa assari namidsa bacco tajaro. Nadsama aja madija dsodonijaripa dsama Samariacca. ¹⁷ Nadsapa Jeso huati tajari: —Naraha aja ¿madija 10 quinajaripa tocanomire-jaraco? Tocanomireraha mota 9 quinajaridenipa ¿nejecohuaji? —najari Jeso. ¹⁸ —Ajararipa icca madija jodio jararaha pohuapa dsodonidsa Diodsa huatidsenijari. Motapa Diodsa: “Jehe, tijine

icanomireni bica tani” nanimana-jarahi -najari Jeso.

¹⁹ Nadsapa pohnadsa Jeso huati tajari: — Titehemadsa ticcaniji. “Jehe, Dio ohua tonanomihij pajirahi” tadsapi tinomijaro -najari Jeso.

Diocca cacahuehepi ajima nehe tojanitohui
Mateo 24.23-28, 36-41

²⁰ Nadsapa marinaja pariseodsa jehe quina-jarideni Jesodsa huati toquinajari: —¿Nejecoma nadsa Diocca cacahuehe tojapadseje? -quina-jari. Naraha Jeso pohnadenidsa huati tajari: —Diocca cacahuehepi ahuatora tani, inoccodsa qqui inejerani. ²¹ Madijapa: “Qqui taji, Diocca cacahuehe ajidsa bacco nani, ajiccadsa bacco tani” quina-jarahitohui. Diocca cacahuehepi jidapana tiadenidsa tojaridsani -najari Jeso.

²² Dsotodepa pocca dodosse tabaqquidsa huati tajari: —Ohuapi Madija Bedi ojajaroa nidsa occaronapomanicca huada bacco tani tohuini tiquinadsapi: “Jaho, najaro huada qqui inaccaraho” tiquinaraha nohueraccanitohui.

²³ Naraha madija tiadenidsa maidsamanadsapa ajama quinahitohui: “Qqui tiquinajo, Cristo-Mesia ajadsa bacco nanihi, ajaccadsa bacco nanihi” quiquinanahitohui. Naraha madija attideni nama quinadsapa: “Jina qqui inana” tiquina tejerana. ¡Poni! ²⁴ Ohuapi Madija Bedi ojajaroa occaronapomanicca huada bacco tadsapi ahuato tanitohui. Pina ssissiede memedsa ssie nadsa meme nemanehetossiajabaqquijarossa nanitohui. ²⁵ Naraha

ohuapi Madija Bedi ojajaroa tahide ima onihi, onihi najaro ocasserani onahanaponitohui. Jidapana madija madimanajarideni naco ohua ettajomanaponitohui –najari Jeso.

²⁶ —Ohuapi Madija Bedi ojajaroa nidsa occaronapomadsapi pina maittaccadsama Nohue madipodsa ppani ccajonajarocca imassa nanitohui. ²⁷ Madijadenipa jijipamana najari, dse dse quinajari, caji caji canajari. Nama quiquinanapojaria aja Nohue pocca canoa imenidsa toqquedsimahicca huada bacco tajaropaji. Naraha madija motapa ssamoqquiri nadsa ppani bacco najonadsapi huapima je tocaniredsa jicajari. ²⁸ Dsotode Abarahaocca ejedeni ohuaha Rote odsa panani Sodomahuaji madidsa naco pina aji Nohue madipohuicca imassa napomajaro. Madijadenipa jijipamana najari, dse dse quinajari, todsepetaji mitta mitta quinajari, poccadeni dsamatapa da da quinajari, poccadeni huidsaja ppa ppa quinajari, poccadeni odsa ihinahatomana najaro. ²⁹ Naraha Rotepa Sodomadsa nebodsa joppa taraha najaro huadadsa Diojine memehuaajicca jororoni azufre quejemani Sodomahuaji catojadsapi madija huapima jicajari. ³⁰ Jehe, ohuapi Madija Bedi ojajaroa occaronapomanicca huada naqui najarossa nanitohui. Pina Nohue madipodsassa, pina Rote madipodsassa najaro. Nidsa dsotode ajijaro namidsa jidsera onanipomadsa madija mota otohui najoramana-jarajaridenipa jicahitohui –najari Jeso.

³¹ —Nadsama najaro huada bacco tadsapi madija pocca odsa amossinihuaji ccaridsad-

sapa pohua dsepetajitoahui pocca odsahuaji toqquedsimani-jarana. Madija ohuaha pocca huidsajahuaji dsepe ijijari naco pocca odsahuaji toccani-jarana. ³² Aji Rotecca amonejecca ima tetideni ajimamana-jerana. Ponidsa Dio At-tipa: “Tinattihujipi qqui tani tejerana” naraha poni nattinihuaji qqui nanidsapi siba tojajaro. ³³ Madijapa pocca madie Diodsa acco tadsa ajijaro namidsa madi-dsanapohuijine tohuinira nadsapa dsoqquehitohui. Dsoqquedsapa camittehe jiquejeranicca caji-jarahitohui. Naraha madijapa pocca madie Diodsa eccoradsapi pohua inanadsoqque-manaraha camittehe jiquejeranicca cajidsanapohuitohui –najari Jeso.

³⁴ —Jehe, nidsa occaronapomanijine ima ajima nanitohui: Madija pamaha dsome huahuadadsa cahadijaraha ojaria otohui najorapojarina iaccamacossanihitohui. Naraha ohuahapa otohui najora-jaradsapa inebohitohui. ³⁵ Amoneje pamehe dododsa dode toquejenajaro naqui. Ojarie otohui najorapojarona iaccamacossani-nitohui. Naraha onihipi otohui najora-jeradsapi inebonitohui. [³⁶ Maqquideje pamaha huidsajahuaji dsepedeni ijimanajari naco. Ojaria otohui najorapojarina iaccamacossanihitohui. Naraha ohuahapa otohui najora-jaradsapa inebohitohui –najari Jeso.]

³⁷ Najaro ima Jeso huati huati taha jicadsapa pocca dodosse tabaqqui pohuadsa huati toquinajari: —Ia Medsede, ajijaro imapi ¿nejecoma nanidsana tojapadseje? —quinajari. Naraha Jeso pohua cacomerajari: —Abaridsa

toqueriqquinidsa bani huatiahi ponahi nahatoqquiri tiquinajaro. Pina najaro imassa najaro occaronapomadsapi madija huapima nahatoqquiri nahitohui –najari Jeso.

18

Ima cacattemade amoneje tabira tocajajaro acco icamajarocca ima

¹ Jesopa ajijaro namidsa imadinicca imadsa pocca dodosse tabaqqui mari icanabaqquijari. Madija Diodsa huatide disseraqquri nahijine, —Diopa ohuatti mitta-jarahi –quina-jarahijine huati huati tajari. ² Nadsapa ima ajima najaro huati tajari: —Odsa pananihuaajipa ima cacattemade madijari. Puhuapa Dio noppine cappina-jarajari. Madijadsa naco cappina-jarajari. ³ Najaro odsa pananidsa amoneje maqqui dsoqquejari madijaro. Ponipi huajijiradsa ima cacattemadedsa huatide totocca najaro: “Ohua acco ticamaji” naneje najaro. “Madijacca nacasserehe onahana-dsanaponi” naneje najaro. ⁴ Naraha puhuapa poni acco camade ibojide rajari. Naraha dsotodena bodi huatodsa ajama najari: “Diodsa ocappina-jerani madijadenidsa naqui ocappina-jerani. ⁵ Naraha aji amoneje tabira tocajajaro ohuadsa tonajo huati cajiradsapi poni acco ocamana. Acco ocama-jeradsapi poni attini ohuadsa tocasseraqqunitohui” najari ima cacattemade ibobote. Nadsapa poni acco camade tohuiborajari –najari Jeso.

⁶ Nadsapa ia Medsede Jeso attipa: —Jehe, ima cacattemade bica tajarajaripa atti nama

najari. ⁷ Pohua atti nama naraha Diopa nama najarajari. Pohuapa bica tajari. Pocca tocattejidsabaqquinaja attideni mittajari. Pohuadenipa Diodsa ssiaja huati, dsome huati totoquina najari. Nadsapa ¿Dio pohuadeni acco icamabaqquihijinepa najopadsaja? Najo-jarahitohui. ⁸ Najaroa tiadenidsa huati onajaropaji: Diopa najo-jaradsa tiadeni acco tocamabaqquihitohui, onajaro. Naraha ohuapi Madija Bedi ojajaroa nidsa occanipomadsapi ¿occa madijapa Dio Pohuadsa huatide disseraqquri nahipaja napadsaja? Pohuadeni naco: “Jehe, Dio ohua acco camahi” ¿quiquinanahipaja napadsaja? onajaro –najari Jeso.

Marinaja pariseodsa jehe najaricca ima, romanodenicca taminecca dosseniji dsiniro nanaccadecca ima tadsajani

⁹ Jesodsa queriqquimanajari mota bodidenipa: —Jehe, ohuapi Moisesicca marinaja ohuacahuanissa tajaro, bica onani –quiquinanajari. Najari bodideni naco: —Madija ohuassa quina-jarajaridenipa Moisesicca marinaja eahumananissa tejerani, bicaqquri najarahi –quiquinanajari. Naraha Jesopa najarideni bodicca ima nahato tadsapa ajijaro namidsa imadinicca ima huati tajari.

¹⁰ —Madija pamahapa Diodsa huati toquinahijine dada toqquimahuaji tohuededsimajari. Ojaria Diodsa dissera tajari, pohuapa marinaja onini pariseodsa jehe najari. Ohuahapa imasiri sse tajari, pohuapa romanodenicca taminecca dosseniji dsiniro nanaccade. ¹¹ Nadsapa

marinaja pariseodsa jehe najari huadsa Diodsa huati tadsapa ajama najari: “Jehe Abi Dio, tiadsa bica onajaro, ohuapi pina madija ohuahadenissa onejerani. Pina bobotidedenissa, pina mamaidsadedenissa, pina amonejecca cahassibotedenissa onejerajaro. Pina ajajari romanodenicca taminecca dosseniji dsiniro nanaccadessa onejerani. Bica onajaro” najari. ¹² “Ohuapi semana huajijiradsa jipehe ohonebocossa najaro. Ohuapi occa dsiniro ohuadsa totoja najaro mota naqui tiadsa da da ohodsanapo najaro” najari.

¹³ —Naraha romanodenicca taminecca dosseniji dsiniro nanaccadepa huajima huajari. Madija ohuahadenipa tocattamacossamanadsa Diodsa huati huati toquinaraha pohuapa cappinaja najari tocattedsa najari. “Tabaccora onani” najari. Pohua attipa: “Abi Dio, ohuadsa teti huana taji. Ohuapi imasiri ocajini” najari taminecca dosseniji dsiniro nanaccade –najari Jeso.

¹⁴ Najaro ima huati taha jicadsapa aja — Bica onani –quiquinanajaridenidsa Jeso attipa: —Nadsama ohuapi tiadenidsa huati onajaro. Ajajari maqquideje imasiri sse tajaripa pohua bodi tobicadsapa pocca odsahuaji toccanijari. Pocca ima Dio sse ineje najaro, Diodsa tobicajari. Naraha madija ohuaha marinaja pariseodsa jehe najaripa Diodsa bodi tobica-jarajari. Pocca ima mota tabaccora taniccapi Diodsa huati tajarad-sapa pocca ima Dio sse inejereje najaro. Jehe, madijapa: “Occa biquehe qqui tiquinaji” nanaja najaripa Diodsa ajamani tojahitohui. Naraha

madijapa: “Ohuapi ajimani ojani” nanaja najarina Dio deni inanahitohui -najari Jeso.

Jesopa: —Abi, ticca biquehe ejedenidsa tinanaji -najari

Mateo 19.13-15; Maraco 10.13-16

¹⁵ Nadsapa madija poccadeni ejedeni bad-siraqquiri najarideni Jesodsa eccajonabaqquimanajari, —Jeso tatideni bara inabaqquidsa Diodsa huati tahijine -quinadsa. Naraha Jesocca dodosse tabaqqui qqui toquinadsapa attidenia: —¡Ejedenipa pohua! ¡Jesohuaji teccajonabaqquimana tajarajo! -quinajari.

¹⁶ Naraha Jeso pohuapa ejedenitohui huahua najari. Pohua huatimadedenidsa pohua attipa: —Pohuadeni jahijonana, onajaro. Eccajonabaqquimanahijine tecossamana tejeraji. Madijapa pina ajajari ejedenidenissa quinajarina Diocca cacahuehedsa toquejenahitohui -najari Jeso. ¹⁷ —Pajissara tiadenidsa huati onana: Madijapa pohua bodicca jeheniji pina ejedenicca jhenijissa najaradsapa Diocca cacahuehedsa tojajarahitohui -najari Jeso.

Tamine dsepe sse tajari Jesodsa huati tajari

Mateo 19.16-30; Maraco 10.17-31

¹⁸ Madija ojaria tamine tojajaripa Jesodsa huati tajari: —Nija Mamaride bicahi ¿nejecoma onadsa camittehe jiquejeranicca bacco onanijine? -najari. ¹⁹ Naraha manaco Jeso pohuadsa huati tajari: —¿Nejecotohui ohuadsa: “Mamaride bicahi” tajaro? Madija bicahi nohuerahi. Diona

bica tahi ojarihi. ²⁰ Naraha camittehe jiquejeran-icca bacco tinanijinepi Diocca dosseniji Moisesi dsodo inajarocca nahato tinani. ¿Najaro huapima tecahuanissa taqui? Pocca dossenijipi ajima najaro: “Madija ohuahacca amoneje tija tejeraji. Madija tinanadsoqqe-jarajo. Tiboti tejeraji. Maidsehedsa naqui madijadsa ponima ima tinahana tejeraji. Ticca abi, ticca amidsa bica tinadsa tinamadibaqquihissa tajo” nani Diocca dosseniji Moisesi dsodo inajaro -najari Jeso.

²¹ Naraha tamine attipa: —Najaro dosseniji huapimapi dsabisso ojapodsama ohuacahuajon-ajarode -najari. ²² Naraha Jeso tamine atti mittadsapa pohuadsa huati tajari: —Naraha ima ojarie tiadsa dsori taccani. Ticcanidsa tidsepetaji nemanhe manaconidsa da tinaridsaji. Nani najaro dsiniropi madija tohuati nahanaqquiri najaridenidsa da tinabaqquinijine. Nema tinanadsapi nidsa memehuaji Diocca biquehe tiadsa tojanitohui. “Nema onana” tadsapi ohuadsara dissera tinaji -najari Jeso.

²³ Naraha taminepa najaro ima mittadsa: —Jehe, nema onana -najarajari. Pohua dsepetajitohui, pocca dsinirotohui huati huana tajari. Pohuapa dsepe sse taja nadsapa bodi ocassera taha hua canajari. ²⁴ Tamine bodi ocassera tahi Jeso qqui tadsapa huati tajari: —¡A, madija dsepedeni sseqquiri najaridenipa Diocca cacahuehedsa toquejenahijine najo tani! -najari. ²⁵ —Pina bani imehibote camello etero ssessequi odinidsa toqqeqquimahijine pajira-jarajarissa

najari. Madija dsepe sse tajaripa Diocca cacahuehedsa tojahijine ssamo tani –najari Jeso.

²⁶ Nadsapa Jeso atti nama nahi mittamanad-sapa madija attidenia: —Jaho, madija tocassiejerahijinepa ssamo tani. ¿Nejecojarina tossiajapadsaja? –quinajari. ²⁷ Naraha Jeso attipa: —Madijapa ssamomo taraha Diodsapi ssamo tejerani. Pohuajinena madija tocassiejerahitohui –najari.

²⁸ Naraha Pedropa Jesodsa huati tajari: —Ia Maride, iapi tiadsa jaijaridsanijinepi icca odsa, icca madija, huapima ineboridsabaqquide –najari.

²⁹ Manaco Jeso pohuadenidsa huati tajari: —Pajissara tiadenidsa huati onana: Madija ohuadsa dsepe ijihijinepa pocca odsa icanebo, pocca amoneje inebo, pohua imecote inebobaqqui, pocca abi, ami inebobaqqui, pocca ejedeni inebobaqqui nadsapa Diocca cacahuehe madijadsa tojaridsanijine dsepe ijiridsajari. ³⁰ Nadsapa nidsa dsotode huapima pohua ineboridsajarossa nehe Djojine cajipomahitohui. Jidapana ajijaro namidsa pohua madiccadsa huemani cajihitohui. Nidsa Djojine dsama dsati tojadsa naqui camittehe jiquejeraniccadsa madidsanapohuitohui –najari Jeso.

Jesopa pohua dsoqquehicca ima huati nimanipomajari

Mateo 20.17-19; Maraco 10.32-34

³¹ Jesopa pocca dodosse tabaqqui 12 quinajari tedseje Jerosarecca jahui jai tojadsa pohuadenira huahua inabaqquidsa pohuadsa queriqquijari.

Nadsapa pohuadenidsa huati huati dsanapojari: —Aji odsa panani Jerosarehuaji jajjemoraropi nahatoqquiri tiquinani. Ohuapi Madija Bedi ojajaroa nidsa Jerosare bacco inadsapi aja Dio Atti cacomeraqquiri najarideni otahimari dsodo quinapojaropi ohuadsa tojanitohui, onajaro. ³² Ohuapi madija ohuaha jodio quejenajarajardeni dsepedenidsa ojanitohui. Najaridenina ohua jaja icanaqquimanajaro, ohua itamassoqquimanajaro, ohua ppito inaqquimanajaro nanitohui. ³³ Nadsapi ohua cossi inaqquimanadsapi ahua porimacossanidsa ohua inanadsoqqe-manadsa ohua ppa idsamananitohui. Naraha huada huatinimade tojari nadsa onahatoninitohui —najari Jeso.

³⁴ Naraha pocca dodosse tabaqquidsa Jeso pohua tahimari huati huati taraha mittamanajarajari. Pohuadeni bodidsa najaro ima ahuatora tajaro. Pohuadenipa: —Ja, pohua dsoqquehijinecca ima huati tajari —quina-jarajari.

*Jesopa Jericocca madija nocco ssire inanajari
Mateo 20.29-34; Maraco 10.46-52*

³⁵ Jesopa odsa panani Jericohuaji tohuajirajonadsapa jahui inididsa madija nocco siri huihuitta najari. Pohua dsepe da nadsa: —Ohuadsa dsiniro da tiquinaji —tatacossa najari. ³⁶ Nadsapa madija huapima pohuahuaaji jai tojeqqumama canahi mittadsapa huati tajari: —¿Nejecotohui madija huapima jai tojeqqumama canajari? —najari. ³⁷ Naraha pohuadsa huati toquinajari: —Jeso Nasaretihuaajicca huajirajonahi —quinajari. ³⁸ Nadsapa nocco siri huahua najari:

—¡Jeso, Dabi Potemahi! ¡Ohuadsa teti huana taji, onaha! -najari.

³⁹ Naraha madija tahidejonamanajari attidenia: —¡Poni! ¡Joma taji! -quinajari. Naraha denima paja huahua tarihi huahua tarihi najari: —¡Tamine Dabi Potemahi! ¡Ohuadsa teti huana taji! -napomajari.

⁴⁰ Nanaja Jeso ccajonaraha mittadsapa huaha tahi nadsa: —Jari, nocco siri ahuaji teccajonamanajo -najari. Nadsa eccajonamanadsapa pohuadsa huati tajari: ⁴¹ —¿Nejecora tiadsa onananijine? -najari. Naraha nocco siripa: —Ohua Medsede, onocco ssire tinanaji, onajaro -najari.

⁴² Nadsapa Jeso: —Jehe, tinocco ssire tana. Tibodi ohuadsa pajissa tadsapi tinomini -najari.

⁴³ Nadsapa Jesojine amadsati pohua nocco ssire tadsapa Jesodsa toccajari. Diodsa huatidseri dsanapojari. Madija huapima naco pohua nocco tonomihi qqui toquinadsapa huatidsemanadsa: —¡Diopa bica tahi, bica tahi! -quinajari.

19

Saqueo tahimari

¹ Jesopa odsa panani Jerosarehuaji toccahijine tahidepa odsa panani Jericodsaha bacco tapojari. Nadsapa Jerico nocconi toqqequimahi-jine toqquedsimajari. ² Naraha nahidsapa maqquideje dsepe ssebote madijari, pohua onipa Saqueo. Pohuapa jodiideniraha romanodenicca taminecca dosseniji dsiniro nanaccadedenicca tamine tojjari. ³ Nadsapa —Jeso ccajonahi

-quinahi mittadsapa Saqueo bodipa: —Jeso qqui onana -najari. Naraha pohnuapa tere tajarijine, madija huapi tadsapa Jeso qqui in-ajarajari. ⁴ Nadsapa Saqueo madija jai toje-qquimahi qqui tadsapa tedsejemadenina joppa tajari: —Aji ahuadsa occamarodsa Jeso toqqe-qquimahi qqui onana -nadsa ahuadsa toccamarojari. ⁵ Naraha Jeso Saqueo huittarihuaji toqqe-qquimadsapa Saqueo ahuadsa huittarihi qqui tajari. Nadsapa Saqueodsa huahua najari: —iSaqueo, huassinaja ticcaronaji! Ohuapi jidapana ticca odsahuaji omadiccana, onajaro -najari.

⁶ Nadsapa Saqueo huassinaja ccaronadsa Jesodsa: —Jehe, occa odsadsa timadiccaji -najari. Saqueo pocca odsahuaji Jeso iaccanidsapa tohuatidsenijari. ⁷ Naraha madija huapimapa Jeso Saqueoocca odsadsa toqquedsimahi qqui toquinadsapa pohnuadenira imahaha canajari: —A, Jesopa imasiri ssebotecca odsadsaraha toqquedsimaha. Jeso nama nadsapa iadsa bica tejerani -quinajari jodiodeni atti, aja romanodenicca taminecca dosseniji dsiniro nanaccadedenidsa jiperacquiri nadsa.

⁸ Nadsapa odsadsa jassi todsanaja Saqueo toتهمadsa ia Medsededsa huati tajari: —Jehe ohua Medsede, jidapapi ajima onana: Aja cappiramanajaridenidsa odsepetaji arobeni ocanarobenissa taridsadsapi pohnuadenidsa da onaridsana. Nadsama aja ocamaidsabaqquijaridenidsa naqui pina aja ocamaidsabaqquipojarissa nehe pohnuadenidsa da omanina. Nadsapi

pohuadenidsa najarossa nehe denima da, denima da, denima da omaniridsanijine –najari.

⁹ Nadsapa Jeso madija huapima mittamanahijine huati tajari: —Jehe, jidapana ajajari maqquidejepa pocca imasiri inebodsa Diodsa pajissa nadsapa pina maittaccadsama pocca idi Abarahao Diodsa pajissa najarissa najari. Nadsapa pohua, pocca odsacca madijadsa naqui Diocca tossiejehe tojaridsani ahuate tani –najari Jeso atti. ¹⁰ —Nadsama aji ohua Madija Bedi ojaropi madija jano toquejenajarideni pina ajajari maqquidejessa quinajari qquide occajonajaro. Imasiricca dodosse toquejenajarissa quinaraha onassiajabaqquihijine. Huapima ohuadsa pajissa quinadsapa camittehe jiquejeranicca cajimanahijine –najari Jeso.

Jesopa dsiniro inahapimananijinecca imadsa mari icanabaqqujari

Mateo 25.14-30

¹¹ Jesopa Saqueodsa huati huati tahidsa madija queriqquimanajarideni mittamanajari. Jeso Jerosarehuaji tohuajirajonadsa pohuadeni bodi attidenipa: —Nidsa Jeso Jerosaredsa bacco tadsapa amadsati Diocca cacahuehe tojanitohui –quinaraha najaro ima tojanijine jerani. Nadsapa Jeso pohuadeni bodi huatomanahijinepa ajjaro namidsa imadinicca imadsa mari icanabaqqujari.

¹² Jeso attipa: —Dsama huapimacca tamine deni tojahicca dsama onihicca deni toquejenajarideni ojariadsa huahua najari: “Tia ocattejidsajaro, ticca dsama arobeni cacahuade ti-

janijine. Ohuadsa huatide ahuaji ticcajonaji” najari. Nadsapa huaji taraha pohuahuaaji huatide toccahijine najorajari. Pohua bodipa: “Nidsa occanidsa ohuapi occa dsamacca tamine ojani-tohui” najari. ¹³ Nadsapa toccabote nadsa pocca dodosse tabaqqui mota 10 quinaha huahua inabaqqujari. Nadsapi dsiniro ccarara huatini ccara tanicca 10 najaro pohuadenidsa ojari ojari nehe da inaridsajaro. Nadsapa pohuadenidsa huati tajari: “Ajijaro dsinirodsa mitta, da, mitta, da taridsamanana, dsiniro tohuapini-jine. Nidsa occanidsapi ohuadsa nemanehe da tanimananijine” najari. ¹⁴ Aja tamine tojahijinepa tamine deni tojahicca madihihuaaji toccajari. Naraha toccahi nattipa pocca dsamacca madijapa pohuadsa jiperaqquri nadsapa madija dosse inabaqquimanajari, tamine deni tojahic-cadsa huati toquinahijine. Bacco toquinadsa attidenipa: “Aja ticattejidsajaripa icca tamine tojahijine jiperaqquri inani” quinajari, dsama huapimacca taminedsa.

¹⁵ —Naraha tamine deni tojahiccapa attidenidsa jehe najaradsa pohua icattejidsajaripa tamine inanajari. Nadsapa tamine tojadsapa pocca dsamadsa dosse dosse nahijine toccanijari. Bacco nanidsapa pocca dodosse tabaqqui pohuadenidsa dsiniro da inaridsajarodenidsa huahua najari, “¿Dsiniro nejecoma nehe tojani?” nahijine. ¹⁶ Nadsapa tahide qquedsimapojaria pohuadsa huati tajari: “Ohua dossede, ticca dsiniro ccarara cajariraha ojine deni tojadsapi 10 nehe tojani” najari. ¹⁷ Nadsapa tamine tojedsati manaco pohuadsa huati tajari: “Jehe, tiapi occa

dodosse bica tinani. Ohuattidsa ibora tinadsapi occa dosseniji ima bedeniraha tijine toccanissa tadsapi odsa panani 10 najarocca cacahuade tijanitohui” najari. ¹⁸ Pocca dodosse ohuaha naco qquedsimadsa huati tajari: “Ohua dossedede, ticca dsiniro ccarara cajariraha deni tojadsapi 5 nehe tojani” najari. ¹⁹ Nadsapa tamine tojedsati manaco pohuadsa huati tajari: “Jehe, tiapi odsa panani 5 najarocca cacahuade tijanitohui” najari.

²⁰ —Naraha pocca dodosse ohuaha qquedsimadsapa pohuadsa huati tajari: “Ohua dossedede, ajiaropaji ticca dsiniro. Eterodsa jore on-aqquinissa tadsa ohuacahuajaro. ²¹ Ohuapi tinoppine ocappinajaro. Tiapi madijadsa daco tijirajaro. Tiapi tarabajadsa tejeraraha ticca dodosse tabaqqujine titicaji najaro” najari. ²² Nadsapa manaco tamine tojedsati attipa: “¡Occa dodosse tabaccora tinani! Tia tetti-jine tiadsa ima ssonarijaro. Aji ohuattidsa ibo tinadsapi ohuadsa bica tejerani. Tettiapi ohuadsa: ‘Madijadsa daco tijirajaro. Tarabajadsa tejeraraha ticca dodosse tabaqqujine titicaji najaro’ taha. Naraha occa ima nahato tinadsapi ²³ ¿nejecotohui occa dsiniro tohuapinijine dsiniro ehacahuamana nanihuaji da tidsimajerajaro? Nassa occanidsapi aji occa dsiniro tohuapijarocca tadsajani ocajinitohuiraha” najari tamine atti. ²⁴ Nadsapa aja pocca dodosse tabaqqui domodeni huaridsajaridsa huati tajari: “Jari, occa ccarara tidinimanadsa ccarara 10 cajaridsana da tiquinaji” najari tamine atti. ²⁵ Naraha pohuadeni attipa: “Ia dossedede,

najaripa ccarara 10 nehe cajia” quinajari.
²⁶ Naraha tamine attipa: “Epejena, ohuapi tiadenidsa huati onajaro: Madija occa dossenijidsa dissera tadsapa pohuadsa denima tojanitohui. Naraha aja madija occa dossenijidsa dissera tajaradsapa cappirahissa tahitohui. Badsira tehe cajiraha najaro naqui todininitohui. ²⁷ Nadsama aja ohuadsa huadiqquri najarideni tamine ojanijine jiperaqquri najarideni ohuahuaaji teccajonabaqquimanadsa obacohuaaji domo huadsapa tinajica-baqquimanajo” najari tamine tojedsati atti –najari Jeso.

Jesopa Jerosaredsa bacco todsimajari

Mateo 21.1-11; Maraco 11.1-11; Huano 12.12-19

²⁸ Jesopa ima huati huati taha jicadsapa denima jai tojajari, Jerosarehuaaji bacco toquinahijine. ²⁹ Tahidepa ssono onini Oribodsa jai tojemorajari. Najaro ssonodsa odsa capamema najaro pamehe anijaro, oninidenipi Betapaque, Betania najaro. Najaro odsa pamehedsa bacco toquinabote nadsa pocca dodosse tabaqqui pamahadsa huati tajari: ³⁰ —Jari, ajicca odsa capamema nanihuaji ticadapoji. Nanihuajipi bojo namidsadsa napidsati ssoque dsanaha huahi. Najari bojopa idedsa madija huittari-jaracchahi. Najari dicca tiquinadsa teccanimanajo –najari. ³¹ —Naraha tiadenidsa madija attipa: “¿Nejecotohui bojo dicca tiquinajari?” nadsapa pohuadsa huati tiquinana: “Ia Medsede ajajari bojo tohui nadsapaja” tiquinana –najari Jeso.

³² Nadsapa tohuedanaja, bojo napidsati ssoque dsanaha huahi qqui quinajari, pina aja Jeso huati tajarissa najaro. ³³ Bojodsa bacco toquinadsapa dicca quinanaja jinedepa: —¿Nejecotohui occa bojo dicca tiquinajari? —najari. ³⁴ Naraha manaco pahuadeni cacomeramanajari: —Ia Medsede tohui nadsapaja —quinajari. Nadsapa jinede jehe nadsa eccanimanajari.

³⁵ Nadsapa bojo eccanimanajari... Jeso-huaji bacco nanimanadsapa poccadeni etero huapicca motarajaro ssiti quinadsa bojo idedsa bina quinadsa nahidsa inahittarimanajari Jeso. ³⁶ Nadsapa Jeso bojodsa toccahi tedsejema pahuadsa jahiridsajarideni poccadeni etero jahui bina idsanapomanajaro, pahuadsa: —Deni tijani —quinahijine. Nadsapa Jeso jahui bina tani motta toccadsanapojari. ³⁷ Nadsapa ssono Oribo jahui toqquedsippanihuaji bacco tabote nadsa pocca dodosse tabaqqui, pahuadsa jahiridsajarideni huapima Jeso canahato-huajapohui canahi qqui toquinapoja najarijinea Diodsa tohuatidsemana-dsanapojari. Jiri jiri dsanapomanaja mohua mohua dsanapomanaja najari. ³⁸ Attidenipa: —¡Ia Medsede onima ccajonajaridsa biquehera tojana, tojana! ¡Pohuapa ia Isaraeri potemahideni icca tamine! ¡Pohuadsa biquehera tojana, tojana! —dsanapomanajari. —Memehuaji Dio icca imadsa cacioneri canahi, canahi, najaro jonehe tojaridsanijine. ¡Memehuaji Diodsa madimanajarideni pahuadsa: “¡Deni tijani!” quinana, quinana! —quinajari, huahua dsanapomanadsa.

³⁹ Nadsapa nahi odsa pananihuajicca madija

huapima Jesocca madija tedseje toqueriqqui najari. Naraha nahidsa jodiodeni mota marinaja pariseodsa jehe quinajarideni quejemamanajari. Najarideni motaha Jesodsa huati toquinajari: — Mamaride, ticca dodosse tabaqqui huati tinabaqquijo. Nama nama quinahipa oppina tani. Pohuadeni joma tinanabaqquijo -quinajari. Aja pariseodenipa Jesodsa huatidsemanahijine jiper-aqquri najari.

⁴⁰ Naraha Jesopa pohuadenidsa huati tajari: —Tiadenidsa huati onana: Aja occa dodosse tabaqqui joma onanabaqquidsapa aji jahui inidicca sibana Diojine mohua mohua quinanitohui. Occa ima huati toquinanitohui -najari Jeso.

⁴¹ Nadsapa Jeso Jerosarehuaji tohuajiradsa najaro odsa panani qqui tadsapa nahicca madija-tohui oji oji najari. ⁴² Pohua attipa: —A, jidapana tiadenidsa Diocca jonehe tojanitohuiraha ssamoqquri tiquinajaro. Jehe, ajijaro jonehe pajissacca tohuini tiquinejeradsa najarojine Diocca ima tiadenidsa ahuato tejerajaro. ⁴³ Nema tiquinadsapi nidsa ima oppina tehe tiadenidsa tojanitohui. Jerosarecca siba hua nahujanini memedsararaha idenihuaji ticcadeni huadidenipa nami ppa inamaromanadsa siba hua nahujanini tetepi bacco toquinadsa cottajuhujanimanaha jicadsapa tiadenidsa ssonarimanahitohui. ⁴⁴ Nadsapi tijicaridsanitohui. Ticcadeni odsa siba hua tamaroni huapima naqui pohuadenijine cco-cco bototo tohuedi, cco-cco bototo tohuedi naridsanitohui. Tiadeni Tonassajade Cristo-Mesia tiadenidsa Dio dosse inaronaraha tibodideni pajissa tiquinejerajaro.

Nema tiquinadsapi ima oppina tehe tiadenidsa tojanitohui –najari Jeso.

Diodsa dada toqquimacca odsadsa manaconitohui dadadedeni mohua ininebaqqijari

Mateo 21.12-17; Maraco 11.15-19; Huano 2.13-22

⁴⁵ Nadsapa Jeso Jerosaredsa bacco todsimadsa Diodsa dada toqquimahuaji toqquedsimajari. Najaro odsacca boronidsa madija bani bedi Diodsa da tahijinecca dade toquejenahi qqui tajari. Manaconitohui dadadedeni qqui inabaqquidsapa huapima mohua ininebaqqijari. ⁴⁶ Nadsapa pohuadenidsa huati tajari: — Dio Atti dsodo nanidsa ajima najaro: “Occa odsapi ohuadsa huati huati toquinahijinecca odsa tocajanitohui” naponi nade Dio Atti dsodo nanidsa. Naraha tiadenipi madija titicamaisabaqquimana nadsa tijinedenia pina bobotidenicca quequeriqqui odsassa ticananamajaro –najari.

⁴⁷ Jesopa huada huajjiradsa Diodsa dada toqquimahuaji mari mari ihicanabaqqui najari. Naraha dada toqquimade taminedeni, jodiodenicca marinaja maridedeni, odsa panani Jerosarecca deni toquejenajarideni quinadsa Jesodsas jiperaqquri nadsa pohuadeni attipa: — ¿Nejecoma inanadsa Jeso inanadsoqquehijine? –quiquinanajari. ⁴⁸ Jeso dsoqquehijine tohuini quinaraha madijapa Jesocca marinaja pohuadenidsa bica tadsa mittade dissassera taja najari. Nadsapa inanadsoqque-manahijine pohuadenidsa ssamo tajaro.

20

—¿Nejecojaricca dacorehe ticajijaro?
 –quinajari Jesodsa

Mateo 21.23-27; Maraco 11.27-33

¹ Jesopa huada huajijiradsa Diodsa dada toqquimahuaji madija huapima mari mari ihicanabaqqui najari. Ima bicani icassiejeranijinecca Jeso madija mari icanabaqquiraha pohuadsa jiperaqquiri najarideni aja dada toqquimade taminedeni, jodiodenicca marinaja maridedeni, jodiodeni ime jocohuideni quinadsa Jesodsa tohuajiressimanajari. ² Nadsapa pohuadsa huati toquinajari: —Iadsa ticca ima tecomeraji. ¿Nejecojaricca dacorehe ticajijaro? ¿Nejecojari attidsa dadadedeni mohua tininebaqquijari? –quinajari, Jeso pohua cacomerahijine tohuini quinadsa.

³ Naraha manaco Jeso pohuadenidsa huati tajari: —Ohua naqui tiadenidsa huati onana. Ohuadsa tecomeramanaji. ⁴ Huanopa ¿nejecojari icadossedsa topa idsanabaqquijaritta? ¿Diojine ttarana, madijajine ttarana? ¿Tettideni nejecoma tiquinani? –najari Jeso.

⁵ Naraha taminedenipa pohuadenira huati tocanirere canajari: —Jaho “Huanocca topanijipi Diocca dosseniji” inadsapi Jesopa: “¿Nejecotohui pohuadsa jehe tiquinejerajarotte?” nahitohui –quinajari. ⁶ —Naraha “Huanocca topanijipi madijacca dosseniji” inadsapi madija sibadsa ia toquinabaqquirana. Aja madija huapima attidenipa: “Huanopa Dio icadossejari. Dio

Atti cacomerabotedija” quiquinanade –quina-jari taminedeni, madijadeni noppine cappinamanadsa. ⁷ Nama quinadsapa taminedeni Jesodsa huati toquinajari: —Huano madija topa idsanabaqquihijine pohua dossedepa ssamomo inani –quinajari.

⁸ Nadsapa Jesoa: —Ohua naqui ohua dossedepa onipa tiadenidsa ohuacomera-jarahi –najari.

Huidsaja cacahuade tabaccoraqquri najari-denicca ima

Mateo 21.33-44; Maraco 12.1-11

⁹ Dsotode Jesopa pocca marinaja ajijaro namidsa imadinicca ima tadsajani madija mari icanabaqquijari: —Madijapa pocca huidsajadsa ppa nahi uva pohuara ppa inajari. Nadsapi pocca huidsaja ecahuamananijine madija-tohui qqui naridsajari, nahi pocca huidsajadsa tarabaidsa quinahijine, ppa nahi uva ecahuamanahijine. Uva bono jadadsapa motapa huidsaja jinededsa tojahijine. Motapa huidsaja cacahuadedeni pohuadenidsa tojahijine. Nadsapa pocca huidsaja ecahuamananijine madija qqui inabaqquidsapa pocca huidsaja pohuadenidsa inebojaro. Nadsapa jinede dsama huaji tanihuaji toccajari. Nahidsa madi-dsanapoccahijine. ¹⁰ Uva bono jadahicca abadsico bacco tadsapa huidsaja jinedepa huaji tanidsa madiraha pocca dodosse ojaria pocca huidsajahuaji dosse inanjari, huidsaja cacahuadedeni uva bono mota pohuadsa da quinahijine. Naraha pocca dodosse huidsajahuaji bacco nanidsapa huidsaja cacahuadedenipa inajidsomanajari. Uva jiraha

dosse inanimanajari. ¹¹ Nadsapa huidsaja jinede pocca dodosse ohuaha dosse inanijari. Huidsaja cacahuadedenihuaji bacco naniraha najari naco inajidsomanajari. Itamassomanadsa uva jiraha dosse inanimanajari. ¹² Nadsapa pocca dodosse ohuaha dosse inanijari. Naraha najaripa inabiqueramanadsa huidsaja inidihuaji jadsirema joca coro ininemanajari.

¹³ —Najari toccanidsapa huidsaja jinede attipa: “¿Nejecoma onanijine? A, jehe, ajima onana. Occa ejedeni ohua obonoccoriccana dosse onanina. Najaridsana cappinamanahitohui” najari. ¹⁴ Nadsapa dosse inanijari, toccaniraha huidsajahuaji bacco nanidsa huidsaja cacahuadedenipa pohua qqui toquinadsapa pohuadenira huati tocanirejari: “Ajaripa huidsaja jinede bedi. Nidsaranibote imehi dsoqquedsa huidsajapi pohuadsa tojanitohui. Jari, inanadsoqquena, huidsajapi icca tojanijine” quinajari. ¹⁵ Nama quinadsapa huidsaja jinede bedi dama quinadsa huidsaja inidihuaji joca quinadsa inanadsoqqemanajari –najari Jeso.

Nadsapa pohuadsa queriqquimanajaridenidsa huati tajari: —Jari, tibodideni huatoji. Huidsaja jinede pohuadenidsa ¿nejecoma napadsaja? ¹⁶ Pohuapa ima mittadsapa pocca huidsajahuaji toccanipomahitohui. Manaco pocca huidsaja cacahuadedeni inajicaridsahitohui. Pocca huidsajapi madija ohuahadenidsana da inanitohui –najari Jeso.

Naraha pohuadsa queriqquimanajaridenia najaro ima mittamanadsapa: —¡Jaho, najaro ima iadsa toja-jerana! –quinajari.

¹⁷ Nadsapa Jeso pohuadeni icattabaqqui nadsa huati tajari: —Tettidenipi: “Najaro ima iadsa toja-jerana” tiquinaraha pajissa tojanitohui. Najaro imassa najaro Dio Atti dsodo nanidsa dsodo napojaro. Imapi ajima najaro:

“Odsa sibadsa icanahatomananijinepi nanahatodedenipa siba ojariepi ettajomanani nade.

Naraha dsotodepi najaro sibana odsa daco cajiranjine tojajaro”

nani Dio Atti dsodo nanidsa dsodo napojaro.

¹⁸ Nadsama najaro siba dacorehe cajijarodsa madija tohuedimamanadsapa poccadeni ima tossamodsapi assiredeni tajoriridsamanajarissa quinahitohui. Najaro siba madijadsa ssonaridsapi mere tocaniredsapa jamiromanahissa tahi-tohui –najari Jeso, pohua tahimari huati tadsa. (Aja pohua atti nama najaripa madija pohuadsa pajissa quina-jaradsapa paja jicarihi nahitohui, najari.)

¹⁹ Nadsapa dada toqquimade taminedeni, jodiodenicca marinaja maridedeni quinadsa Jesocca marinaja mittamanadsapa bodideni nahatotoquiri najari: —Jesopa icca ima huati huati tajari, iapi pohua ettajojarijine –quinajari. Nadsapa Jesodsa huadimanadsa: —¡Jari, jidapana Jeso todsepe inanana! –quinaraha madija nopinedeni cappinamanadsa dama quina-jarajari.

—¿*Romanodenicca taminedsa icca dsiniro mota da inanijine bica taqui?* –quinajari

Mateo 22.15-22; Maraco 12.13-17

²⁰ Nadsapa dada toqquimade taminedeni, jodiodenicca marinaja maridedeni quinadsa Jeso

inoccodsamanajari. Attidenipa: —Jesopa roman-
 odeni jiperaqquri nahicca huati tadsapa roman-
 odenicca dosseniji cacahuadedsa huati inani-
 jine, nahi pohua dsepedsa tojahijine –quinajari.
 Nama quinadsapa poccadeni madija mota Je-
 sodsa huati toquinahijine dosse inabaqquimana-
 jari. Puhuadenipa pina pajissa Jeso pohua
 attitohuissa quinaraha pohuadeni bodidsa maid-
 sehe najoramanajari. Nadsapa Jesodsa tohua-
 jiressimanajari. ²¹ Puhuadenipa Jesodsa ajama
 quinajari: —Nija, Mamaride, ticca marinajapi
 toccanissa tajaro nahatoqquri inani. Ticca
 ima dsori torani naridsajaro. Madija attideni
 noppine ticappina-jeradsapi ticca ima onihi toja-
 jerajaro. Madija deni tojajari, madija dsepe
 sse tajari, madija ajamani tojajari tedsejapa
 tiadsa najarissa caniqquimerajari. Pajissara
 Diocca marinajadsa madija madimanahissa tahi-
 jine mari mari titicanabaqqui najari –quina-
 jari Jesodsa. ²² —Nadsama iapi romanodenicca
 tamine deni tojahicca pocca dossenijidsa icca
 dsiniro mota pohuadsa da inanijine ¿bica taqui?
 ¿Bica tejararane? Moisesicca marinajadsa ¿op-
 pina taqui? ¿Oppinera tarane? ¿Tetti nejecoma
 tani? –quinajari maidseheda.

²³ Puhuadsa ima inassonarimananijine huati
 toquinaraha Jeso poccadeni maidsehe nahato
 tajari. Nadsapa pohuadenidsa huati tajari: ²⁴ —
 Jari, dsiniro denario ohuadsa nohue ticana-
 manaji –najari. Nohue icanamanadsapa huati
 tapomajari: —Jari, ajijaro ccararadsapi ¿nejeco-
 jari corimena anijaro? ¿Nejecojari oni dsodo
 najaro? –najari Jeso. Naraha pohuadeni attipa:

—Romanodenicca taminedija -quinajari.

²⁵ Naraha Jeso attipa: —Romanodenicca tamine pocca dsiniropi pohuadsa da tinanimanaji. Naraha Diocca tiquejenadsapi Pohua jipa tahiccara Pohuadsa da tiquinaji -najari Jeso.

²⁶ Naraha taminedeni, mamaridedeni quinaripa Jeso atti cobara inanamanadsa madija queriqquimanajari huapima mittamanahijine tohuini quinaraha pajiramana-jarajari. Jabojomanadsa attidenipa: —A, icca ima ecomeranjine nahato tajaria -quinadsa todidimana najari.

Nidsa jicamanajarideni nahatonimanadsapa cajicaji nohueranitohui

Mateo 22.23-33; Maraco 12.18-27

²⁷ Nadsapa Isaraeri potemahi jodiodeni mota marinaja onini sadosseodsa jehe quinararideni Jeso madihihuaji jahijonajari. Poccadeni marinajapi: —Idsoqquedsapi inahatoninijine nohuerani -quiquinanajari. ²⁸ —Najaro imadsa Jeso atti ijine tossamodsa cobara tana -quinadsa Jesodsa najaro ima huati toquinajari: —Mamaride, Moisesicca marinajadsapi ajima nani: “Maqquidejepa amoneje cajiraha ejedeni jiraha dsoqquedsapa pocca amonejepi pohua imecotena icajina, nahi ejedeni cajidsapa pocca ato dsoqquejaricca ejedenissa nahijine” nade Dio Atti Moisesijine dsodo nanidsa -quinajari. ²⁹ —Nadsama tiadsa ima ajima najaro huati inana: Aja pohuadeni imecote pohuadenira 7 quinaha madimanajari. Tahideccaha amoneje cajipojari, naraha bedi jiraha dsoqquejari. ³⁰ Dsotodecca naco pohua ohuaha bedimeni icajiraha ejedeni

jiraha dsoqquejari. ³¹ Dsotodecca naco najaro amoneje icajiraha najari naco ejedeni jiraha dsoqquejari. Najarossa dsanapojaro cajide 7 quinaraha ejedeni jiraha jicajari. ³² Najarideni jicadsapa poni naqui dsoqquejaro. ³³ Nadsapi dsama jicadsa madija nahatonimanadsapa pohua imecote 7 quinajaripa najaro amoneje icajiqquimanaporaha ¿nejecojarina ponicca maqqui tojapadsaja? -quinajari.

³⁴ Naraha Jeso attipa: —Jidapana aja namidsa madimanajaridenipa caji caji cacana nadsa madimanaccajari. ³⁵ Naraha nidsa dsotode madijapa memehuaji Dio madihihuaji madimanadsapa nama quinapoma-jarahitohui. Caji caji canapoma-jarahitohui. Aja Diodsa iboraqquri najaridenipa Dio inapajirabaqquihissa taja nadsa pohuadeni inahatonibaqquihitohui. ³⁶ Nadsapa pohuadenipa dsoqquemanapoma-jarahitohui. Pina Diocca dodosse tabaqqui memehuajicassa quinahitohui. Diocca nahatonihe cajimanadsapa Diocca ejedeni toquejenajari.

³⁷ —Nadsama Diojine madija nahatoni-manahicca imapi Moisesi dsodo inajaro. Aji ahua diji tani tahimarinidsa Moisesipa ia Medsede Dio Atti dsodo inajaro: “Ohuapi Dio, ticca idideni Abarahao, pohua bedi Isahaca, pohua bedi Jacobo quinajaridenicca Dio ojani” nahi nade, Moisesijine dsodo nanidsa.

³⁸ Aja Dio Atti nama nadsapa Abarahaodeni nahatonimanadsa madimana-dsanapohuicca ima ahuato tajaro. Diopa paja dsoqquemanarihi najaridenicca Dio jarahi. Diopa camittaqquri

najaridenicca Dio. Pohnuapa jidapana naco poccadeni Dio. Pohnuadsa huapima madimanasanapojari –najari Jeso.

³⁹ Jodiidenicca marinaja maridedeni motana Jesodsa huati toquinajari: —Jehe Mamaride, imapi najarona paji –quinajari.

⁴⁰ Nadsapa aja huati toquinapjaripa cappinamanadsapa apaja quinajari.

—¿Cristo-Mesiapa nejecojari potemahi tiquinajaro? –najari Jeso

Mateo 22.41-46; Maraco 12.35-37

⁴¹ Jesopa madija bodideni huatomamanahijine pohnuadenidsa huati tajari: —¿Nejecotohui madija attidenipa: “Cristo-Mesiapa Dabi Potemahi” quiquinanajari?

⁴² Naraha tamine Dabipa maittaccadsama madidsa pocca jijiridsa pohnua tedsejemacca ima dsodo inapojaro. Dabicca dsodonijipi ajima najaro:

“Ia Medsede Diopa ohua Medsede Mesiadsa huati tajari: ‘Ohuitori nahatonihuaji tittariji. Ohua tedsejepi tohuatti dacorajaro ticajiji’ najari. ⁴³ ‘Nidsaranibote tia huadidedenipa ajamani onanabaqquihitohui. Poccadeni dacorehepi onajicanitohui’ napohui nade Dio.”

⁴⁴ Naraha madija attidenipa: “Cristo-Mesiapa tamine Dabi Potemahi” quiquinanadsapa ¿nejecotohui Dabipa pohnua potemahidsaraha: “Ohua Medsede” napojaritta? –najari Jeso.

*Pina jodiodenicca marinaja maridedenicca
madiessa tiquinejeraji*

Mateo 23.1-36; Maraco 12.38-40; Roca 11.37-54

⁴⁵ Madija huapima taharibobo canadsa Jesopa pocca dodosse tabaqquidsa huati huati tajari: ⁴⁶ —¡Paji, tiadenipi! Pina jodiodenicca marinaja maridedenicca madiessa tiquinejeraji. Pohuadenipa etero dequerajarodsa huedsaridsamanadsa attidenipa: “Tapi pina taminessa inani” quiquinanajari. Aji dadahuajicca jahuidsa jahiridsadsa naco madija pohuadenidsa: “¿Nija, bica tinani? Tiapi deni tijani” quinahijine tohuini quiquinanajari. Dio Atti mamarihuaji jassi tarihijinepa deni toquejenajaridenicca huihuittaridsa jassi tarihijine tohuini quiquinanajari. Jipacque imenidsa naqui deni toquejenajaridenicca huihuittaridsa jassi tarihijine tohuini quiquinanajari.

⁴⁷ Nadsama tabira tocajamanajarodeni ponideni madimananijineccaraha icamaidsabaqquimanadsa pohuadenidsa totoja nadsapi ponidenicca odsa naqui pohuadenidsa totocajaridsa najaro. Naraha poccadeni tabaccorehe ahuatora tanijinepi Diodsa huati huati toquinadsapa poccadeni huatinaja dequerajaro, aja madija pohuadenidsa: “A, Diodsa disseraqquri nahi” quinahijine. Pohuadenipa Dio Attima mamaisamana nadsapa nidsa Diocca najidsohue denima oppina tanicca pohuadenidsa ssonarinitohui -najari Jeso.

21

*Amoneje tabira tocajani ponicca dsiniro
Diodsa da inanicca ima*

Maraco 12.41-44

¹ Jesopa Diodsa dada toqquimahuaji dsepedeni sseqquiri najarideni dsiniro dade toquejenajari qqui inabaqqujari. Poccadeni dsiniro da naqquinajacca bahodsa hua idsamanajaro. ² Nanihuaji naqui amoneje tabira tocajanipi poni madinijinecca dsiniro bedeniraha ponicca danijijine capamehe cororo icadsajaro. ³ Nadsapa Jeso pohnuadsa toqueriqquijaridenidsa huati tajari: —Pajissara tiadenidsa huati onana: Ajijaro amoneje tabira tocajani ponipi cappiraraha ponicca daniji dsiniro bedeniraha deni tojani. Pina Diodsa denima da inajarossa najaro. Naraha aja huapima dsepedeni sseqquiri najaridenicca danijipi pina ajimani Diodsa da quinajarossa najaro. ⁴ Pohnuadenipa poccadeni dsiniro mota arobeni da quinajaro. Naraha ponipi cappirajaro, tohuati nahana tajaro. Poni madinijineccaraha da inehe jicajaro —najari Jeso.

*—Diodsa dada toqquimahuajicca odsa taborid-
sanitohui —najari Jeso*

Mateo 24.1-2; Maraco 13.1-2

⁵ Jesocca dodosse tabaqquipa Diodsa dada toqquimahuajicca odsa qquide bica tocanadsa imahaha canajari: —A, siba noponi bicabotedsa nahatoridsajaro. Madijacca daniji oro dsi-behi tajarodsa nehebedsoridsajaropi bicaqqquiri nani —quinajari. ⁶ Naraha Jeso attipa: —Aji odsa imeni sibadsa nahatoridsani jidapana

qqui tiquinaraha nidsa dsotodepi taboridsehe jicanissa tanitohui -najari Jeso.

Dsama jicani tohuajiradsa nahatoqquiri inani-jinecca ima

Mateo 24.3-28; Maraco 13.3-23

⁷ Nadsapa Jesocca dodosse tabaqqui pohuadsa huati toquinajari: —Ia Maride, jidacca huati tinajaropi ¿nejecoma nadsa tojapadseje? Najaro ima tohuajiradsa nahatoqquiri inanijinepi ¿nejecora qqui inapopadseje? -quinajari.

⁸ Nadsapa Jesoa: —Paji, madija tiadeni tocamidsabaqqui-manarana. Nidsa madija huapi taha pohuama ohua onidsa maidsamanadsapa: “Ohuapi Cristo-Mesia ojani” quiquinanahitohui. “Jidapana dsama jicanicca bacco tani” quiquinanahitohui. Naraha najarideni attidsa jehe tiquinejeraji. ⁹ Nadsama madija dsama onihicca, dsama onihicca tedseje jadsire imeni inahatomanani tahimarini timittamanadsa naqui ticappinamana tejerana. Ticcadeni dsamahuaji, dsama onihihuaji naco huadiqquri najarideni taminedenicca cacahuehe najidsoridsamanahi timittamanadsa naqui ticappinamana tejerana. Najaro ima oppina taniccapi tahide tojaporaha dsama jicanijinepi nohueraccanitohui -najari Jeso.

¹⁰ Jesopa denima huati huati tajari: — Nadsama madija dsama onihicca, dsama onihicca tedseje jadsire inanamanaridsanitohui. Tamine ohuahacca madija, tamine ohuahacca madija tedseje cahadire-ridserahitohui. ¹¹ Nadsama namidsadsa

imeni naqui caji tanitohui, pemi naqui cajiridsanitohui. Dsamacoma naqui dsama onihidsa, dsama onihidsa cajiridsanitohui. Nadsapi memehuaaji naqui oppina tanicca ahuatodsa tijabojomananitohui. Najaro qqui tiquinadsapi dsama jicanicca bacco tani nahatoqquiri tiquinanitohui –najari Jeso.

¹² —Naraha aji ima huapima huati huati onajarrocca toja-jeraccadsama tiadenidsa ima tojaridsaponitohui. Madija huadiqquiri najarideni tiadeni tadamamanadsapa tiadeni tonajidsobaqqui-manahitohui. Jodiodenicca Dio Atti mamarihuaaji tiadeni tohuaqquedsimabaqqui-manahitohui, toponi cocorodsa naqui tiadeni coro todsimabaqquimanahitohui. Otahimari tiadenidsa tojajaro acconi huadimanadsa dsama onihicca dsama onihicca madija tamine deni toquejenarihuaaji tiadeni tohuaqquedsimabaqqui-manahitohui. Dsama cacahuadedenihuaaji naco tiadeni tohuaqquedsimabaqqui-manahitohui. ¹³ Nani pohuadeni dsepedsa tiquejenadsa taminedenidsa ticcadeni ima tecomeramanadsapi otahimari naqui mittamanahijine.

¹⁴ —Nadsama ticcadeni ima tecomeramanadsapi tiadenidsa ima ssonari-jeranijine tibodideni titinajoramanapo nejerana.

¹⁵ Tettideni tecomeramananijinepi tiadeni acco ocamabaqqunitohui, tiadeni huadidedeni tettideni inassamomana-jeranijine, ima huatide nahatoqquiri tiquinanijine. Nadsapa pohuadeni attina tettidenidsa ajimani tojanitohui.

¹⁶ Naraha tiadeni huadidedeni naco ticca abi itide, ticca ami nitide, timecotedeni itide, ticca madija itide, titesse itide pohuadenipa otahimari tiadsa tojajaro acconi huadimanadsa todsepe tiquejenanijine tiadeni eccoramana-ridsanitohui. Tiadeni mota naqui tiadeni inanadsogque-maneje camaridsanitohui. ¹⁷ Occa madija tiquejenajarojinepi madija huapimapa tiadenidsa jiperaqquiri nahitohui. ¹⁸ Naraha Dio tiadeni tohuacahua-baqquihitohui. Pohua jipa tadsa naco titatideni conani ojarie amossineje cama-geranitohui. ¹⁹ Nadsama tiadenidsa ohuattipi: ¡Dacoco tijiraji! Najaro huadie tinahanamana-dsanapodsapi tiadenina ticassiejeranitohui –najari Jeso.

²⁰ Jesopa dsama jicanicca ima denima mari icanabaqquijari: —Nidsa dsotode ticcadeni odsa panani Jerosare huapihuaji jajadsirededeni cottajahuajanimanaha jica nahi qqui tiquinadsapi: “Jerosare jicanicca huada bacco tani” tiquinana. ²¹ Nadsama aji dsama Jodeahuaji timadiridsa-manajaropi ssonohuaji tidomo toqqemorana. Jerosaredsa timadimanajaro naqui tidomo tocana. Aji huidsajadsa timadimanajaropi odsa pananihuaji jai tijani tejerana, tijicarana.

²² —Najaro ima oppinabote tojajaropi Jerosarecca madija iboqquiri nadsapa Diocca najidsohue pohuadenidsa ssonarinitohui. Pina Dio Atti dsodo napojarossa nehe tojanitohui. ²³ Najaro ima oppina tajaro bacco nadsapi amoneje jiamanajarodeni, bacconideni ijimanajarodeni naqui joppa toquinanijine tohuati nahanaqquiri nanitohui.

Jehe, aijjaro dsamacca madija Diocca najidsohuejine ocasserani ahuamanahitohui. Diocca huadie imeni ajajari madijadenidsa ssonarinitohui. ²⁴ Jadsirejinecca massitodsa motadenipa jicaridsahitohui. Motadeni naco jajadsirededeni itadamamanaridsadsa pohuadeni dsepedsa toquejenadsapa dsama onihihuaji dsama onihihuaji iaccanibagquidridsamanahitohui. Nadsapa jodio quejenajarajardeni deni toquejenadsapa Jerosare inatabaccoramananitohui. Pohuadenijine Jerosarepi pina ttai ttai tojajarossa nanitohui. Naraha dsotodepi poccadeni huajano Jerosarehuaji madimanahijine pajiranissa tadsapi najidsohue jicanitohui –najari Jeso.

Jeso ccaronapomahicca ima

Mateo 24.29-35, 42-44; Maraco 13.24-37

²⁵ Jesopa ima denima huati huati tajari: — Ima nahatoqquiri tiquinaponijinepi maji, abadsico, abadsico bedi najaridenipa tojidsaridsahitohui. Aja memehuaajicca tojidsaridsadsapa namihuaji madimanajarideni jabojo quinahitohui. Coridsa imenicca passo poni ssodadani tojidsadsapi mohuini oppina tajarojine madija huapima jabojo quinahitohui. ²⁶ Jidapapa aja maji, abadsico, abadsico bedi naco dacoraqquiri naraha najaro ima tojadsapi meme dsadsa nadsa memecca huapima huenene huenene canahitohui. Madijapa: “¡Iadsa dsama oppina tani! ¿Nejecoma napadseje?” quinadsa cappinamanadsapa tossamoridsamanaja huahuatia cosamanerinaja camahitohui. ²⁷ Nadsana ohuapi

Madija Bedi ojajaroa meme essenima oqueje-mehe occaronapomani madija huapima qqui toquinahitohui. Occa dacorehe, occa deni tojehe ahuato tanitohui. ²⁸ Madija ohuahapa cappinaridsa-manaraha tiadeni occa madijapi aji huati onajaro qqui tiquinadsapi pina tetidsem-anana. Memehuaji ticattamacossassa canana. Ohuapi tiadeni odinibaqquinijine titohuideni occaronanitohui –najari Jeso.

²⁹⁻³⁰ Nadsapa ajijaro namidsa imadinicca imadsa pohuadeni mari icanabaqquijari: —Jari, ahua iquiera tahimaridsa ticahatteraji. Ahua iquiera, ahua huapima naco eppe moro ni-manihi qqui tiquinadsapi: “Jehe, dsadsajade tojemanini” titiquina najaro. ³¹ Pina najaro imassa najaro aji dsama jicani tahimarini huati huati onajaro qqui tiquinadsapi: “Jehe, Diocca cacahuehe tohuajirajonani” tiquinana, onajaro –najari Jeso.

³² —Pajissara tiadenidsa huati onajaro: Aji dsama jicani tahimarini huati huati onajarocca madija dsoqquemana-jaraccadsama najaro ima huapima tojanissa tani qqui toquinacchitohui.

³³ Meme, nami naqui jicaridsanissa tanitohui. Naraha ohuattipi jiquejeranitohui. Aji huati huati onajaropi najarossa nanitohui –najari Jeso.

³⁴ —Paji tiadenipi tiadeni tecahuamananissa taji, tibodideni ccaracossa-jeranijine. Aji bica tejeraraha tohuini tiquinajaroccapa tineboridsamanaji. Aji dse tiquinadsa comani teteridsamana najaro naqui tineboridsamanaji. Aji timadimananicca tohuira tibodideni huahuato najaro naqui tineboridsamanaji.

Najaro tinebomana-jeradsa dsama jicanicca huada amadsati bacco tadsapi huajo ticanirenitohui. ³⁵ Najaro huada bacco tadsapi pina tajapa abadsa cassonaridsa tohuittamanajarissa tiquinarana. Dsama jicanicca oppinehepi ajijaro dsama huapimacca madijadsa ssonarinitohui. ³⁶ Najaro noppineni tinajoramanehe timadimanaji, onajaro. Diodsa huati huati titidsanapomana naji, aji ima oppina tehe tojadsa dsori ticanirenijine. Ohuapi Madija Bedi ojajaroa nidsa occaronapomadsapi ima jirehe obacchohuaji tidomodeni huanijine naqui Diodsa huati huati titidsanapomana naji, onajaro -najari Jeso.

³⁷ Jesopa huada huajijiradsa Diodsa dada toqquimahuaji maride totoja najari. Dsomed-sapa Ssono Oribo quiquinanahihuaji totoccani najari. Nahidsa huahuada najari. ³⁸ Naraha madija huapimapa dsidsidsamassa Diodsa dada toqquimahuaji bacco bacco nanajonamana najari, Jesocca marinaja mittamanahijine.

22

Jeso todsepe tojahijine ima najoramanajari

Mateo 26.1-5, 14-16; Maraco 14.1-2, 10-11; Huano 11.45-53

¹ Jodiodenicca ejete imeni tohuajirajonajaro, oninipi Pan ssaja tajarahicca. Najaro ejete onini onihipi Pascoa. (Ettidsapi: Dio tossoniqquimajari, inajaro.) Najaro ejete toja-jeraccadsapi

ajijaro ima tojajaro. ² Dada toqquimade taminedeni, jodiodenicca marinaja maridedeni quinaridenipa Jesodsa jiperaqquiri nadsa attidenia: —¿Jeso nejecoma inanadsa dsoqquehijine? —quinajari. Naraha pocca madija noppine cappinamanajari. —Jeso dama inahi qqui toquinadsapa mohua mohua canarana —quinajari.

³ Nadsapa Joda. Puhuapa Jesocca dodosse tabaqqui 12 quinajari ojaría. Puhua oni ohuahapa Iscariote. Puhua bodidsa imasiri maride Satana toqquedsimadsapa pohana Jeso eccorahijine bodi najorajari. ⁴ Nadsapa dada toqquimade taminedeni, nahicca odsa cacahuadedeni quinaridenidsa Joda huatide toccajari. —Jeso tidsepedenidsa onanahijine, onajaro —nadsa pahuadeni tedseje Jeso dama quinahijine imahaha canajari. ⁵ Nadsapa huatidsemanadsa: —Jehe, nema tadsapi tiadsa dsiniro da inanitohui —quinajari. ⁶ Nadsapa Joda jehe nadsa bodi najorajari. Toccanidsapa Jeso pahuadenidsa eccorahijine innocodsaridsajari. Puhua bodipa: —Madija nohue quiradsa Jeso dama tiquinajo, onanijine —najari.

Ia Medsedecca jipaqquie

Mateo 26.17-29; Maraco 14.12-25; Huano 13.21-30; 1 Corintodenidsa 11.23-26

⁷ Pan ssaja tajarahicca ejete bacco tapojaropi huada 7 nehe jicanijine. Najaro ejetecca huada tahideccadsa jodiodeni pahuadeni motta edede bedi Diodsa da da quiquinanajari. Edede bedi

inanadsoqqe-manadsa ibanamanadsapa jipamanajari. Najaro ejete oninipi Pascoa quinajari. ⁸ Nadsa Jesopa Pedro Huano tedseje dosse inabaqquijari: —Jidapana Pascoacca jipaqquie tinajoramanapoji, dsome ijipaqquiniijine –najari. ⁹ Naraha pohuadeni attipa: —¿Nejecohuaji inajoranijine? –quinajari.

¹⁰⁻¹¹ Naraha Jeso pohuadenidsa huati tajari: —Jerosarehuaji ticadapoji. Nahidsa madija joridsa passo dsojo tanihi qqii tiquinadsapa najari natti ticadamissadsa pocca odsa bacco tiquinana. Nadsapi nahicca odsa jinededsa huati tiquinana: “Ia Maride attipa: ‘¿Nejecohuajicca coba canahuajaninidsa Pascoacca jipaqquiedsa ojipanijine occa dodosse tabaqqui tedseje?’ napaja” tiquinana. ¹² Nadsapa pocca odsa tetepicca coba canahuajanini imeni tiadenidsa nohue inanitohui. Nanidsapi huahuanari, huihuittari najoraponi. Nanidsana jijipa tinajoramanaponijine –najari Jeso. ¹³ Nadsapa tohuedadsapa pina Jeso pohua huati tajarissa najaro odsa najorani qqii toquinajari. Nanidsa Pascoacca jipaqquie dsome jipaqquimanahijine najoramanajari.

¹⁴ Jipamanahijinecca maji bacco tadsapa Jeso pocca dodosse tabaqqui tedseje jipamanahijine huahuanaridsa jassi nahuajanijari. ¹⁵ Nadsapa Jeso pohuadenidsa huati tajari: —Obodipi: Ocasserani ohua-jeraccadsama occa dodosse tabaqqui tedseje Pascoacca jipaqquiedsa ijipaqquie naccaraho, ohodsanapo najaro. ¹⁶ Nadsama ajijaro ejetecca jipaqquiepi ojipapomanijine huaji taccani. Nidsa

Diocca cacahuehe tojadsana nanidsana ijipacquipomanitohui -najari Jeso.

¹⁷ Nadsapa Jeso dsedse equidi nadsa Diodsa huati tajari: —Jehe Abi Dio, ticca daniji iadsa bica tahi -najari. Nadsapa pohuadenidsa huati tajari: —Aja, tiadeni huapima dse tiquinajo.

¹⁸ Ajijaropi tiadenidsa huati onajaro: Diocca cacahuehe tojanijinecca huada bacco tejeraccadsapi uva ppejene dse onapoma-jaracchitohui -najari Jeso.

¹⁹ Nahi dsotodepa pan pohua dsepedsa idi nadsa Diodsa huati tapomajari: —Jehe Abi Dio, ticca daniji iadsa bica tahi -najari. Nadsapa icanarobedsa dside jai da, dside jai da inaridsajari. Nadsapa Jeso huati tajari: —Ajijaropi ohuemecca ima. Ticassiejeranijinepi ohua ohuana ohua ohuaccoranijine. Nidsa ohua nohue ojiradsa naqui ohuadsa tetideni ajimamana nejeranijine ajima titinanamana nana, onajaro. Aja pan ocanabobiridsadsa tiadenidsa da onaridsadsa tijipamanajaropi titiqueriqquimana nadsa nema titidsanapomana nanijine, onajaro -najari.

²⁰ Jipacquimanahi natti naco dsedse equidi nadsa huati tapomajari: —Ajajari dsedsecca imapi Dio madija tedseje jehe canirehijinecca ima dsati tojanijine. Nidsa ohua odsoqquedsa ohuemene toccadsapi najaro jehe canireniji dsati pajissa tojanitohui. Aji ohuemene toccajaropi tiadenidsa ima bicani tojanijine. Najaropi ticcadeni imasiri manaconi ohuadsa tojadsapi ticas-siejeranijine -najari Jeso.

²¹ —Nadsa aji ijipacquinidsa ohua ccaccorade naco ajijaro huahuanaridsa ohuadsama jipade

huittarihi. ²² Naraha ohuapi Madija Bedi ojararoa nidsa odsoqquenitohui. Pina Diojine maittaccadsama otedsejemacca ima najorapojarossa onanitohui. Naraha ohua ccaccoradedsa oppina tehe tojanitohui –najari Jeso.

²³ Nadsapa pohuadenira huati tocanirere canadsa: —¿Nejecojarina Jeso dsoqquehijine madija dsepedenidsa inanahijine? —narid-samanajari Jeso huatimadedeni.

—¿Nejecojarina iadsa deni tojajari? –quina-jari

Mateo 20.25-26; Maraco 10.42-43

²⁴ Jesocca dodosse tabaqqui pohuadenira ahuaji huati ahuaji huati quinadsapa: —¿Nejecojarina iadsa deni tojajari? —quina-jari. ²⁵ Naraha Jeso pohuadenidsa huati tajari: —Madija ohuaha jodio quejena-jarajaridenicca tamine huapimapa dossede dacoraqquri nadsa poccadeni madija dosse dosse quiquinanjari. Dodossede ohuahadeni naco deni toquejenadsapa attideni dacoradsa poccadeni madija dosse dosse nanaridsamana najari. Pohuadenidsa poccadeni madija attidenipa: “Ia acco camade tiquejenani. Iadsa bica taniccara tinanamanajaro” quinaraha maidsa maidsa quinajari. ²⁶ Naraha aji ohuadsa tiquejenajaropi pina najari taminedenissa tiquinejeraji. Aji tiadeni deni tijeje camajaropi pina dsabisso dossehedsa ibora tararissa tiquinadsana bica tani. Madija dossede tijadsa naqui: “Ohuana deni ojani” tejeraji.

Ticca madija bijideni acco ticamabaqquirid-sahina bica tajaro. ²⁷ Ajaro namicca madijapa “Ojipana” nadsapa pocca huihuittaridsa huittaridsa pocca medsena jijipa dsojo dsojo najari, pohua medsedecca huahuanaridsa hua inarihijine. Naraha tiadenidsa huati onajaro: ¿Nejecojarina deni tojajari? ¿Madija huihuittaridsa huittarijaripa deni tojajarico? ¿Pocca medsena deni tojajarirana? Aja huittarijarina deni tojajari. Pocca medsepa ajamani tojajari. Naraha ohuapi tiadeni Medsede ojaraha pina ticcadeni medse ojajarossa najaro, tibijideni acco ocamabaqquijaro. Tiadeni naqui nema tiquinana, onajaro -najari Jeso.

²⁸ —Aji ohuapi ocasserani ohuadsa, madija ohuadsa ima oppina tanicca inanamanadsa naqui tiadenipi ohuadsa paji timadimananarini dsanapojaro. Ohuatimade disseraqquri tiquinajaro. ²⁹ Nema najaroa aji ohua tiadenidsa onananijinepi pina aji occa Abi ohuadsa inajarossa najaro. Ohuadsama tiadeni naqui madija dossede tiquejenanitohui, onajaropaji. Pina occa Abi ohuadsa huati tapojarissa najaro, ohua cadossejarissa najaro: “Nidsa madija dsama huapimacca dossede tijanitohui” napode. ³⁰ Nidsa occa cacahuehe bacco tadsa huapimacca tamine ojadsa naqui tiadenipi occa huahuanari aji ohua ojipanihuaji ohuadsama tijipamandsanaponitohui. Ticcadeni cacahuehe icca madija jiodideni aja icca idi Isaraeri pohua bedi 12 quinajarideni potemahi tecahuabaqquimanaridsadsapa poccadeni tamine tiquejenanitohui. Nadsama tiadenipi pohuadeni dossedecca

huihuittari 12 quinajarodsa ima cattemade jassi tinariridsanitohui –najari Jeso.

Pedro pohua namaidisahijine Jeso huati tapo-jari

Mateo 26.30-35; Maraco 14.26-31; Huano 13.36-38

³¹ Jesopa Ssino-Pedrodsa huati tajari: — Ssino, tibodi huatoji. Satanapa titohuideni tonacomabaqquih. Puhuapa titohuideni Diodsa huati tajari, tiadeni nattome tabaqquihijine. Pina aroso jidsadsa trigo etero toccahijine qqquero huira, qqquero huira quinajarissa najari ohua tinebomananijine tiadenidsa ocasserehe inananitohui. ³² Naraha Ssino, titohui Diodsa huati huati onajaro, ohua tinebo-jeranijine. Ohuadsa epeje tanitohuiraha, otohura tapomad-sapi timecotedeni aja ohuadsa jehe quinajari-denicca jeheniji todacoranijine pohuadeni acco ticamabaqquijo, onajaro –najari Jeso.

³³ Naraha Ssino attia: —Ohua Medsede, ohuapi nema onejeranitohui. Toponi cocorodsa tia coro idsimamanadsa naqui ohua naqui onajorani, tiadsama ohuedsanijine. Tiadsama odsocqueni-jine naqui onajorani –najari.

³⁴ Naraha manaco Jeso attia: —Pedro, tiadsa huati onana: Nidsa ajijaro dsome ssiajaricos-sanihuaji tacara huahua najaraccadsa tetti tina-maidsanitohui. Ohuadsa: “Onocco jidsa tani” tanitohui. Dsotode naqui: “Onocco jidsa tani” tapomanitohui. Dsotode naqui nema tapomani-tohui –najari Jeso.

Ima oppina tanicca Jesodsa tojabote najaro

³⁵ Nadsapa Jeso pocca dodosse tabaqquidsa huati tajari: —Madija maride tiquejenaridsani-jine tiadeni dosse onabaqquipodsa jai tijaridsade. Ticcadeni sacco, ticcadeni dsiniro, ticcadeni sapato najari jirehe jai tijaridsaji onadsapi ¿ne-jecora ticappiramanatte? —najari Jeso. Naraha pohuadeni cacomeramanajari: —Nohuerade. Icappira nehe jaijaridsa-jerade —quinajari.

³⁶ Nadsapa Jeso pohuadenidsa huati tapomajari: —Naraha jidapapi occa dosseniji tahidessa nejerani. Jidapapi sacco, dsiniro ticajimanadsapi tiaccamanaji. Nadsama jadsirecca massito ticappiramanadsa naqui ticcadeni ssirinijinecca huehuedsa da tiquinadsa mitta tiquinaji. ³⁷ Nadsapi otedsejemacca ima tiadenidsa huati onana: Dio Atti dsodo naponiccapi pajissa ohuadsa tojanitohui. Pohua Atti cacomerabote Isahia dsodo inaponipi ajima najaro: “Nidsa madija attidenipa: ‘Ajajaripa tabaccoraqquri najaridenid-sama quejemajari’ quinahitohui” napohui nade Isahia. Najarossa najaropi ohuadsa madija attideni nama quinahitohui —najari Jeso.

³⁸ Naraha pohuadeni attipa: —Ia Maride, ajidsapi jadsirecca massito capamehe icajini —quinanaja Jesopa: —Jehe, najarodsapi tipajiramanani —najari.

*Jesemanihuaji Jeso Diodsa huati huati tajari
Mateo 26.36-46; Maraco 14.32-42*

³⁹ Nadsapa Jeso huati taha jicadsapa odsadsa toqquenadsa ssono Oribohuaji toqquemorajari. Aja pohua huajijiradsa totocca nahihuaji toccajari. Pocca dodosse tabaqqi naco

pohuadsa jai tojemorajari. ⁴⁰ Aja pohuadeni quequeriqquimana nahihuaicca ahua oribo ppa nahi dopehuaji bacco toquinadsapa pohuadenidsa huati tajari: —Jari, Diodsa huati huati tiquinaji, aji ticappinamanadsa ima tinanamana-geranijine –najari Jeso.

⁴¹ Jesopa pocca dodosse tabaqqui jassi tahidsa toqqequimajari, cahuajiqquima nadsa pohua pitodsa huittadsa Diodsa huati huati tajari.

⁴² Ajama najari: —Abi, jipa tinadsapi otedse-jemacca ima oppina tanicca ohuadsa toja-gerana, onaraha. Madija huapimacca ima manaconi najidsohue ohuadsa tojadsapi ocasserani ohuanitohui. Pina dsedse bidabote dse onanijinessa najaro. Najaro onahananijine jipera onaraha ohua jipa onanicca tohui onejerajaro. Tia jipa tinaniccana paji. Najarodsana ibora onajaro –najari Jeso.

⁴³ Nanaja nahi Jeso pohua Diodsa huati huati tahihuaji Diocca dodosse memehuaicca ahuatogari. Najaripa Jeso acco icamadsa inadacorajari.

⁴⁴ Naraha Jeso pohua bodi ocassera-ra canajari. Diodsa huatide todacorahi nadsapa taniccojari. Pohua taniccone toccadsa namidsa catojadsapi pina ama motarehe ssaboro ssaboro najarossa najaro.

⁴⁵ Diodsa huati taha jicadsapa pocca dodosse tabaqquihuaji ccanijari. Bacco nanidsapa cahadijahira qqui tajari. Bodideni oji quinajarijine tocamijireradsapa cahadijajari. ⁴⁶ Naraha pohuadenidsa huati tajari: —¿Nejecotohui ticahadijajaro? Nocco tiquejenadsa Diodsa huati

huati tiquinaji. Ima oppina tehe tojadsapi tijaparamanadsa ima tinanamana-jeranjine, onapa -najari Jeso.

Jeso dama quinajari

Mateo 26.47-56; Maraco 14.43-50; Huano 18.1-

11

⁴⁷ Jesopa huati huati naccaraha madija huapi taha bacco najonamanajari. Jodana tahidejonajari. Puhuapa Jeso pocca dodosse tabaqqui 12 quinajari ojariaraha pohuana Jesohuaji tohuajiressi, pano mose injari. ⁴⁸ Naraha Jeso attipa: —Joda, ohuapi Madija Bedi ojajaroa ¿opano mose tajaropi aja ohuadsa huadiqquri najaridenidsa ohua teccorajaroqui? -najari.

⁴⁹ Naraha aja Jeso huatimadedeni attidenia: —Ia Medsede ¿massitodsa itacaridsaco? -quinajari. ⁵⁰ Nadsapa Jesocca madija ojariana dada toqquimadedenicca tamine deni tojajaricca medse huaribo nahatonihuaicca ca taneje tajo canajaro. ⁵¹ Naraha Jeso attia: —¡Apajana, denima ca tejeraji! -najari. Nadsapa taminecca medse huaribo bara icanadsapa huaribo tocabiquemanijari.

⁵² Jesotohui jahijonaridenipa aja dada toqquimade tamedeni, Diodsa dada toqquimahuajicca cacahuadedeni, ime jcohuideni quinajari. Najaridenidsa Jeso huati tajari: —¿Nejecotohui tiadenipi jadsirecca massitoma, huahuaccama jai tijajonajaro? Nema tiquinadsapi pina bobotidetohui jai tijajonarossa najaro. ⁵³ Nadsa tiadenidsama huajijiradsa Diodsa dada toqquimahuaji ohoquejema naraha ohua

dama tiquinehe nejerade. Naraha ohuadsa ima tinanamananijinepi dsidsinidsara jai tijajonajaro. Jidapapi tijinedeni dsidsini jinede deni tojajari -najari Jeso. Nadsapa Jeso dama quinajari.

Pedropa Jesodsa: —Onocco jidsa tani -najari Mateo 26.57-58, 69-75; Maraco 14.53-54, 66-72; Huano 18.12-18, 25-27

⁵⁴ Nadsapa Jeso dama quinadsa dada toqquimadedenicca tamine deni tojajaricca odsahuaji iaccamanajari. Naraha Pedropa Jeso iaccamanahi nattideni huajima tohuanamissajari. ⁵⁵ Odsadsa bacco toquinadsapa boronidsa dsippo inadsamanadsa jiade jassi nahuajanijari. Pedro naco pohuadenidsama huittabacossajari. ⁵⁶ Naraha najaro odsacca medse dsohuato Pedro dsippodsa huittahi qqui tadsa icattoma nadsa aja jassi nahuajanijaridenidsa huati tajaro: —Ajaripa Jesodsa ccaccaridsa nade -najaro. ⁵⁷ Naraha Pedropa pohua namaisajari: —Dsohuato, ohuapi pohuadsa onocco jidsa tani -najari.

⁵⁸ Nahi dsotode madija ohuaha naco Pedro qqui tadsapa: —Tia naqui Jesocca madija tijani -najari. Naraha Pedropa pohua namaisapomajari: —Ohuapi najaricca madija ojajerani -najari.

⁵⁹ Nahi dsotode maji ojaria tossoiqquimadsa madija ohuaha attipa: —¡Pajissade! Ajaripa Jeso huatimadedija. Pahuapa dsama arobeni Carireahuajicca madija jidsera tahi -najari.

⁶⁰ Naraha manaco Pedro pohuadenidsa huati

tajari: —¿Nejecoma najaro imara huati huati tiquinajaro? Ohuapi najaro ima ssamo onani –najari. Pedropa najaro ima huati huati nanaja tacara huahua najari.

⁶¹ Nanaja Jesopa cattahuajanihi nadsa Pedro icattoma najari. Nadsapa Pedro pohuadsa Jeso huati tapojaricca ima bodi huatomanijari: — Nidsa ajijaro dsome ssiajaricossanihuaji tacara huahua najaraccadsa tetti tinamaidsani 3 nani-tohui –napohui nade. ⁶² Najaro ima Pedro bodi huatomanidsapa toqquenajari. Pohua motta oji oji najari.

Jesodsa jidsa jidsa quinajari

Mateo 26.67-68; Maraco 14.65

⁶³ Jeso cacahuadedenipa huadiedsa jidsa jidsa quinajari. Jeso huaccade jo narihi najari. ⁶⁴ Nocco ssoque quinadsa naco pohuadsa huati toquinajari: —Jari ¿nejecojari tia idajari? ¡Tecomerajo! –quinajari. ⁶⁵ Attideni tabaccora tajarodsa itamassoqquimanajari.

Jodiodenicca ima cacattemahuaji Jeso pohua cacomerajari

Mateo 26.59-66; Maraco 14.55-64; Huano 18.19-24

⁶⁶ Ssiajadsapi jodiodeni ime jocohuideni, dada toqquimade taminedeni, jodiodenicca marinaja maridedeni quinadsa queriqquimanajari. Nadsapa jodiodenicca ima cacattemadedeni deni toquejenajarideni quequeriqquimana nahihuaji

Jeso iaccamanajari. Nahihuaji huapima jai tojed-simadsa pohuadsa huati toquinajari: ⁶⁷ —Cristo-Mesia tijadsapi iadsa tia tecomeraji: “Ohuapi Cristo-Mesia ojani” taji -quinajari.

Naraha Jesopa: —Tiadenidsa: “Ohuapi Cristo-Mesia ojani” onadsapi ¿ohuadsa pajissa tiquinapadseje? Pajissa tiquinejerani nahato onaponi. ⁶⁸ Manaco tecomeramananijine tiadenidsa huati onadsapi ¿tecomeramana-padseje? Tecomeramana-jeranitohui -najari. ⁶⁹ —Ohuapi Madija Bedi ojajaroa nidsa dsotode Dio Dacorabote ohua deni tonanadsapa Pohua inori nahatonihuaji ohuittarinitohui. Nanihuaji ohuittaridsapi Abi Pohua tedseje dosse dosse onanitohui -najari Jeso.

⁷⁰ Naraha pohuadeni attia: —Nema tad-sapi ¿tiapi Dio Bedi tijaqui? -quinajari Jesodsa. Naraha Jeso pohua cacomerajari: —Jehe, tiadeni ohuadsa nema tiquinajaropaji -najari.

⁷¹ Nadsapa pohuadeni attia: —Jidapapi pocca ima huati toquinahijine madija ohuahatohui huahua inejerana. ¡Epeje! Pohua pohua cacomerasa pohua atti oppina tanicca imittanissa tani -quinajari. Nadsapa najaro imadsa dsoqquehijine najoramanajari.

23

Tamine Piratodsa Jeso iaccamanajari

Mateo 27.1-2, 11-14; Maraco 15.1-5; Huano 18.28-38

¹ Nadsapa jodiodenicca tamedenedi nahidsa queriqquimanajari huapimapa tothemamanadsa tamine Piratohuaji Jeso

iaccamanajari. Tamine Piratopa romanodeni. Pohnuapa jodiodenicca dsama cacahuade tojajari. ²Tamine Piratohuaji bacco toquinadsa pohnuadsa poccadeni maidsehe huati toquinajari: — Jesojinepi ima bica tejerani, pocca ima ajima nani -quinajari. —Jeso madija inequeriqquidsa mari icanabaqquidsapa romanodenicca cacahuehedsa tojiperamanajari. “Iara ia ecahuana” quinajari. Pocca marinaja naqui: “Romanodenicca tamednsa ticcadeni dsiniro mota naqui paca tiquinejeraji” nanaja nahi. Nadsama pohnua atti onihi naqui: “Ohuapi Cristo-Mesia, ticcadeni tamine deni tojahicca ccajonahitohui quiquinanajari ojani” nahi naco imittani -quinajari.

³Nadsapa Pirato Jesodsapa huati tajari: —¿Tiapi jodiodenicca tamine tijaqui? -najari. —Jehe, tetti nema tajaropaji -najari Jeso.

⁴Naraha Piratopa dada toqqumade tamednenidsa, nahidsa madija queriqquimanajari-deni huapimadsa huati tajari: —Ajajaripa icca dsamacca marinaja inajidsoje cama-jerani. Ima oppina tanicca inana-jerani. Tettidenidsa onajidsohuijine pajira-jerani -najari Pirato. ⁵Naraha pohnuadenipa denima jadsirema johnua johnua quinajari: —Ajajari madija mari mari naridsadsapa pohnuajine mohuaniji tojaridsani. Dsama Carireahuaji mari mari napojari. Nahi dsotode naco aji icca dsama Jodeahuaji mari mari naridsadsapa ajadsa bacco najonajari -quinajari.

⁶Madija attideni: —Dsama Carireahuaji mari mari napojari -quinahi mittadsapa Pirato attia: —¿Ajajaripa Carireaccaco? -na-

jari. ⁷ Nadsapa jehe quinahi mittadsapa tamine Herodehuaji Jeso iaccamanahijine dosse inajari. Herodepa Carireahuajicca cacahuaderaha Jerosaredsa huada pamehe madicajari. Nadsapa Herodehuaji Jeso iaccamanajari.

Tamine Herodedsa Jeso iaqquedsimamanajari

⁸ Tamine Herodehuaji Jeso iaqquedsimamanajari. Aja Herodepa tahide Jeso tahimari mimitta napodsapa: —Jeso qqui onaccaraho -nanajajari. Nadsapa pohuahuaji Jeso iaqquedsimamanahi qqui tadsapa huatidsejari. —Jehe, jidapanana pohua canahatori canahi qqui onanitohuia -najari. ⁹ Nadsapa Herode Jesocca ima mittahijine pohuadsa huati huati dsanaporaha Jesopa pohua cacoma najari. ¹⁰ Naraha nahihuaji naco dada toqquimade tamededeni, jodiodenicca marinaja maridedeni tedsejepa disassera tadsa ima onihi, ima onihi huati toquinadsapa: —¡Jesopa tabaccora tahi! ¡Tinajidsojo, tinajidsojo! -quinajari. ¹¹ Nadsapa Herode pocca soldadodeni tedseje Jeso momohua inanamanajari. Jesodsa maidsamanadsapa etero bica taniccadsa inehedsamanajari. Pina taminessa inanamanadsa pohuadsa jidsa jidsa quinajari. Nadsapa Herodepa tamine Piratohuaji Jeso dosse inanipomajari. ¹² Tahidepa Herode Pirato tedseje ahuaji jipera ahuaji jipera quinapojari. Naraha Jeso ahuaji dosse, ahuaji dosse quinadsapa najaro huadadsa cajonerajari.

—Jeso dsoqquehi bica tahi -quinajari

Mateo 27.15-26; Maraco 15.6-15; Huano 18.39-19.16

¹³ Nadsapa tamine Piratopa dada toqquimade taminedeni, jodi deni ime jochuideni, madija ohuahadeni naco huahua inajonabaqquidsa queriqquijonajari. ¹⁴ Nadsapa pohuadenidsa huati tajari: —Aja Jeso ohuadsa teccajonamanapodsapa tettidenipi: “Pohuajine mohuaniji tojaridsani” tiqunaraha tiadeni tinoccodenidsa pohuadsa huati onapa. Pocca ima omittadsapi pina tettidenissa nejerani. Pohuadsapi ima nohuerani -najari. ¹⁵ —Tamine Herode naco pocca ima mittaraha pocca ima tabaccora tanicca nohueradsa ohuahuaaji dosse inanipomajari. Aja Jesopa ima tabaccora tanicca inajeradsapi pohuapa dsoqquehijine bica tejerani. ¹⁶ Nama nadsapa pina ocadossebaqquidsa cossi inaquimanaha jicadsapa dosse onanina, toccanihijine -najari tamine Pirato.

¹⁷⁻¹⁸ Naraha madijapa Pirato: —Jeso toccanihijine -nahi mittamanadsa huapima johuahua johuahua canajari: —¡Najaripa dsoqquena! ¡Aja coro todsimapojari Barabana tijine qqquenajo! -quinajari. [Aja huajano huajijiradsa ejete Pascoa tojadsapi Piratojine toponi cocorodsa madija huedsamanajari ojaría qqquequena najari.] ¹⁹ Naraha Baraba pohuajinena odsa panani Jerosaredsa madija inequeriqquidsa romanodenidsa mohua mohua quinadsa coro idsimamanajari. Pohuajine naco madija dsoqquejari.

²⁰ Piratopa Jeso tappa inahijine tohuini nadsa madija huapimadsa huati tapomajari: —Jeso apaja onanana. Pohuadsapi ima nohuerani -najari. ²¹ Naraha pohuadenipa jadsirema johuahua

johuahua canapomajari: —¡Ahua porimacosanidsa dsoqquena, dsoqquena! —quinajari.

²² Naraha Pirato pohnadenidsa huati tapomajari: —¿Naraha nejecotohui dsoqquehijine? ¿Nejeco imara inanajaro? Jesocca ima omitadsapi imari tabaccora tanicca nohuerani. Pohnua inanadsoqquehijinepa bica tajarahi. Jesopa pina ocadossebaqquidsa cossi inaqquimanadsapa apaja onanadsa toccanihijine, onajaro —najari Pirato.

²³ Naraha madijadenipa Jeso ahua porimacosanidsa dsoqquehijine tohuini quinadsapa dacoco radsa denima johuahua johuahua canapomajari. Nama dsanapomanadsapa pohnadenina deni toquejenajari. ²⁴ Nadsapa Piratopa pohnadeni attidsa jehe najari. ²⁵ Madija Baraba qquenahijine jipaqquiri nadsapa Piratojine qquenajari. Aja Barabapa madija inequeriqquidsa romanodenidsa mohua mohua naridsamanadsa coro todsimajari. Pohnuapa madija ijine ahuahiraha ijinedeni qquenajari. Naraha Jesona dsoqquehijine pohnadenidsa ecorajari. Pina pohnuadsa huati toquinapojarissa inananihijine Jeso dsoqquehijine icadossebaqqujari.

Jeso ahua porimacosanidsa coba idsanamanajari

Mateo 27.32-44; Maraco 15.21-32; Huano 19.17-27

²⁶ Soldadodenipa Jeso iaccamananaja dsama Sirenecca madija Ssinopa huidsajahuaji ccanidsa bacco ijidsamanajari. Jeso ahua porimacosani dsojo inaraha ja tojadsa soldadodenipa

Ssino dama ijidsamanadsa icadossemanajari: — Manaco tia ajajaricca ahua porimacossani dsojo tinaji –quinajari. Nadsapa ahua porimacossani Ssino johuidsa ibarimanadsa Jeso natti dsojo inamissajaro.

²⁷ Madija huapi taha Jeso natti jai tojajari. Amoneje naqui nani toquejemamanajardeni Jesotohui oji oji dsanapomanajaro, jadsirema johua johua dsanapomanajaro. ²⁸ Naraha Jesopa ponidenihuaji qqui nanidsa huati tajari: —Aji Jerosarecca amoneje tiadenipi otohui oji oji tiquinejeraji. Aji tiadeni titohuideni, aji ticcadeni ejedenitohuira oji oji tiquinana –najari. ²⁹ —Aji otohui oji oji tiquinajaropi nidsaranibote aji Jerosaredsa ima oppina tanicca bacco nadsa nanidsana pina aji otohui oji oji tiquinajarossa tiquinanitohui. Najaro huada bacco tadsapi madijapa ajama quinahitohui: “Amoneje ccaranipi bicani ahuamanani ojimana-jerani. Ejedeni cappiramanajarojine ojimana-jerajaro. Ponideni dsojorinidsa ejedeni tomide nohue quirajaro naqui ojimana-jerajaro” quiquinanahitohui. ³⁰ Ima oppina tani bacco nadsa madijapa cappinamanadsa ajama quinahitohui: “Jaho, ssono imeni dequerajaro iahuaji cojo naronaccaraho, bodi iquejenadsapi nani oppina tanicca qqui inejeranijine” quinahitohui. ³¹ Aji ohuapi imasiri onana-jeraraha ohua inajidsomanajaro. Naraha aja Jerosarehuaji madimanajarideni imasiridsa disseraqquri nadsapa najidsohue pohuadenidsa denima oppina tanitohui –najari Jeso.

³² Madija pamaha naco Jesodsama

topamajonahijine iaccabaqquimanajari.
 Pohuadenipa botijidede raja, madija
 inanadsoqquemana najarideni. ³³ Ssono
 Totati Tonanissa nani quiquinanahihuaji bacco
 tomoramanadsapa ahua porimacossanidsa
 que tahijine Jeso coba idsanamanajari. Coba
 idsanamanaha jicadsapa acca icanamacossa-
 manajari. Aja botijidede raja, madija
 inanadsoqquemana najarideni naco coba
 idsanamanaridsajari. Ahua porimacossani
 onihidsa, onihidsa naridsamanajari. Ohuahapa
 Jeso que tahi inori nahatonihuaji, ohuahapa Jeso
 que tahi inori ssamohuaji quinajari.

[³⁴ Nadsapa Jeso Imehidsa huati tajari: —
 Abi, pohuadenipa ohuadsa ssamoqquiri nadsa
 ohua inanadsoqque-manaraha epejena. Aji
 ocasserani ohuajaro manaconipi pohuadenidsa
 tinana-gerana, onajaro -najari Jeso.]

Nadsapa soldadodeni Jesocca eterotohui siba
 bedenidsa coro coro quinajari, —¿Pocca etero
 nejecojaridsana tojanijine? -quinadsa. Na-
 jaro sibadsa ittomemanadsapa pocca etero po-
 huadenidsa ojari ojari naridsajaro. ³⁵ Madija
 huapima nahidsa cattade domo huajari. Tamine-
 deni naco nahidsa cattade domo huadsa at-
 tideni tabaccora tadsa Jesodsa jidsadsa jid-
 sadsa canajari: —Ajana, madija ohuaha inassi-
 ajabaqquiraha jidapanana pohua tonassiajana.
 Pajissa madija Tonassiajade Cristo-Mesia tojahi-
 jine Dio icattejidsadsapa nama nahi qqui inana.
 Nahato taranaja -quinajari.

³⁶ Soldadodeni naco Jesodsa jidsadsa jidsadsa
 canajari. Nadsapa jai tojessidsa uva ppejene

ssicata, bidada najari Jeso dse nahijine da icanamacossa-manajari, —Pohua comene ojid-sama nanijine -quinadsa. ³⁷ Attideni onihi naqui: —Tiapi jodiodenicca tamine tijadsapi tia tinassiajaji -quinajari.

³⁸ Jeso tati tetepihuaaji naqui dsodo nani coba idsanamanajaro. Najaro dsodo nanipi: —Ajararipa Jodiodenicca Tamine -najaro.

³⁹ Naraha botijidede raja, madija inanad-soqquemana najarideni Jeso inoridsa cobaba dsanajari ojaria Jesodsa atti tabaccora tadsa jidsa jidsa najari: —Tiapi Cristo tijadsapi tia tinassiajaji. Ia naqui ia tinassiajabacquiji -najari. ⁴⁰ Naraha aja coba dsanajari ohuaha attia: —¡Paji, nema tejeraji! ¿Diodsa ticappinajerajarorane? Tia naqui ahua porimacossanidsa coba dsanahi tijaraha ¿nejecotohui tetti nema tajaro? ⁴¹ Aji iapi ponima ocasserani ejerani. Inajidsojarojine ocasserani ejaro. Naraha ajajari maqquidejepa najidso-jararaha ocasserani ahuaajari -najari. ⁴² Nadsapa Jesodsa huati tajari: —Jeso, ticca cacahuehehuaaji bacco tinadsa ohuadsa teti huato nana -najari. ⁴³ Manaco Jeso pohnadsa huati tajari: —Pajissara tiadsa huati onajaro. Aji jidapana ohuadsama memehuaajicca dsama bicanihuaaji timadinijine -najari.

Jeso huatiajari

Mateo 27.45-56; Maraco 15.33-41; Huano 19.28-30

⁴⁴ Maji itetepi tojadsa dsama nemanehé tod-sidsini najaro. Dsidsi dsanapojaropi maji 3 bacco tajaro. ⁴⁵ Maji todsidsidsapa Diodsa dada

toqquima odsa imeni bodihuaajicca huahuacossa etero sibabotepi Diojine sseo naronajaro, carobe najaro. ⁴⁶ Maji najarissa nadsa ssonohuaji Jesopa jadsirema huati tajari: —Abi, ticca cacahuehedsa ojapomanijine, onajaro –nadsapa Jeso huatiajari.

⁴⁷ Nadsapa soldado tamine Jeso cacahuadepa dsama todsidsini nani qqui, Jeso huatiahi qqui tadsapa: —¡Dio bica tahi, deni tojahi! –najari. Puhua attipa: —Pajissa, ajajari maqquidejepa bica tahi. Ima cappirajari –najari.

⁴⁸ Nadsapa madija huapima Jeso cattade domo huajaridenipa maji todsidsihi qqui, Jeso huatiahi qqui toquinadsapa cappinamanadsa domo toccanijari. Puhadeni bacco huaccacca huaccacca tocananijari: —¡Jaho, icca dsamadsa ijine bica tejerani, bica tejerani! –tanimanajari. ⁴⁹ Naraha aja Jesodsa huatideni huanacquiri najaridenipa huaji tanidsa qquide domo huajari. Amonejedeni naqui puhadenidsama domoni huajaro. Najarodenipi Jeso Carireadsa ccaridsapodsa puhuadsa jahiridsajaroa Jeso puhuadsa Jerosarehuaji jahijonajaro.

Jeso ppa idsamanajari

Mateo 27.57-61; Maraco 15.42-47; Huano 19.38-42

⁵⁰⁻⁵¹ Nahidsapa madija bicabote madijari. Puhua onipa Dsodse, dsama Jodeacca odsa panani Arimateahuajicca madija. Puhuapa Diocca dosseniji inapajiranissa, pocca ima toccanissa tajaro. Dsodsepa Diocca cacahuehetohui naco najoraha madijari. Puhuapa jodiodenicca ima

cacattemededeni ojaria. Pohua tesse ima caccattemededeni: —Jeso dsoqquena –quinaraha pohuapa jehe najarajari. Pohua tessedeni Jeso inajidsomanadsa naco najidsode jipera tajari.

⁵² Dsodsepa Jeso assire ppa idsahijine tamine Piratohuaji huatide toccajari. Bacco tadsapa Piratodsa huati tajari: —Jeso assire ppa odsahijine ¿jehe taqui? –najari. ⁵³ Nadsapa Pirato jehe nadsa Dsodse nahi Jeso coba dsanaha que tahi-huaji tocanajoranijari. Jeso assire dicca inadsa etero dsojorani onini linodsa jore inaqquijari. Jore inaqquia jicadsapa tonoccobirihuaji dsojo injari. Najaro tonoccobiripi sibadsa hui todsimajaro. Najarodsapa madija dsoqquehi podsajaracchi. Najarodsa Jeso ibedsajari. ⁵⁴ Najaro huada viernepi jodiodenipa poccadeni jassinajacca huada sabadotohui najoramajari. Najaro jassinajapi dsomeme nadsa bacco bacco tajaro.

⁵⁵ Aji amoneje Jeso pohuadsa Carireahuaji jahijonajarodenipi Jeso assire tonoccobirihuaji Dsodse dsojo inadsapa ponideni naqui nani jai tojajaro. Jai tojamissadsapi tonoccobiridsa Jeso assire ibedsahi qqui toquinajaro. ⁵⁶ Nadsapi odsahuaji jai tojanidsa majoyo majoni bica tajaro, ahua majiconi majoni bica tajaro najoramajaro. (Pina jodiodeni poccadeni madija dsoqquejari assiredsa sse inamaromanajari, huiru inamaromanajarissa inanamananijine najoramajaro.) Nadsapi jassinajacca huada tojadsapi jassi quinajaro, pina Moisesicca marinajassa inamanajaro.

24

Jeso nahatonijari

Mateo 28.1-10; Maraco 16.1-8; Huano 20.1-10

¹ Semana tojapomanicca huada tahidecca domingo dsidsidsamassana amonejedenipi Jeso noccobirihuaji qquide jai tojanipomajaro. Ahua majiconi majoni bica tajaro najoramanapoje najaro iaccamanajaro. ² Bacco toquinadsapi qqui toquinaneje tonoccobiripi tohuabeje najaro. Siba imenipi pajimaranihuajina huitteje najaro. ³ Nadsa jai tojedsimadsa qqui toquinaraha Jeso assirepa podsajari. ⁴ Nadsapi jabojo manadsa: —¿Nejecoma najari? —quinajaro. Nanaja madija pamaha eterorideni ssiaja tajaro ponideni inorinidsa ahuatomanajari. ⁵ Nadsapi cappinamananissa tadsa ponideni pitonidsa jassi, tocattedsamana, namidsa assarinideni bacco tajaro. Najarideni pamaha ponidenidsa huati toquinajari: —¿Nejecotohui Jeso qquide ahuaji jai tijajonajaro? Paja dsoqquemanarihi najaridenina pohuadeni noccobiridsa podsamana tahi. Naraha Jesopa camittemanidsa madihi —quinajari. ⁶ —Tibodideni huatomaniji. Dsama arobeni Carireahuaji timadimanapodsatiadenidsa pocca ima huati huati nanaja napode. ⁷ Pohua attipa: “Ohuapi Madija Bedi ojajaroa nidsa dsotode madija ojaría ohua ccaccoradsapa imasiri sseqquiri najarideni dsepedenidsa ojanitohui. Ahua porimacossanidsa ohua inanadsoqquemananitohui. Ohua ppa idsamanaraha huada

3 nadsa onahatoninitohui” napode pohua atti -quinajari.

⁸ Nadsapi Jeso atti bodinideni huatomamanajaro. ⁹ Tonoccobirihuaaji jahinidsa odsahuaji bacco nanimanadsapi Jesocca dodosse tabaqqui ¹¹ quinajaridenidsa ima huati toquinajaro. Jesocca madija motadenidsa naqui huati naridsamanajaro. ¹⁰ Ponideni oninipi Maria Madarenahuajicca, Dsohuana, Maria Satiaco imeni quinajaro. Amoneje onihideni naqui ponidenidsa quejemamanajaro. ¹¹ Naraha Jesocca dodosse tabaqqui ima mittamanadsapa pohuadenidsa jidsa tajaro, pina ponideni bodini tossamojarossa najaro. Ponideni attinidsa pajissa quina-jarajari.

¹² Naraha Pedropa nama naha Jeso noccobirihuaaji joppa tajari. Bacco tadsapa tonoccobiri bodihuaaji tocattedesima nanaja Jeso assire jojore naqqui eteroa podseje nanira qqui tajari. Nadsapa Pedro pocca odsahuaji bodi huatohua toccanijari.

Emao jahuidsa

Maraco 16.12-13

¹³ Najaro ssiajadsa Jeso huatimadedeni pamaha odsa capamema najaro onini Emaohuaaji tohuedajari. (Aji Jerosaredsa maji 3’dsa ticcadsapi maji 6’dsa Emao bacco tinani.) ¹⁴ Nadsapa najarideni pamaha najaro jahui tohuedajaria Jeso tahimari huahuatiti dsanapojari, aji ima huapima mittamanajari, aja pohuadeni qqui toquinajaricca ima huahuatiti dsanapojari. ¹⁵ Jahuidsa ahuaaji huati ahuaaji

huati dsanapomananaja Jeso naco pohuadenidsa bacco tadsapa huapima jai tojajari. ¹⁶ Najaripa Jeso pohuaraha pohuadsa noccodeni jidsa tajari. ¹⁷ Nadsapa Jeso pohuadenidsa huati tajari: —¿Nejeco imara ahuaji huati ahuaji huati tidsanapomanajaro jahui motta? —najari. Nadsapa ba nanaja panodeni todsahi najari.

¹⁸ Najari madija pamajarideni ojaria Cleopa pohuana Jesodsa huati tajari: —Tia naqui Jerosarehuaji Pascoacca ejetetohui timadiraha ¿ima dsati ssamo tinajaroqui? Aji Jerosarecca ima dsati huapima nahatoqquiri inaraha ¿tiahaha ssamo tinani ojari tajarorane? —najari.

¹⁹ —Naraha imapi ¿nejecoma najaro? —najari Jeso. Naraha Cleopa pohua tesse tedseje huati toquinajari: —Jeso Nasaretihuajicca pohuadsa ima inanamanajaro tahimarinipi ajima najaro: Pohuapa Dio Atti cacomerajide rabote. Diocca dacorehejine pocca marinaja bica tajaro. Diocca dacorehejine canahatori canaridsajari naco bica tajari. Madija huapimadsa, Diodsa naco pocca ima bica tade. ²⁰ Naraha dada toqqumade tamedeni, ia jiodeni icca tamedeni quinadsa Jeso dsoqquehijine romanodenidsa da quinajari. Pohuadenina idsahuananahi dsotodepa ahua porimacossanidsa coba idsanamanadsa inanadsoqque-manajari. Nama inanamanade. ²¹ Naraha Isaraeri potemahi jiodeni iapi icca dsamadsa iara imadinijine aja “Jeso pohuajinena icca cacahuehe tojapomanijine” inajaro ibodidsa. Naraha pohua huatiahicca huadapi jidapapi huadari 3 nani.

²² Naraha iadsa amoneje queriqquimanajaro-denijine ijabojo najaro. Ponidenipi ssiajaricosadsa Jeso cahuahihuaaji jai tojajaro. ²³ Naraha pohua assire qqui quina-jarahi. Nadsama amonejedenipi jahinidsa huati nanimanajaro: “Diocca dodosse tabaqqi memehuaicca qqui inabaqquipa. Iadsa attidenipa: ‘Jesopa nahatonih’ quinapaja” quinajaro. ²⁴ Nadsapa itesse pamaha tohuedajari Jeso cahuahihuaaji. Pohuadeni naco pina aji amoneje ponideni atinidenissa nehe qqui toquinaraha Jesopa qqui quina-jarahi –quinajari Cleopadeni.

²⁵ Nadsapa Jeso huati tajari: —¡A, tiadenipi ssamomo tinajaro! Dio Atti cacomeraqqiiri najaridenicca marinaja dsodo quineje najonaponi najaro nemanehe Dio Atti dsodo nanidsa dsodo napojaro titimittamana naraha ¿nejecotohui pajissa tiquinanjine tibodideni najoqqiiri nani? ²⁶ Dio Atti dsodo nanidsa ajijaro ima ahuato tajaro: Najaroa aji madija Tonasiasjade Cristo-Mesiatohui imadijaro ocasserani ahuahitohui, madijacca tabaccorehe manaconi tojahijine. Ocasserani ahua-jaradsa dsoqquejaradsapa Diocca deni tojehe pohuadsa ahuatojeranitohuiraha. Pajissa najidsohue imeni ocasserani ahuadsa dsoqquedsapa nahatonidsa Imehihuaaji toccamacossanjari. Nadsapa pocca Abi Dio pocca deni tojehe pohuadsa inanajaro –najari Jeso.

²⁷ Nadsapa Dio Atti dsodo nanicca pohuadeni bodi huatoma-manahijine mari icanabaqquijari Jeso. Tahidepa Moisesicca marinajadsa Cristo-Mesia tahimari dsodo nanidsa Jeso pohua tahi-

mari pohuadeni mari icanabaqquijari. Dio Atti cacomeraqquiri najaridenijine pohua tahimari dsodo najonamanajaricca dsodoniji naqui mari icanabaqquijari.

²⁸ Odsa capamema najaro Emao bacco toquinadsa Cleopadenidsa Jeso attipa: —Jehe, ajidsa tibomanaji. Ohuapi denima occani -najari. Pohua atti nama nadsapa tossoniquimahi-tohuiraha ²⁹ Cleopadenipa Jeso pohuatohui quinadsa pohuadsa huati toquinajari: —Iadsa tiboccaji. Maji toccahi, dsomebote nani -quinajari.

Nadsapa pohuadenidsa ibojari Jeso. Pohuadenidsama odsadsa toqquedsimajari. ³⁰ Nadsapa jipamanahijine jassi taridsa Jeso pan ididsa Diodsa huati tajari: —Jehe Abi Dio, tiadsa etidsejaro. Ticca daniji iadsa bica tinanajari, inajaro -najari. Icanarobedsa pohuadenidsa da inaridsajari. ³¹ Nanaja noccodeni ssire-re nadsa Jeso jidsera nimananijari. Naraha amadsati amossi najari. ³² Nadsapa pohuadenira huati tocanirejari: —¿Nejecotohui pohuapa jahuidsa qqui inajonaraha inocco jidsa tapa? Iadsa huati huati najonadsa Dio Atti dsodo nani ia mari tocanabaqquidsa ibodi etidsepa -quinajari.

³³ Nadsapa huassinaja totehemamanadsa Jerosarehuaji tohuedanijari. Bacco tanimanadsapa Jesocca dodosse tabaqqui 11 quinajarideni pohuadeni tesse tedseje queriqquimanahihuaji tohuededsimajari. ³⁴ Queriqquimanajaridenipa aja huededsimajaridenidsa huati toquinapojari: —¡Jesopa pajissa nahatonijari! Ssino attipa: “Qqui onahi” napa -quinajari.

³⁵ Manaco Emaohuaji tohuedajarideni pocca-deni ima huati nanimanajari. Aja jahuidsa Jeso pohuadenidsa huati huati dsanapojaricca ima huati, odsadsa Jeso pan icanarobedsa pohuadenidsa da inaridsadsa noccodeni jidsera najari naco huati toquinajari.

Jesopa pocca dodosse tabaqqidsa ahuatoma-jari

Mateo 28.16-20; Maraco 16.14-18; Huano 20.19-23

³⁶ Aja Jeso qqui toquinajaricca ima imahaha canaraha nahi nocconidsa Jeso ahuatomajari. Pohuadenidsa: —Nija, ticappinamanajeraji. Diocca biquehera tiadenidsa tojana -najari Jeso.

³⁷ Naraha jabojojanadsa bodidenipa: —¿Corime itidija! —quinadsa cappinamanajari.

³⁸ Naraha Jeso pohuadenidsa huati tajari: —¿Nejecotohui ticappinamanajaro? ¿Nejecotohui tibodideni tossamojaro, pina ohuadsa pajissa tiquirani naha? -najari. ³⁹ —Jari, ohuamori qqui, odsepe qqui tiquinaji. Ohuapi ohua. Ohueme bara tiquinaji, nadsana nahatoto tinanjine. Aji icorimepi ime cappira, tone cappira nahi naraha ohuapi ohueme ocaji, otone ocaji nani qqui tiquinani -najari Jeso. ⁴⁰ Nadsapa pohua dsepe nohue, pohua amori nohue najari.

⁴¹ Nadsapa huatidsemanaraha pohuadeni bodipa: —¿Pajissa, Jeso nahatonijarico? -quinajari. Nadsapa nahatoqquri nahijine Jeso pohuadenidsa huati tajari: —¿Ajidsa ojipanijine ticajimanaqui? -najari.

42-43 Nadsapa pohuadsa aba ibanahi bobi da quinadsa pohuadeni dsepecca ididsapa catomama canaraha jipajari. ⁴⁴ Nadsapa pohuadenidsa huati tajari: —Aji ima ohuadsa tojajaropi pina tiadenidsa occaridsaponi huati onapojarossa najaro tojajaro. Najaropi Dio Atti dsodo naponiccassa najaro. Aji Moisesi otahimari dsodo inapojaropi najarossa najaro. Dio Atti cacomeraqquiri najarideni naco otahimari dsodo quinapojari. Ajie jijiridedeni naco otahimari dsodo quinapojari. Najaro huapimapi maittaccadsama dsodo quinaja najonapohui najari. Najarossa najaro Diojine ohuadsa tojajaro —najari Jeso.

⁴⁵ Nadsapa Dio Atti dsodo naponicca mittamanahissa tahijine bodideni acco icamabaqquijari. ⁴⁶ Pohua atti naco: —Jehe, Dio Atti dsodo nanidsapi otahimari. Najaroa aji madija Idinide Cristo-Mesia quiquinanajari ccajonadsapa ocasserani imeni inahananitohui. Madija inanadsoqqemanadsa ppa idsamanaraha huada 3 nadsa nahatonihitohui. ⁴⁷ Najaro pohua tahimari ecomeraridsa-manadsapi madija bodideni cacajiqquimera-manahijine naco huati toquinahitohui. Nadsapa madija pohuadeni bodi cacajiqquimera-manadsa: “Occa imasiri onebona” quinadsapa Dio poccadeni imasiri epeje inananitohui. Najaro ima bicanipi madija huapima mittaridsamanahijine Cristo-Mesiapa pocca dodosse tabaqqui mari naridsamanahijine dosse inaridsabaqquihitohui. Tahidepa Jerosaredsa mari icanabaqquimanahitohui,

dsotodepa dsama huapimadsa maride jai tojaridsahitohui. Najari Cristo-Mesiapa ohua. Otahimari maridepa ohua occa madija dosse onabaqquihijine -najari Jeso. ⁴⁸ —Nadsama tiadeni occa dodosse tabaqqi tiquejenajaropi ohua Cristo-Mesia ojani nahatoqquiri tiquinani. Odsqqueraha onahatonini pajissa tinocodenidsa qqii tiquinajaro. Nema nadsapi otahimari tecomeraridsamanaji. ⁴⁹ Naraha tahidepi Jerosaredsa timadimanaccaji. Nidsa occa Abi Dio huati tapojarissa najari ohuana tiadenidsa dosse onaronahitohui. Najari Dio Corimena tiadenidsa tojaridsahitohui. Pohuapa Dio memehuaiji madijaricca dacorehe tibodidenidsa inanaridsanitohui. Nadsana otahimari mari taridsamananijine -najari Jeso.

Jeso toccamacossanijari

Maraco 16.19-20; Tahimarideni 1.9-11

⁵⁰ Nadsapa Jeso pohua huatimadedeni odsa pananidsa iaqquenabaqquijari. Odsa capamema najaro onini Betania tohuajiranidsa domo huajari. Nahidsa pohua huatimadedenitohui pocca Abi Diodsa huati tajari. Pohua dsepe memehuaiji da tamacossadsa: —Jehe Abi, ajararideni tecahuabaqquijo. Ticca biquehe pohuadenidsa tinanaridsaji -najari. ⁵¹ Pohuadenitohui Diodsa huati huati tanaja toccamacossanijari. Imehi Dio memehuaiji iaccamacossanijari. ⁵² Nadsapa pohua huatimadedeni attidenipa: —¡A, Jesopa bica tahi! ¡Deni tojahi! -quinajari. Nadsapa Jerosarehuaji huatidsemaneri tanimanajari. ⁵³ Huajijiradsa Diodsa dada toqquimahuaji

quequeriqquimana dsanapojari. Diodsa huatid-
semanadsa jiri jiri quinajari. Pohua Atti mimitta-
mana najari, Pohnadsa huati huati dsadsanapo-
mana najari.

**El Nuevo Testamento en el idioma Culina
(mádija) del Perú**

**Kulina: El Nuevo Testamento en el idioma Culina
(mádija) del Perú New Testament**

copyright © 2014 Wycliffe Bible Translators, Inc.

Language: Culina (Kulina)

Contributor: Wycliffe Bible Translators, Inc.

All rights reserved.

2020-11-16

PDF generated using Haiola and XeLaTeX on 21 Feb 2024 from source
files dated 29 Jan 2022

4c7c82dd-1f0f-5341-b6e6-26970c27fee2